

Awadhi Easy-to-Read Version

Language: अवधी (Awadhi)

Provided by: Bible League International.

Copyright and Permission to Copy

Taken from the Awadhi Easy-to-Read Version © 2005 by Bible League International.

PDF generated on 2017-08-25 from source files dated 2017-08-25.

a1ae5774-2ca2-500b-8aeb-2c74229c4519

ISBN: 978-1-5313-1308-1

व्यवस्था विवरण

मूसा इस्राएल क मनइयन स बतियात ह

१ मूसा क जरिये इस्राएल क मनइयन क दीन्ह गवा संदेसा इ अहइ। उ ओनका इ संदेसा तबहिं दिहे रहा जब उ पचे यरदन नदि क पूरब क रेगिस्तान में रहेन। इ सूफ क निकट रहा जउन कि पारान रेगिस्तान अउ तोपेल, लाबान, हसेरोत अउ दीजाहाब सहरन क बीच में रहा।

२ होरेब अरथात सिनाई पहाड़े स सेईर पहाड़ स होइके कादेसबर्ने क जात्रा सिरिफ गियारा दिना क रही। ३ मुला जब मूसा इस्राएल क मनइयन क इ ठउरे प संदेसा दिहस तब इस्राएल क मनइयन क मिस्र तजे भए चालीस बरिस होइ गवा रहेन। इ चालिस बरिस क गियारहवें महीना क पहिला दिन रहा, जब मूसा इस्राएल क मनइयन स बातन किहेस। उ ओनसे उहइ सबहिं बातन कहेस जउन यहोवा ओका कहइ क हुकुम दिहे रहा। ४ इ तब भवा जब मूसा एमोरियन क राजा सीहोन जउन हिबरोन में रहत रहेन अउर बासान क राजा ओग क जउन एदरेई क असतारोत में रहत रहेन। ५ उहइ समइ उ पचे यरदन नदी क पूरब कइती मोआब क पहाँटा में रहेन अउर मूसा परमेस्सर क हुकुमन क अरथ बतावत रहा। मूसा कहेस:

६ “यहोवा, हमार परमेस्सर होरेब पहाड़े पइ हम स कहेस। उ कहेस, ‘तू पचे बहोत समइ स इ पहाड़े प ठहर चुका बाटया।’ ७ एमोरी लोगन क पहाड़ी देस अउर चारिहुं कइती क पहाँटा में जा। यरदन घाटी, पहाड़ी प्रदेश, पच्छिमी नीची भुइँया, दक्खिन क रेगिस्तान में अउ समुद्र तट में जा। कनानी लोगन क देस में अउर लबानोन में बड़की नदी परात तलक जा। ८ लखा, मई इ समूचइ देस तोहका दिए अहउँ। भितरे जा अउ ओह पइ कब्जा करा। इ उहइ देस बाटइ जेका देइ क बचन मई तोहरे पुरखन इबराहीम, इसहाक अउ याकूब क दिहे रहेउँ। मई इ प्रदेश ओन लोगन क अउ ओन लोगन क सन्ताने क देइ बरे बचन दिहे रहेउँ।”

मूसा प्रमुखन क नियुक्ति करत ह

९ मूसा कहेस, “ओह समइ जब मई तू पचन स बात किहे रहेउँ तबहिं कहे रहेउँ, ‘मई अकेल्ले तू लोगनक अगुअइ करइ अउ देखरेख करइ में समरथ नाहीं अहउँ।’ १० यहोवा तू पचनक परमेस्सर

करम स मनइयन क एतना बढ़ाएस ह कि तू पचे अब ओतना होइ ग अहा जेतना अकासे में तारा बाटेन! ११ होइ सकत ह यहोवा, तोहरे पुरखन क परमेस्सर, आज तू पचे जेतना अहा, ओहसे हजार गुना जियादा करइ। होइ सकत ह उ तू पचन क आसीबाँद देइ जउन उ तोहका सबनक देइ क बचन दिहेस ह। १२ का मई अकेल्ले तोहार देखरेख अउर तोहरी सबइ समस्या अउ वाद-विवाद क हल कइसे कइ सकत हउँ? नाहीं! १३ एह बरे: हर एक परिवार समूह स कछू सम्मानित मनइयन क चुना। मई ओनका तोहार नेता बनाउब। ओन बुद्धिमान मनइयन क चुना जउन समझदार अउ तजरबेकार अहइ।

१४ “अउर तू पचे कहया, ‘अइसा करब नीक अहइ।’

१५ “एह बरे, मई बुद्धिमान अउर सम्मानित मनइयन क लीन्ह जउन तोहार जरिया चुना भवा अहइ अउ ओनका तोहार प्रमुखन बनाएउँ। मई ओनमाँ स कछू क हजार क, कछू क सौ क, कछू क पचास क अउ कछू क दस क प्रमुख बनाएउँ ह। मई तोहरे परिवार समूहे बरे अधिकारियन क भी नियुक्त किहेउँ ह।

१६ “ओह समइ, मई तोहरे इ सबइ प्रमुखन क तोहार निआवाधीस बनाए रहेउँ। मई ओनसे कहे रहेउँ, ‘आपन मनइयन क बीचउ बीच वाद-प्रतिवाद क सुना। हर एक मोकदमा क फैसला सही सही करा। एकर कउनो महत्व नाहीं कि मोकदमा दुइ ठु इस्राएली मनइयन क बीच बाटइ या इस्राएली अउर बिदेसी क बीच। तू पचनक हर एक मोकदमा क फैसला सही करइ चाही। १७ जब तू फैसला करा तब इ जिन सोचा कि कउनो मनई दूसर क बराबरी में जियादा महत्व क बाटइ। तोहका पचनक हर एक मनई क फैसला एक तरह समुझिके करइ चाही। कउनो स जिन डेराअ काहेकि तोहार फैसला परमेस्सर स आवा अहइ। मुला अगर कउनो मोकदमा एतना जटिल होइ चुका होइ कि तू पचे फैसला न कइ सका तउ ओका मारे लगे लिआवा। मई एकर मोकदमा क फैसला करब।’ १८ उहइ समइ, मइ उ सबइ बातन क बताए रहेउँ जेका तू पचनक करइ चाही।

जासूस कनान देस में जात अहइ

१९ “तब हम पचे उहइ कीन्ह जेका यहोवा हमार परमेस्सर हम पचनक हुकुम दिहे रहा। हम पचे होरेब पहाड़े क तजा अउर एमोरी लोगनक पहाड़े क जात्रा कीन्ह। हम पचे ओन बड़की अउ सबइ

भयंकर भुइँया स होइके गएन जेका तू पचे भी लखे रह्या। हम पचे कादेसबर्ने पहुँच गएन।^{२०} तब मई तू पचन्स कहे रहेउँ, 'तू पचे एमोरी लोगन्क पहाड़ी प्रदेश में आइ चुका अहा। यहोवा हमार परमेस्सर इ देस हमका देई।^{२१} लखा, यहोवा तोहार परमेस्सर उ देस क तोहार समन्वा कइ दिहेस। अगवा बढ़ा अउ भुइँया क आपन बनाइ ल्या। तोहरे पुरखन क यहोवा परमेस्सर तू पचन्क अइसा करइ क आदेस दिहे अहइ। एह बरे जिन डेराअ, कउनो तरह क चिन्ता जिन करा।'

^{२२} "तब तू सबहि मोरे लगे आया अउ बोल्या, 'पहिले उ देस क लखइ क बरे कछू मनइयन क पठवा। उ सबइ क हुआँ क देस क धियान स लखि ग्या। उ सबइ तब वापस आइ सकत हीं अउ हम लोगन्क उ रस्ता बताइ सकत हीं जेनसे हम सबन्क जाइ क बाटइ अउर ओन सहरन क बताइ सकत हीं जेनके ताई हम पचन्क पहुँचइ क अहइ।'

^{२३} "मई सोचेउँ कि इ नीक विचार अहइ। एह बरे मई तू मनइयन में स हर परिवार समूह बरे एक ठु मनई क हिसाब स बारह मनइयन क चुनेस।^{२४} तबहिं उ सबई मनइयन हम पचन्क पीछे तजिके पहाड़ी पहाँटा में गएन। उ पचे एसकोल क घाटी में गएन। उ पचे भुइँया क विभिन्न जगह क छान-बीन किहेन।^{२५} उ पचे उहइ पहाँटा क कछू फल लिहन अउ ओनका हमरे लगे लिआएन। उ पचे हम लोगन्क विवरण दिहन अउ कहेन, 'इ नीक देस अहइ जेका यहोवा हमार परमेस्सर हमका दइ देत अहइ।'

^{२६} "मुला तू पचे ओहमाँ जाइसे इन्कार कइ दिहा। तू पचे यहोवा आपन परमेस्सर क हुकुम क मानइ स इन्कार कइ दिहा।^{२७} तू पचे आपन सिबिर में सिकाइत किहा। तू पचे कह्या, 'यहोवा हमसे घिना करत अहइ। उ हम पचन्क मिसर स बाहेर एमोरी मनइयन क देइ बरे लइ आवा जेहसे उ पचे हमका नस्ट कइ सकई।^{२८} अब हम पचे कहाँ जाई? हमार भाई हम पचन्क डेराएन। उ पचे कहेन, 'हुआँ क लोग हम पचन्स बड़वार अउ लम्बा अहइ, उ सहर बड़ा अहइ अउ ओनकइ देवार आसमान क छुअत हीं। अउ हम पचे देत्य *क सन्तानन क हुआँ लखा।''

^{२९} "तब मई तू पचन्स कहेउँ, 'घबराअ जिन! ओन लोगन्स डेराअ नाहीं!'^{३०} यहोवा तोहार परमेस्सर तोहरे समन्वा जाइ अउ तोहरे बरे लड़ी।

उ उहइ करी जे तू ओका मिसर में देखावत रहा।^{३१} तू पचे हुआँ आपन समन्वा ओका रेगिस्तान में जात भवा लख्या ह। तू पचे लख्या कि यहोवा तोहार परमेस्सर तोहका पचन्क वइसेन ही लइ आवा जइसे कउनो मनई आपन पूत क लिआवत ह। यहोवा पूरा रस्ता भइ तू पचन्क रच्छा करत भवा तोहका सबन्क हिआँ पहुँचाएस ह।'

^{३२} "मुला तबहुँ तू पचे आपन परमेस्सर पई नाहीं पतियाना।^{३३} जब तू पचे जात्रा करत रह्या तब उ तोहरे आगे तोहार डेरा डावइ बरे जगहिया हेरइ गवा। तोहका सबन्क इ बतावइ बरे कि तू पचन्क कउनो राहे प जाइ क अहइ उ राति क आगी में अउ दिन में बदरी में चला।

मनइयन क कनान जाइ प मनाही

^{३४} "यहोवा तोहार कहब सुनेस, उ कोहाइ गवा। उ प्रण किहस। उ कहेस,^{३५} तू सबइ लोगन जउन अबहुँ जिअत रहेन सबहिं पापी अहइ। उ लोगन स कउनो भी मनई नीक देसे मँन जाई, जेका देइ क बचन मई तोहरे पुरखन क दिहे अहइ।^{३६} यपुन्ने क पूत कालेब ही सिरिफ उ देस क लखी। मई कालेब क उ देस देब जेह पइ उ चला ह अउर मई उ देस क कालेब क सन्तानन क देब। काहेकि कालेब उ सबइ किहेस जउन मोर हुकुम रहा।'

^{३७} "यहोवा तू लोगन क कारण मोसे भी नाखुस रहा। उ मोसे कहेस, 'तू भी उ देस में नाहीं जाइ सकत्या।^{३८} मुला तोहार सहायक, नून क बेटवा यहोसू उ देस में जाइ। यहोसू क होसला बढ़ावा, काहेकि उहइ इस्राएल क लोगन्क भुइँया पइ आपन कब्जा जमावइ बरे लइ जाई।'^{३९} यहोवा हम पचन्स कहेस, 'तू पचे कह्या, कि तोहरे नान्ह-नान्ह गदेलन दुस्मान क जरिये लइ लीन्ह जइहीं। मुला उ सबइ उ देस में जाई। मई तोहरी गलितयन बरे तोहरे गदेलन क दोखी नाहीं मानत हउँ। काहेकि उ पचे अबहिं एतना नान्ह-नान्ह बाटेन कि उ पचे इ जान नाहीं सकतेन कि का सही बाटइ अउ का गलत। उ पचे हुवाँ जाब अउर मई उ पचन्क उ धरती ओकर देस क रुप में देब।'^{४०} मुला तू पचन क लाल सागर जाइवाला मार्ग स रेगिस्तान क सफर करइ चाही।'

^{४१} "तबहिं तू पचे कह्या, 'भूसा, हम पचे यहोवा क खिलाफ किहे अही। मुला अब हम पचे आगे

*१:२८ देत्य अरथात् अनाकी लोग, अनाक लोगन क सन्तानन, अइसा परिवार जउन कि आपन लम्बाई अउर सकतीसाली लड़ाइ बरे प्रसिद्ध रहेन।

बढ़व अउ जइसे पहिले यहोवा हमार परमेस्सर हुकुम दिहे रहा वइसेन ही लइब।

“तब तू पचन मँ स हर एक जुद्ध बरे औजार धारण किहस। तू पचे पहाड़ी-देस तलक जाई क तैयारी किहस।”^{१२} मुला यहोवा मोसे कहेस, ‘मनइयन स कहा कि उ पचे हुआँ न जाई अउर न लइई। काहेकि मई ओनकर संग न देव अउ ओनकर दुस्मन ओनका हराइ देइहीं।’

“^{१३} एह बरे, मई तू लोगन स बात किहेउँ, मुला तू पचे मोर एक न सुन्या। तू पचे यहोवा क हुकुम मानइ स इन्कार कइ दिहा। तू पचे घमण्ड स बेउहार किहेस अउर तू पचे पहाड़ी-देस तलक चलि गवा।”^{१४} तबहिं एमोरी लोग जउन उहइ पहाड़ी पहाँटा मँ रहत ही तोहरे खिलाफ होइ गएन। उ पचे तोहार पीछा उहइ तरह किहेन जइसे मधुमक्खी तोहार पीछा करत ह। उ पचे तोहार सेईर स लइके होर्मा तलक पूरा रास्ता मँ बुरी तरह हराएन।^{१५} तू पचे लउट्या अउ यहोवा क समन्वा रोया-चिचियाया। मुला यहोवा तोहार बात कछू नाहीं सनेस। उ तोहार बात सुनइ स इन्कार कइ दिहस।^{१६} एह बरे तू सबइ कादेस मँ बहोत समइ तलक रुका रह्या।

इस्राएल क लोग रेगिस्तान मँ भटकत हीं

२ “तब हम पचे घूमि गए अउ लाल सागर क सड़क होइके रेगिस्तान क जात्रा किहेस इ उहइ अहइ जइसा यहोवा मोका आदेस दिहे रहन। हम पचे सेईर क पहाड़ी पहाँटा क चारिहुँ कइती अनेक दिना तलक चलत रहन।^२ तब यहोवा मोसे कहेस, ^३ ‘तू पचे इ पहाड़ी क चारिहुँ कइती बहोत जियादा भटक चुका बाट्या। अब उत्तर कइती घूमा।’^४ उ मोसे तोसे इ कहइ क कहेस, तू पचे सेईर परदेस स होइके जाब्या। इ परदेस तू लोगन्क रिस्तेदारन एसाव क सन्तानन क अहइ। उ पचे तोहसे डेराइ जइहीं। बहोत सावधान रहा।^५ ओनसे जुद्ध जिन करा। मई ओकर एक फुट भुइँया तलक तोहका नाहीं देबउँ। काहेकि मई एसाव क सेईर क पहाड़ी परदेस ओनके कब्जे मँ दइ दीन्हेउँ।^६ तू पचन्क एसाव क लोगन्क हुआँ पइ भोजन करइ या पानी पिअइ क मूल्य चुकावइ चाही।^७ इ याद राखा कि यहोवा तोहार परमेस्सर, तोहका तू सबइ जउन कछू भी किह्या ओन सबहिं बरे आसीर्बाद दिहस। उ इ लम्बे चौड़े रेगिस्ताने स तोहार जात्रा जानत ह।

यहोवा तोहार परमेस्सर इ सबइ चालीस बरिसन मँ तोहरे संग रहा ह। तू पचन्क कउनो भी चीजन क कमी नाहीं रही।

^८ “एह बरे, हम लोग सेईर मँ रहइवालन आपन रिस्तेदारन क लगे स अगवा बढ़ गए। हम पचे यरदन घाटी स एलत अउ एस्थोनगेबेर सह्रन क जाइवालिन सड़क क पाछे तजि दिहेन। तब हम पचे उ सड़क पइ घूमि गए जउन मोआब क रेगिस्तान कइती जात अहइ।

आर परदेस मँ इस्राएल

^९ “यहोवा मोसे कहेस, ‘मोआब क लोगन्क परेसान जिन करा। ओनके खिलाफ जंग जिन छेड़ा। मई ओनकइ कउनो भी भुइँया तू पचन्क नाहीं देब। उ पचे लूत क सन्तानन अहइ, अउर मई ओनका आर परदेस दिहे अहउँ।”

^{१०} (पहिले, आर मँ एमी लोग रहत रहन। उ पचे सक्तीसाली मनई रहन अउर हुआँ ओनमाँ बहोत स रहन। उ पचे अनाकी लोगन क तरह बहोत लम्बा रहन।^{११} अनाकी लोगन क तरह, एमी रपाई लोगन क एक ठु हींसा समुझा जात रहन। मुला मोआबी लोग ओनका एमी कहत रहन।^{१२} पहिले होरी लोग भी सेईर मँ रहत रहन। मुला एसाव क सन्तानन ओनकर भुइँया लइ लिहन। एसाव क सन्तानन होरी लोगन क नास कइ दिहन। तब एसाव क सन्तानन हुआँ रहइ लागेन। इ वइसा ही किहेन जइसा इस्राएल उ भुइँया क कब्जा करइ मँ किहेन जउन यहोवा ओनका दिहे रहन।)

^{१३} “यहोवा मोसे कहेस, ‘अब तइयार होइ जा अउर जेरेद घाटी क पार जा।’ एह बरे हम जेरेद घाटी क पार किहेन।^{१४} कादेसबर्न क तजइ अउ जेरेद घाटी क पार करइ मँ अइतीस बरिस क समइ बीता रहा। उ पीढ़ी क सबहिं जोधा मरि चुका रहन। यहोवा सपथ लिहेस कि अइसा ही होई।^{१५} यहोवा ओन लोगन क खिलाफ तब तलक करत रहन जब तलक उ सबइ सिबिर स न नस्ट होइ गएन।

^{१६} “जब सबहिं जोधन मरि गए रहन अउर चला गए रहन।^{१७} तब यहोवा मोसे कहेस, ^{१८} ‘आजु तू पचन्क आर सहर क सीमा क पार कइके मोआब क इलाका मँ लइ जावइ।^{१९} जब तू लोग ओकर भुइँया स होइके गुजरब्या तउ ओनका तंग जिन कर्या। ओनसे जिन लइया काहेकि मई तू पचन्क

^{१२} :९ लूत क सन्तानन लूत क पूत मोआब अउ अम्मोन रहन।

ओनकर भुइया न देव। काहेकि मई उ भुइया लूत क संतानन क नियन्त्रण करइ बरे दिहेउ ह।”

२० (उ प्रदेश रपाइ लोगन्क देस भी कहा जात ह। उ सबइ ही मनइयन पहिले हुआ रहत रहेन। अम्मोनी क लोग ओनका “जमजुम्मी लोग” कहत रहेन। २१ जमजुम्मी लोग बहोत सकतीसाली रहेन अउर ओनमाँ स बहोत स हुआ रहेन। उ पचे अनाकी लोगन क नाई लम्बा रहेन। मुला यहोवा जमजुम्मी लोगन क अम्मोनी लोगन बरे नास कइ दिहस। अम्मोनी लोग जमजुम्मी लोगन्क प्रदेश छीन लिहन अउ अब उ पचे हुआ रहत रहेन। २२ परमेस्सर इहइ काम एसाव क सन्तानन बरे किहस जउन सेईर मँ रहत रहेन। उ पचे हुआ रहइवालन होरी लोगन्क नास कइ दिहन। अब एसाव क सन्तानन हुआ रहत अहइ जहाँ पहिले होरी लोग रहत रहेन। २३ अब्बियन गाँवन मँ गाजा तलक रहत रहेन। मुला कछू लोगन कप्तोरी स आएन अउर ओका नस्ट कइ दिहेन। अबहि कप्तोरियन ओकर जगह मँ रहत अहइ।)

एमोरी लोगन क खिलाफ जुद्ध करइ क हुकुम

२४ “यहोवा मोसे कहेस, ‘जात्रा बरे तइयार होइ जा। अर्नोन नदी क घाटी से होइके जा। मई तू पचन्क हेसबोन क राजा सीहोन पइ विजय पावइ क सकती देत हउँ। मई तोहका सबन्क उ देस जीतइ क सकती देत हउँ। एह बरे ओकरे खिलाफ लड़ा अउ ओकरे देस पइ कब्जा करब सुरु करा। २५ आजु मई तू पचन्क समूचइ संसार क लोगन क डेरावइवाला बनाउब सुरु करत अहउँ। उ पचे तोहरे बारे मँ खबर पइही अउ उ पचे भय स काँप उठीही। जब उ पचे तोहरे बारे मँ सोचिही तब उ पचे धबराइ जइही।’

२६ “कदेमोत क रेगिस्तान स मई हेसबोन क राजा सीहोन क लगे दूतन क पठएउँ। दूतन सीहोन क समन्वा सान्ति-सन्धि राखेस। उ पचे कहेन, २७ ‘आपन देस स होइके हम पचन्क जाइ द्या। हम लोग सड़क पइ ठहरब। हम पचे सड़किया क दाहिन या बाएँ कइती न मुड़ि जाब। २८ हम पचे जउन खइया क खाब या जउन पानी पिअब ओकर बरे पैसा चुकाउब। हम पचे सिरिफ तोहरे देस स पइदल जात्रा करइ क अनुमति चाहित ह। २९ आपन देस स होइके तू पचे हम पचन्क यरदन नदी क पार कइके ओह देस मँ पहुँच तलक जाई जेका यहोवा हमार परमेस्सर हमका दइ देत बाटइ। एसाव क सन्तानन अउर आर मँ बसइया

मोआबी लोग आपन देस स हमका जाइ अनुमति दइ दिहन ह।’

३० “मुला हेसबोन क राजा सीहोन, आपन देस स हमका जाइ नाही दिहस। यहोवा, तोहार परमेस्सर, ओका बहोत जिद्दी बनाइ दिहस। यहोवा इ एह बरे किहस कि उ सीहोन क तोहरे कब्जा मँ दइ सकइ अउ उ अब इ कइ दिहेस ह।

३१ “यहोवा मोसे कहेस, ‘मई राजा सीहोन अउ ओकरे देस क तोहका सबन्क देत अहउँ। भुइया लेब सुरु करा। इ तब तोहार होई।’

३२ “तब राजा सिहोन अउ ओकर सब लोग हम पचन्स यहस मँ जुद्ध करइ बाहेर निकरेन। ३३ मुला यहोवा हमार परमेस्सर ओका हमका दइ दिहस। हम पचे ओका, ओकरे बेटवन क, अउ ओकरे सब लोगन क हराएन। ३४ हम पचे ओन सबइ सहरन पइ कब्जा कइ लीन्ह। तउ हम पचे सहर क सबइ मनइयन, मेहरारु अउ गदेलन क पूरी तरह नास कइ दीन्ह। हम पचे कउनो क जिअत नाही तजा। ३५ हम पचे जउन सहरन क जीत लीन्ह ओनमाँ स सिरिफ जनावरन अउ कीमती चीजन्क लइ लीन्ह। ३६ हम पचे अरोएर सहर क जउन अर्नोन क घाटी मँ बाटइ अउ उ घाटी क बीच दूसर सहर क भी हरावा। यहोवा हमार परमेस्सर हमका अर्नोन घाटी अउ गिलाद क बीच क सबहि सहरन क हार जाइ दीन्ह। कउनो सहर हम लोग बरे एतनाँ जियादा मजबूत नाही रहेन। ३७ मुला उ प्रदेश क निचके नाही गए, जउन अम्मोनी लोगन्क रहा। तू पचे यब्बोक नदी क किनारे या पहाड़ी प्रदेशन क सहरन क निअरे नाही गया। तू पचे अइसे कउनो ठउरे क निअरे नाही गया जेका यहोवा हमार परमेस्सर तोहका आदेस दिहस रहा।

बासान क लोगन क संग जुद्ध

३ “हम पचे घूमि गए अउ बासान क जाइवाली सड़क पइ चलतइ रहेन। बासान क राजा ओग अउ ओकर सबहि लोग एदरेइ मँ हम लोगन स लइइ बरे आएन। २ यहोवा मोसे कहेस, ‘ओग स जिन डेराअ, जेका मई तोहरे हाथे मँ देइ दिहेस ह। मई एकरे सबहि लोगन अउ भुइया क तोहका सबन्क दइ देव। तू पचे एका वइसे ही हरउब्बा जइसे तू पचे हेसबोन क सासक एमोरी राजा सीहोन क हराया।’

३ “इ तरह यहोवा हमार परमेस्सर बासान क राजा ओग अउ ओकर सबहि लोगन्क हमरे हाथे मँ दिह्या। हम पचे ओका लोगन पइ तब तलक हमला किहेस जब तलक हर कछू खतम नाही होइ

गाएन। ४ तब हम पचे उ समइ उ सबइ सहरन पइ कब्जा कीन्ह रहेन। एक भी अइसा सहर नाही बचा जेका हम पचे नाही लिहेन। हम पचे ओन लोगन स बासान मँ ओग क राज्ज अगोब प्रदेस क सबइ साठ सहरन क लीन्ह। ५ इ सबहिं सहरन ऊँची देवारन अउ दुआरन मँ मजबूत छड़न क संग बहोत मजबूत रहेन। अनेक दूसर सहरन बे देवारे क रहेन। ६ हम पचे ओनका वइसे बरबाद कीन्ह जइसे हेसबोन क राजा सीहोन क नगरन क बरबाद किहे रहे। हम पचे हर एक सहर क ओनके मनइयन क संग, मेहररुअन अउ गदेलन क भी बरबाद कीन्ह। ७ मुला हम पचे सबहिं गइयन अउ कीमती चीजन्क अपने लगे राखा।

८ “उहइ समइ मँ हम पचे एमोरी लोगन्क दुइ ठु राजा स भुइया लीन्ह। इ भुइया यरदन नदी क दूसरी कइती पूरब तरफ अहइ। इ भुइया अर्नोन घाटी स लइके हर्मोन पहाड़े तलक अहइ। ९ (सिदोनी हेर्मोन पहाड़े क ‘सियोन’ कहत हीं, मुला एमोरी एँका ‘सनीर’ कहत हीं)। १० हम पचे समूचइ समथर मइदान क सहर, समूचइ गिलाद, अउ समूचइ बासान मँ सल्का अउ एदेई तलक अधिपत्य कायम कीन्ह। उ सबइ सहर बासान मँ ओग क समराज्ज क सहरन रहेन।”

११ (बासान क राजा ओग एक रपाई मनई रहा जउन अबहिं तलक जिअत रहा। ओग क पलंग तोहे क बनी रही। इ करीब नौ हाथ लम्बी अउ चार हाथ चौड़ी रही। रब्बा सहर मँ इ अबहिं तलक अम्मोनी लोगन क संग बाटइ।)

यरदन नदी क पूरब क भुइया

१२ “उ समइ उ भुइया क हम पचे जीत लिहे रहे अउर मई एका रूबन परिवार समूह क अउ गादी परिवार समूह क अर्नोन घाटी क अरोएर स लइके गिलाद क आधा पहाड़ी भाग तलक ओकरे सहरन क संग दिहेउँ ह। १३ मनस्से क आधा परिवार समूह क मई गिलाद क दूसर आधा हींसा अउ समूचइ बासान दिहेउँ यानी अर्गोब क पूरा छेत्र बासान ओग क राज्ज रहा।”

(बासान क छेत्र रपाइयन क प्रदेस कहा जात रहा। १४ यार्डर, मनस्से क सन्तानन मँ स एक, अर्गोब क समूचा छेत्र जेका बासान कहा जात रहा, कब्जा कइ लिहेन। उ प्रदेस गसूरी अउर माका लोगन क इलाका तलक फइल गाएन। यार्डर पाछे इ प्रदेस क नाउँ आपन नाउँ पइ राखेस। इहइ स आजु भी यार्डर प्रदेस क नाउँ स सुमिरइ जात ह।)

१५ “मई गिलाद माकीर क दिहेउँ। १६ अउर रूबन परिवार समूह क अउ गाद परिवार समूह क मई उ प्रदेस दिहेउँ जउन अर्नोन घाटी स यब्बोक नदी तलक जात ह। घाटी क बीच एक चउहदी बाटइ। यब्बोक नदी अम्मोनी लोगन क चउहदी अहइ। १७ यरदन घाटी मँ यरदन नदी पच्छिम चउहदी बनावत ह। इ छेत्र क उत्तर मँ किन्नेरेत झील अउर दक्खिन मँ अराबा समुद्र बाटइ अरथात जेका लवण सागर कहत हीं। इ पूरब मँ पिसगा क चोटी क तलहटी मँ बना अहइ।

१८ “ओह समइया, मई तोहका आदेस दिहे रहेउँ: ‘यहोवा, तोहार परमेस्सर तू पचन्क रहइ बरे यरदन नदी क इ कइती क प्रदेस दिहेउँ ह। मुला अब तोहरे पचन्क जोधन बरे आपन औजार उठावइ चाही। तोहका दूसर इस्राएली परिवार समूहन क भी नदी क पार होइ क अगुवाइ करइ चाही। १९ तोहार मेहररुअन, गदेलन अउर तोहार गोरुअन हिआँ ओन सहरन मँ रइहीं जेनका मई तू पचन्क दिहेउँ ह। मई जानत हउँ कि तोहरे लगे बहोत स गोरुअन अहइ। २० मुला तोहे पचन्क आपन इस्राएली रिस्तेदारन क मदद यरदन नदी क दूसर किनारे उ प्रदेस क पाइ लेतेन तलक करइ चाही जउन यहोवा तोहार परमेस्सर दिहेस ह। ओनकइ मदद तब तलक करा जब तलक यहोवा ओनकइ जीवन मँ सान्ति न देइ जइसा तू पचे हिआँ पाइ लिहा ह। तब तू पचे हिआँ आपन देस मँ लउटि सकत ह जेका मई तू पचन्क दिहेउँ ह।’

२१ “तब मई यहोसू स कहेउँ, ‘तू पचे उ सबइ लख्या ह जउन यहोवा तोहार परमेस्सर इ दुइ राजा लोगन क संग किहेस ह। यहोवा अइसा ही ओन सबहिं राज्जन क संग करब जउन जगह तू जात रहा। २२ इ सबइ देसन क राजा लोगन स जिन डेराअ, काहेकि यहोवा तोहार परमेस्सर, तोहरे बरे लड़ी।’

मूसा क कनान मँ प्रवेस करइ स मनाही

२३ “मई उ समइ यहोवा स विसेख कृपा क पराथना किहेउँ, २४ यहोवा मोर सुआमी, मई तोहार सेवक अहउँ। तू मोका आपन महानत सक्ती देखाइ सुरू किहस ह। सरग या भुइया पइ कउनो अइसा दूसर परमेस्सर नाही अहइ, जउन तू किह्या ह तोहरे तरह महान अउ सक्तीसाली काम कइ सकइ। २५ मई तोहसे विनती करत हउँ कि तू मोका उ पार जाइ द्या अउ यरदन नदी क दूसर कइती क नीक प्रदेस, सुन्नर पहाड़ी पहँटा अउर लवानोन क लखइ द्या।’

२६ “मुला यहोवा तोहरे कारण मोह पइ नाखुस रहा। उ मोर बात सुनइ स इन्कार कइ दिहा। उ मोसे कहेस, ‘बस करा! एकरे बारे मैं मोका दूसर सब्द जिन कहा। २७ पिसगा पहाड़े क चोटी पइ जा। पच्छिउँ कइँती, उत्तर कइँती, दक्खिन कइँती, पूरब कइँती लखा। ओनका तू आपन आँखिन स लखा काहेकि तू पचे यरदन नदी क पार नाही कइ पउब्या। २८ तू पचन क यहोसू क निर्देस देइ चाही। ओका मजबूत अउ हिम्मती बनावा। काहेकि यहोसू लोगन क यरदन नदी क पार लइ जाइ। यहोसू ओन भुइँया क जउन तू लखत रहा ओका कब्जा करइ मैं तोहार मदद करी ओहमाँ तोहका रहइ क देइ।’

२९ “एँह बरे हम पचे बेत-पोर क दूसर कइँती घाटी मैं रुकि गए।”

मूसा लोगन क परमेस्सर क नेमन पइ धियान देइ बरे चिताउनी देत ह

१ “इस्राएल, अब ओन नेमन अउ सबइ आदेस क सुना जेनकइ उपदेस मई देत अहउँ। ओनका माना। तब तू पचे जिअत रहब्या। तू जाइ सकब्या अउर उ परदेस क लइ लेइ सकब्या जेका यहोवा तोहरे पचन्क क पुरखन क परमेस्सर तोहका दइ देत अहइ। २ जउन मई हुकुम देत अहउँ ओहमाँ अउर कछू जोरब नाही अहइ। तू पचन्क ओहमाँ स कछू घटावइ नाही चाही। तू पचन्क आपन यहोवा परमेस्सर क ओन सबइ आदेस क मानइ चाही जेनका मई तू पचन्क दिहेउँ ह।

३ “तू पचे लख्या ह कि बाल पोर मैं यहोवा का किहेस। यहोवा तोहार परमेस्सर तोहरे ओन सबहि मनइयन क नास कइ दिहेस जउन बाल पोर क मानत रहेन। ४ मुला तू लोग सबइ जउन यहोवा आपन परमेस्सर क संग रहेन, आजु जिअत अहा।

५ “धियान द्या, यहोवा मोर परमेस्सर जउन मोका हुकुम दिहेस ह, ओनहीं नेमन अउ हुकुमत क मई तू पचन्क सिच्छा देत अहउँ। तोहका उ नेमन क उ भुइँया मैं जरूर मानइ चाही जहाँ तू पचे रहइ बरे जात रहा। ६ एँन नेमन क होसियारी स पालन करा। इ दूसर रास्टरन क सूचित करी कि तू पचे बुदधि अउ समझ राखत अहा। जब ओन देसन क लोग इ नेमन क बारे मैं सुनिहीं तउ उ सबइ सच्चाइ क साथ स्वीकार करिहीं कि ‘फुरइ, इस्राएल रास्टर क लोग बुदधिमान अउ समुझदार अहइ।’

७ “कउनो रास्टर क कउनो देवता ओनके संग ओतना निचके नाही रहत जउने तरह यहोवा हमार परमेस्सर जउन हम लोगन क लगे रहत ह, जब हम ओका पुकारित ह, ८ कउनो दूसर रास्टर एँतना महान नाही कि ओकरे लगे उ पचे न्यायसंगत नेमन अउ हुकुमन होइ जेनकर उपदेस मई आजु करत अहउँ। ९ मुला तू पचन्क होसियार रहइ। निहचय कइ ल्या कि जब तलक तू पचे जिअत रहब्या, तब तलक तू पचे देखी भइ चिजियन क न बिसरब्या या एकाँ आपन हिरदइ स जाइ न देब्या। तू पचन्क इ सबइ सिच्छा क आपन पूत अउ पोतन क देइ चाही। १० उ दिन क याद राखा जब तू पचे होरेब पहाड़े पइ आपन यहोवा परमेस्सर क समन्वा टाढ़ रह्या। यहोवा मोसे कहेस, ‘मई जउन कहत हउँ, ओका सुनइ बरे लोगन क बटोरा। तब उ पचे मोर स भयभीत होइहीं जब तलक उ पचे उ भुइँया पइ रइहीं अउर उ पचे इ सब उपदेस आपन गदेलन क भी देइहीं।’ ११ तू पचे निचके आया अउ पहाड़े क तरखाले खड़ा होइ गया। पहाड़े मैं आग लग गइ अउ उ अकास क छुअइ लाग। घना करिआ बादर अउ अँधियारा गमका। १२ तबहिँ यहोवा आगी क बीच मैं स तू पचन्स बतियान। तू पचे अवाज सुनया मुला तू पचे ओका कउनो सकल नाही निहार सक्या। सिरिफ अवाज सुनाई पड़त रही। १३ उ तू पचन क आपन करार क बताएस। उ दस आदेसन क दिहस अउ तोहका ओका मानइ क आदेस दिहस। उ ओनका दुइ टू पाथर क सिला पइ लिखेस। १४ ओह समइ यहोवा मोका हुकुम दिहस कि मई तू पचन्क इ सबइ विधि अउ नेमन क उपदेस देउ। इ सबइ उहइ सब नेमन अउ विधि अहइ जेनका मानव तू पचन्क उ देस मैं करइ चाही जेका तू पचे लेइ अउ बसइ बरे तू पचे जात अहा।

१५ “उ दिना यहोवा होरेब पहाड़े क आगी स तोहे सबन्स बात किहस। तू पचे ओका तने क रूप मैं नाही लख्या। एँह बरे होसियार रहा। १६ आपन जिन्नगी क जिन बरबाद करा। आपन बरे कउनो मूरति क रूप जिन बनावा। अइसी मुर्ती जिन बनावा जउन कउनो मनसेधू अउ मेहरारु क नाई होइ। १७ अइसी मूरत जिन बनावा जउन भुइँया क कउनो जनावर या अकासे क पंछी क नाई देखाँइ देत होइ। १८ अउर अइसी मूरत जिन बनावा जउन भुइँया पइ रँगइवाला या समुदर क मछरी क नाई देखाँइ देत ह। १९ जब तू पचे अकासे कइँती निगाह करा अउर सूरज, चँदा, तारन अउ बहोत कछू चिजियन तू अकासे मैं लखा, ओनका प्रति

सेवा अउ पूजा बरे आकसित जिन भवा। यहोवा तू पचन्क परमेस्सर एँन सबइ चिजियन क संसारे क दूसर मनइयन क दिहस ह।^{२०} मुला यहोवा तोहका पचन्क मिस्र स बाहेर लिआवा ह जउन तोहरे पचन बरे लोहा क भट्टी रही। उ तू सबन्क एह बरे लिआएस ह कि तू पचे ओकर आपन लोग बन सका जइसे तू पचे अबहुँ अहा।

^{२१} “यहोवा तोहरे पचन्क कारण मोसे कोहाइ ग रहा। उ किरया खाएस कि मई यरदन नदी क ओह पार नाही जाइ सकत हउँ। उ कहेस कि मई उ सुन्नर प्रदेश मँ घुस नाही सकत हउँ जेका यहोवा तोहार परमेस्सर तोहका मिरास क रूप मँ देत अहइ।^{२२} एँह बरे मोका इहइ प्रदेश मँ मरइ चाही। मई यरदन नदी क पार नाही जाइ सकत हउँ। मुला तू पचे ओकरे पार होइ जाब्या अउ अच्छा भुइया पाउब्या।^{२३} तोहका सबन्क होसियार रहइ चाही कि तू पचे उ करार क जिन बिसरि जा, जेका यहोवा तोहरे पचन्क परमेस्सर तोहे सबन्स किहे अहइ। तू पचन्क कउने किसिम क मूरति नाही बनवइ चाही काहेकि यहोवा तोहरे पचन्क परमेस्सर तोहे सबन्क न बनावइ क आग्या दिहे अहइ।^{२४} काहेकि तोहार परमेस्सर, ईस्यालु परमेस्सर अहइ। उ भस्म करइ बरे आगी क नाइ अहइ।

^{२५} “जब तू पचे उ भुइया मँ बहोत समइ तलक अच्छी तरह स रहि लेब्या अउ तोहार सबन्क पूतन अउ पोतवन होइहीं, अगर तू भ्रस्ट होइ जाब्या अउ तू सबइ प्रकार क मूर्ति बनाउब्या, तउ यहोवा तोहार पचन्क परमेस्सर इ क बुरा चीज मँ सामिल करिहीं। एहसे उ कोहाइ जाइ।^{२६} अगर तू पचे उ बुराई क करब्या, तउ अकास अउ धरती तू पचन्क खिलाफ गवाह होई। मई तोहका कहत हउँ इ होई। तू पचे हाली ही बरबाद होइ जाब्या। तू पचे यरदन नदी क उ देस क लेइ बरे पार करत बाट्या, मुला तू पचे हुवाँ बहोत समइ तलक नाही रहब्या। तू सबहि पूर्णरूप स नस्ट होइ जाब्या।^{२७} यहोवा तोहे पचन्क दूसर रास्ट्रन मँ तितराइ बितराइ देइ अउ तू पचन मँ स उ देस मँ कछु ही जिअत रइहीं जेनमाँ यहोवा तू पचन्क पठइ।^{२८} तू पचे हुवाँ मनइयन क बनवा देवतन क पूजब्या, ओन जिजियन क जउन काटे अउ पाथर क होइहीं जउन न लखि, न सुनि, न खाइ या न सूँघ सकत हीं।^{२९} मुला एँन दूसर देसन मँ तू पचे यहोवा आपन परमेस्सर क हेरब्या। अगर तू पचे आपन पूरी तन अउ मन स ओका हेरब्या तउ ओका पउब्या।^{३०} जब तू पचे विपत्ति मँ पडि

जाब्या अउर उ सबइ बातन तू पचन पइ घटिही तउ तू पचे उ दिनन मँ यहोवा आपन परमेस्सर क लगे लउटब्या अउ ओकरी आग्या क मनब्या।^{३१} यहोवा तोहार परमेससर कृपालु अहइ उ तू पचन्क न तजी। उ तू पचन्क नस्ट नाही करी। उ उ वाचा क न बिसरी जउन उ तोहरे पुरखन क बचन क रूप मँ दिहस।

ओन महान करमन क बारे मँ सोचा जउन यहोवा तोहरे पचन्क बारे मँ किहस

^{३२} “का एँतनी महान बात पाछे कबहुँ भइ रही ? पाछे के उ दिनन क बारे मँ सोचा जब परमेस्सर धरती पइ मनई क बनाएस। ओन सबहि बातन क बारे मँ सोचा जउन संसार मँ कहुँ भी घटि भइ अहइ। का इ महान घटना जइसी कउनो कबहुँ पहिले सुनेस ह ? नाहीं।^{३३} तू पचे परमेस्सर क तू पचन्स आगी मँ स बोलत सुन्या ह अउर तू पचे अबहुँ भी जिअत अहा। का अइसी घटना कउनो क संग घटी भइ अहइ ? नाहीं।^{३४} का कउनो दूसर देवता कबहुँ आपन लोगन क दूसरे रास्ट्रन क भीतर खुद हुआँ स बाहेर लिआवइ क जतन किहस ह ? नाहीं। मुला तू पचे खुद लख्या ह कि परमेस्सर इ सबइ काम तोहार बरे करत ह। उ तोहका मिस्र स परीच्छा, चमत्कार, अचरज, जुद्ध, महान सकती, ताकत अउ भयानक कामन क जरिया बाहर लिआएस।^{३५} उ तू पचन्क इ सब देखाएस ह जेका तू पचे जान ल्या कि यहोवा ही परमेस्सर अहइ। ओकरे अतिरिक्त कउनो दूसर परमेस्सर नाहीं अहइ।^{३६} यहोवा सरग स आपन बातन क, तोहका सिच्छा देइ बरे सुनइ देत रहा। उ धरती पइ आपन महान आगी देखाएस अउ उ ओहमाँ स बोलेस।

^{३७} “यहोवा तोहरे पुरखन स पिआर करत रहा। इहइ कारण रहा कि उ ओनके पुरखन यानी तू पचन्क चुनेस अउ इहइ कारण अहइ कि यहोवा तोहका मिस्र बाहेर लिआएस। उ तोहरे संग रहा अउ आपन बड़की सकती स तू पचन्क बाहेर लिआएस।^{३८} जबहि तू पचे आगवा बढ़्या तउ यहोवा तोहरे समन्वा स रास्ट्रन क बाहेर जाइ बरे मजबूर किहस। इ सबइ रास्ट्र तू पचन्स बड़का अउ जियादा बरिआर रहेन। मुला यहोवा तू पचन्क ओनके देस मँ लइ आवा। उ ओनकइ देस तू पचन्क बसइ बरे दिहस अउ इ देस आजु भी तोहार अहइ।

^{३९} “एह बरे आजु तू पचन्क जानइ अउ सुमिरइ चाही कि यहोवा परमेस्सर अहइ। उ आकासे क

ऊपर अउ धरती क नीचे तलक क परमेस्सर अहइ । कउनो दूसर परमेस्सर नाही अहइ । “तू पचन्क ओकरे ओन नेमन अउ हुकुमन क जरूर मानइ चाही जेनका मई आजु तू पचन्क देत अहउँ । अगर तू करब तब हर एक बात तोहरे पचन्क अउ तोहरे ओन गदेलन बरे नीक रही जउन तोहरे सबन्क बाद होइहीं । तू पचे लम्बे समइ तलक उ देस मँ रहब्या जेका यहीवा तोहार परमेस्सर तू पचन्क हमेसा बरे दइ देत अहइ ।”

मूसा सुरच्छा क नगरन क चुनत ह

“१ तब मूसा तीनउ सहरन क यरदन नदी क पूरब कइती चुनेस । २ जदि कउनो मनई कउनो क संजोग स मारि डावइ तउ उ इ सहरन मँ स कउनो मँ पराइके जाइ सकत ह अउ बचा रहि सकत ह । अगर उ मारा भए मनई स घिना नाही करत रहा अउर ओका मार डावइ क इरादा नाही रखत रहत तउ उ ओन सहरन मँ स कउनो एक मँ जाइ सकत ह । ३ मूसा जउने सहरन क चुनेस, उ सबइ इ सब रहेन: रूबेनी लोगन बरे रेगिस्तान क मैदानी भुइया मँ बेसेर; गादी लोगन बरे गिलाद मँ रामोत अउ मनस्से लोगन बरे बासान मँ गोलान ।

मूसा क नेमन क परिचय

“४ इस्राएली मनइयन बरे जउन नेम मूसा दिहस उ इ बाटइ । ५ मूसा इ सबइ उपदेसन, नेमन अउ हुकुमन इस्राएल क लोगन बरे तब दिहस जब उ सबइ मिस्र स बाहेर आएन । ६ मूसा इ सबइ नेमन क तब दिहस जब लोग यरदन नदी क पूरबी किनारे पइ बेत-पोर क पार घाटी मँ रहेन । उ पचे एमोरी राजा सीहोन क देस मँ रहेन, जउन हेसबोन मँ रहत रहा । मूसा अउ इस्राएल क लोग सीहोन क तब हराएन जब उ पचे आए रहेन । ७ उ पचे सीहोन क भुइया अउ बासन राजा क ओग क भुइया क अपन लगे रखइ बरे कब्जा कइ लिहे रहेन । दुइनउँ एमोरी राजा यरदन नदी क पूरब मँ रहत रहेन । ८ इ पहँटा अर्नोन घाटी क सिरे पइ टिका भवा अरोएर स लइके सिओन अरथात हेर्मोन पहाड़े तलक फइला रहा । ९ यरदन नदी क पूरब क पूरा पहँटा उस प्रदेस मँ मिला रहा । इ पूरब मँ पिसगा पहाड़े क चरण तलक अराबा समुद्र तलक फइलत भवा रहा ।

दस आग्यन

५ ? मूसा इस्राएल क सब मनइयन क एक संग बोलाएस अउ ओनसे कहेस, “इस्राएल क

मनइयो ! आजु जउने नेमन अउ कानूनन क मई बतावत अहउ, ओनका सुना । इ सबइ नेमन क सीखा अउ सव्ती स ओनका माना । २ यहीवा, हम पचन्क परमेस्सर होरब पहाड़े पइ हम पचन्क संग वाचा किहे रहा । ३ यहीवा इ वाचा हम पचन्क पुरखन क संग नाही किहे रहा, मुला हम पचन्क हमार संग जउन कउनो आजु जिअत अहइ । ४ यहीवा पहाड़े पइ तू पचन्स आमने सामने बात किहस । उ तू पचन्स आगी मँ स बतियान । ५ ओह समइ तू पचन्क इ बतावइ बरे कि यहीवा का किहस ह, मई तू लोगन अउ यहीवा क बीच खड़ा रहेउँ । काहेकि तू पचे आगी से डेराइ गया अउर तू पचे पहाड़े पइ जाइ स इन्कार किह्या । यहीवा कहेस:

६ ‘मई यहीवा तोहार उ परमेस्सर हउँ जउन तू पचन्क मिस्र स बाहेर लइ आएउँ ह जहाँ तू पचे दास क नाई रहत रह्या ।

७ ‘मोरे अलावा कउनो दूसर देवता क पूजा जिन करा ।

८ ‘कउनो भी मूरतियन या कउनो क तस्वीर जउन आकास क ऊपर मँ, भुइया पइ या समुद्र क नीचे मँ होइ, जिन बनावा । ९ ओका निहुरिके दण्डवत या पूजा जिन करा । काहेकि मई यहीवा तोहार परमेस्सर ईस्यारु अहउँ । मई आपन लोगन क जरिये कउनो दूसर देवता क पूजा स घिना करत हउँ । अइसे लोग जउन मोरे खिलाफ पाप करत हीं, मोर दुस्मन होइ जात हीं । मई ओन लोगन्क सजा देब अउर मई ओनके पूतन, पोतन अउ परपोतन क सजा देब । १० मुला मई ओन लोगन पइ बहोत दयालु रहब जउन मोसे पिरम करत हीं अउर मोरे आदेसन क मानत हीं । मई ओनकइ हजार पीढ़ियन तलक दयालु रहब ।

११ ‘यहीवा, आपन परमेस्सर क नाउँ क उपयोग गलत तरिके स जिन करा । अगर कउनो मनई ओकरे नाउँ क उपयोग गलत तरीके स करत होइ तउ उ दोखी अहइ अउर यहीवा ओका निदोख न बनाई ।

१२ ‘सबित क दिना क खास महत्व देइ बरे साबित खास दिन क रूप मँ माना । यहीवा तोहार परमेस्सर हुकुम दिहस ह कि तू पचे सबित क दिन क हफ्ता क दूसर दिनन स अलगाइ द्या । १३ पिछले छः दिन तोहरे पचन्क काम करइ बरे अहइ । १४ मुला सतवाँ दिन यहीवा तोहरे परमेस्सर क सम्मान मँ आराम करइ क दिन अहइ । एह बरे सबित

क दिन कउनो मनई काम न करइ चाही। यानी तू पचे, तोहार पूतन, बिटियन, मनइयन अउ मेहरारु नउकरन, गइयन, बर्धन, गदहन, अउर तोहरे पचन्क सहरन मँ रहइवाला विदेसी, कउनो भी काम न करइ चाही। तोहरे पचन्क दास क भी तोहार जइसा आराम मिलइ चाही।^{१५} तोहका इ जरूर याद रखइ चाही कि तू मिस्र मँ दास रहा। यहोवा, तोहार परमेस्सर महान सक्ती स तू पचन्क मिस्र स बाहरे लिआवा। उ तू पचन्क अजाद किहस। इहइ कारण अहइ कि यहोवा तोहार परमेस्सर हुकुम देत ह कि तू पचे सबित क दिन माना।

^{१६} 'आपन महतारी अउर बाप क सम्मान करा। यहोवा तोहार परमेस्सर तोहका इ करइ क हुकुम दिहस ह। अगर तू पचे इ हुकुम क मानत ह तउ तोहार उमिर लम्बी होइ अउर उ देस मँ जेका यहोवा तोहार परमेस्सर तू पचन्क दइ देत अहइ इ तोहार बरे अच्छा होइ।

^{१७} 'कउनो क हत्या जिन करा।

^{१८} 'बिभिचार क पाप जिन करा।

^{१९} 'कउनो चीज जिन चोरावा।

^{२०} 'दूसर जउन कछू किहे अहइँ ओकरे बारे मँ झूठ जिन बोला।

^{२१} 'तू पचे दूसर लोगन क धन-सम्पति या दूसर कउनो चिजियन जे दूसर क अहइ क आपन बनावइ क इच्छा जिन करा। दूसर मनई क पात्नी, घर, खेत, मनसेधू या मेहरारु नौकर, गइयन अउ गदहन लइ लेइ क इच्छा तू पचन मँ न होइ चाही।'^{२२}

मनइयन क परमेस्सर स डर

^{२३} मूसा कहेस, "यहोवा इ सबइ हुकुम तू सबहिं क दिहस जब तू पचे एक संग पहाड़े प रह्या। यहोवा साफ साफ सब्दन मँ बानत किहस अउर ओकर तेज आवाज आगी, बादर अउ घना अँधियारा स सुनाई देत रहा। जब उ इ आदेस दइ दिहस तब अउर कछू नाहीं कहेस। उ आपन सब्दन क दुइ टु पाथरे क सिला पइ लिखेस अउ ओनका मोका दइ दिहस।

^{२४} "तू पचे आवाज क तब सुन्या जब पहाड़ आगी स बरत रहा। तब तू पचे मोरे लगे आया, तोहरे परिवार समूह क सबहिं नेता लोग अउ तोहार सबहिं पुरनियन।^{२५} उ पचे कहेन, 'यहोवा हमार परमेस्सर आपन गौरव अउ बड़कइ देखाएस

ह। हम पचे ओका आगी मँ स बोलत सुना ह। आजु हम पचे लखि लीन्ह ह कि कउनो मनई क परमेस्सर स बात करइ क बाद भी जिअत रहि सकब, होइ सकत ह।^{२५} मुला अगर हम पचे यहोवा आपन परमेस्सर क दुसरी दाई बात करत सुना तउ हम पचे जरूर मरि जाब। उ खउफनाक आगी हमार नास कइ देइ। मुला हम पचे मरब नाहीं चाहित।^{२६} कउनो अइसा मनई नाहीं जउन हम लोगन क नाई कबहुँ जिअत परमेस्सर क आगी मँ स बतियात सुने होइ अउ जिअत होइ।^{२७} मूसा, तू निअरे जा अउ यहोवा हम लोगनक परमेस्सर, जउन कहत बाटइ सुना। तब उ सब बातन हमका बतावा जउन यहोवा तू पचन्स कहत ह, अउर हम लोग तोहार सुनब अउर ओकर पालन करब।'

यहोवा मूसा स बतियात ह

^{२८} "यहोवा उ सबइ बातन सुनेस जउन तू मोसे कह्या। तब यहोवा मोसे कहेस, 'मई उ सबइ बातन सुनेउँ ह जउन हम पचे कहेन ह। जउन उ पचे कहेन बढ़िया अहइ।^{२९} मई इच्छा करत हउँ कि उ पचे हिरदय स मोर सम्मान करइ अउर मोरे आदेसन क हमेसा मानइ सिखिहीं। तब इ ओनके अउ ओनके सन्तानन बरे सदा ही नीक रही।

^{३०} "जा अउ मनइयन स कहा कि आपन आपन तम्बूअन मँ लउटि जाई।^{३१} मुला मूसा, तू मोरे निअरे टाड़ रहा। मई तोहका सारा हुकुम, कानून अउ नेम हेरब जेकर सिच्छा तू ओनका देब्या। ओनका इ सबइ उ देस मँ करइ चाही जेका मई ओनका रहइ बरे दइ देत हउँ।'

^{३२} "एह बरे, तू सब मनइयन क उ सब कछू करइ बरे होसियार रहइ चाही जेकरे बरे यहोवा तोहका हुकुम दिहेस बाटइ। तोहका न दाहिन हाथे कइँती धूमइ चाही अउर न ही बाएँ हाथे कइँती।^{३३} तोहका उहइ तरह रहइ चाही, जउने तरह रहइ क हुकुम यहोवा तोहार परमेस्सर तोहका दिहे अहइ। तब तू सदा जिअत रहि सकत ह अउर हर चीज तोहरे बरे नीक होइ। उ देस मँ, जउन तोहार होइ, तोहार उमिर लम्बी होइ जाइ।

सदा परमेस्सर स पिरेम करा अउर आग्या माना

^१ "जउन आदेसन, नेमन अउ हुकुमन क यहोवा, तोहार परमेस्सर तोहका सिखावइ क मोका आदेस दिहस ह, उ सबइ इ सब अहइँ। एँनका उ देस मँ मानया जेहमाँ रहइ बरे तू परवेस करत अहा।^२ तू अउर तोहार गदेलन अउ पतोहन

जब तलक जिअत रहा यहोवा आपन परमेस्सर क सम्मान करइ चाही। तोहका ओनके ओन सबइ नेमन अउ हुकुमन क पालन करइ चाही जेनका मई तोहका दइ देत हउँ। अगर तू अइसा करब्या तउ लम्बी उमिर पउब्या।^३ इस्राएल क मनइयो, एका धियान स सुना अउ इ सबइ नेमन क माना। तब इ तोहारे बरे नीक होइ अउर तू पचे तेजी स बढ़ब्या। यहोवा तोहारे पुरखन क परमेस्सर, इ सबन बरे बचन दिहे अहइ कि तू पचे दूध अउर सहद स बहत भवा धरती पाउब्या।

४ “इस्राएल क मनइयो, धियान स सुना। यहोवा हमार परमेस्सर अहइ, यहोवा एक अहइ।^४ अउर तू पचन्क यहोवा आपन परमेस्सर स आपन क पूरा हिरदय, आतिमा अउ सक्ती स परिम करइ चाही।^६ इ सबइ हुकुमन क सदा आपन दिल मँ रखा जेनका मई आजु तू पचन्क दइ देत हउँ।^७ एनकइ सिच्छा आपन लरिकन क देइ बरे होसियार रहा। इ सबइ हुकुमन क बारे मँ तू पचे जब तू आपन घरन मँ बइठे भए, सड़किया पइ टहरत भए, जब तू ओलरा अउ जब जागा तब एकरे बारे मँ बात करा।^८ एँका स्मरण पत्र नाई आपन हाथे पइ बाँधा अउ ललाट पइ धारण करा।^९ एँका आपन घरन क दरवाजन पइ, अउ सहर फाटक पइ लिख ल्या।

१० “यहोवा तोहार परमेस्सर तू पचन्क देस मँ लइ जाइ जेकरे बरे उ तोहारे पुरखन-इब्राहीम, इसहाक अउ याकूब क देइ क बचन दिहे रहा। तब उ तू पचन्क बड़के अउ अमीर सहर देइ जेनका तू नाही बनाया।^{११} यहोवा तू पचन्क अच्छी चीजन्स भरा भवा घर देइ जेनका तू पचे हुवाँ नाही राख्या ह। यहोवा तू पचन्क कुआँ देइ जेनका तू पचे नाही खन्या ह। यहोवा तू पचन्क अंगूरन अउ जइतून क बाग देइ जेनका तू पचे नाही लगाया ह। तू पचन्क ओका खाब्या अउ संतुट्ट होब्या।

१२ “मुला होसियार रहा। यहोवा क जिन बिसरा जउन तू पचन्क मिस्र स लिआएस, जहाँ तू पचे दास रह्या।^{१३} यहोवा आपन परमेस्सर क सम्मान करा अउर सिरिफ उहइ क सेवा करा। बचन देइ बरे तू पचे सिरिफ उहइ क नाउँ क उपयोग करा।^{१४} तू पचन्क दूसर देवतन क अनुसरण नाही करइ चाही। तू पचन्क आपन चारिहुँ कइती रहइवाला लोगन क देवतन क अनुसरण नाही करइ चाही।^{१५} काहेकि यहोवा तोहार परमेस्सर जउन तोहार बीच अहइ ईस्यालु परमेस्सर अहइ। अगर तू पचे दूसर देवतन क पाछे रहब्या, तउ उ तू पचन पइ

कोहाइ जाइ अउ उ धरती पइ स तू पचन क खतमइ कइ देइ।

१६ “तू पचन्क यहोवा आपन परमेस्सर क जाँच उहइ तरह नाही करइ चाही जउने तरह तू पचे मस्सा मँ जाँचत किह्या ह।^{१७} तू पचन्क यहोवा आपन परमेस्सर क हुकुमन क मानइ बरे पक्का निहचय रखइ चाही। तू पचन्क ओकर सबहिँ ओन उपदेसन अउ नेमन क मानइ चाही जेनका उ तू पचन्क दिहे अहइ।^{१८} तू पचन्क उ सबइ उचित अउ नीक काम करइ चाही जउन यहोवा क खुस करइ तब तोहारे बरे इ ठीक होइ अउर तू पचे उ देस मँ जाइ सकत ह जेकरे बरे यहोवा तोहारे पचन्क पुरखन क बचन दिहे अहइ।^{१९} अउर तू पचे आपन सबहिँ दुस्मनन क सक्ती स निकार सकब्या, जइसा यहोवा कहेस ह।

आपन गदेलन क परमेस्सर क
कारज क सिच्छा द्या

२० “भविसस मँ, तोहार पचन्क पूत तोहसे सबन्स इ पूछ सकत ह कि ‘यहोवा हमार परमेस्सर हमका जउन उपदेस, कानून अउ नेम दिहस ह, ओकर अरथ का अहइ?’^{२१} तब तू पचे आपन पूतन स कहब्या, ‘हम पचे मिस्र मँ फ़िरौन क गुलाम रहेन, मुला यहोवा हम पचन्क बड़की सक्ती स बाहरे लिआवा ह।^{२२} यहोवा हमका माहन, खउफनाक चीन्हा अउ चमत्कार देखाँएस। हम पचे ओनके जरिये इ सबइ घटना क मिस्र क मनइयन, फ़िरौन अउ फ़िरौन क महल क संग होत भए लखा ह।^{२३} अउर यहोवा हम लोगन क मिस्र स एह बरे लिआवा कि उ-उ देस हमका दइ सकइ जेकरे बरे उ हमारे पुरखन क बचन दिहे रहा।^{२४} यहोवा हमका इ सबहिँ उपदेसन क मानइ क हुकुम दिहस। इ तरह हम लोग यहोवा आपन परमेस्सर क सम्मान करत अही। तब यहोवा सदा हम लोगन क जिअत राखी अउ हम पचे बढ़िया जिन्नगी बिताउब जइसा इ समइ अहइ।^{२५} अगर हम इ सबइ आदेसन क मानब जेका यहोवा हमार परमेस्सर हमका आदेस देत ह तउ हम पचे नीक होब्या।’

इस्राएल, परमेस्सर क खास लोग

१ “यहोवा तोहार परमेस्सर तू पचन्क उ देस मँ लइ जाब, जेका कब्जा करइ बरे तू पचे ओहमाँ जात अहा। परमेस्सर तोहारे बरे हिँती, गिगाँसी, एमोरी, कनानी, परिज्जी, हिब्बी अउ यबूसी क बाहरे हाँकि देइ। उ सात रास्ट्र तोहसे

जियाद बरियार अउ जियादा तादद मैं अहइ।
 २ यहोवा तोहार परमेस्सर इ रास्ट्रन क तू पचन्क
 अधीन करी अउर तू पचे ओनका हरउब्या। तू
 पचन्क ओनका पूरी तरह नस्ट कइ देइ चाही।
 ओनके संग कउनो सन्धि जिन करा। ओन पइ
 दाया जिन करा।^३ ओन लोगन मैं स कउनो क संग
 बियाह जिन करा, अउर उ रास्ट्रन क कउनो मनई
 क संग आपन पूत अउ बटियन क बियाह न करा।
 ४ काहेकि उ पचे तोहारे गदेलन क परमेस्सर क दूर
 लइ जइहीं। एह बरे तोहारे गदेलन दूसर देवतन क
 सेवा करहीं। तब यहोवा तोहे सबन पइ कोहाइ
 जाइ। उ हाली ही तोहार नास कइ देइ।

बनावटी देवतन क नास करइ क हुकुम

५ “तू पचन्क इ सबइ रास्ट्र क संग इ करइ
 चाही। तू पचन्क ओनकर वेदियन क बरबाद कइ
 देइ चाही। स्मृति पाथरन क टूकन मैं तोड़ि ड़ावइ
 चाही। ओनकर असेरा खम्भन क काटि ड़ावा अउ
 ओनकइ मूरतिन क बार ड़ावा।^६ काहेकि तू पचे
 यहोवा आपन परमेस्सर क अलग कीन्ह भवा मनई
 अहा। तू पचे यहोवा क आपन सम्पत्ति अहा।
 संसार क सबहिं मनइयन मैं स यहोवा तोहार
 परमेस्सर तू पचन्क विसेख अइसे लोग जउन
 ओकर आपन अहइ, चुना।^७ यहोवा तू पचन्स
 काहे पिरम करत ह अउ तू पचन्क उ काहे चुनेस ?
 एह बरे नाही कि दूसर लोगन क बराबरी मैं तोहार
 गिनती बहोतइ जियादा अहइ। तू पचे सबहिं
 लोगन मैं स सबसे कम रह्या।^८ मुला यहोवा तू
 पचन्क आपन बड़की सकती क जरिये मिस्र क
 बाहेर लिआवा, काहेकि उ तोसे पिरम करत ह। उ
 मिस्र क सम्राट् फ़िरौन क गुलामी स तू पचन क
 तोहारे पुरखन क दीन्ह भए बचन क पूरा करइ बरे,
 अजाद कराएस।

९ “एह बरे याद राखा कि यहोवा तोहार
 परमेस्सर ही सिरिफ परमेस्सर अहइ। उ बिसासी
 परमेस्सर अहइ। उ आपन वाचा क पूरा करत ह।
 उ ओन सबहिं लोगन स पिरम करत अउ ओन पइ
 दाया करत ह जउन ओकरे हुकुमन क मानत हीं।
 उ हजारन पीढियन तलक पिरम करत रहत ह।
 १० जउन ओहसे घिना करत ह उ खुद ओसे ही सजा
 पाइहीं। उ ओनका बरबाद कइ देइ। जउन ओसे
 घिना करत ह उ बिना देरी भए खुद ओसे ही सजा
 पाइहीं। ११ एह बरे तू पचे इ आदेसन, नेमन अउ

हुकुमन क मानइ मैं जरूर होसियार रहा, जेनका
 मइ आजु तू पचन्क दइ देत हउं।

१२ “अगर तू पचे मोरे इ सबइ नेमन पइ धियान
 देब्या अउ ओनका मानइ मैं होसियार रहब्या तउ
 यहोवा तोहार परमेस्सर तू पचन्स पिरम क वाचा
 क पूरा करी। उ इ बचन तोहारे पुरखन क दिहे रहा।
 १३ उ तू पचन्स पिरम करी अउ तू पचन क आसीबांद
 देइ। तोहारे रास्ट्रे मैं लोग लगातार बढत जइहीं।
 उ तोहे पचन्क गदेलन क आसीबांद देइ। उ तोहारे
 पचन्क खेतन मैं अच्छी फसल क आसीबांद देइ।
 उ तू पचन्क अन्न, दाखरस अउ तेल क आसीबांद
 देइ। उ तोहारी गइयन क बछ्खवन अउ तोहारी
 भेड़िन क बच्चा पइदा करइ क आसीबांद देइ। तू
 पचे उ सबइ आसीबांद उ देसे मैं पउब्या जेका तू
 पचे देइ क बचन यहोवा तोहारे पुरखन क दिहे रहा।

१४ “तू पचे दूसर लोगन्स जियादा आसीबांद
 पउब्या। हर एक पति-पत्नी बच्चे पइदा करइ
 क काबिल होइहीं। तोहार गोरु बछ्खवा पइदा
 करइ काबिल होइहीं।^{१५} अउर यहोवा तू पचन्स
 सबहिं बेरमियन क दूर करी। यहोवा तू पचन्क
 उ खउफनाक बेरमियन स बचाइ जउन तू मिस्र
 मैं जानत रहेन अउ ओन खउफनाक बेरमियन क
 ओन सबहिं लोगन क देइ जउन तू पचन्स घिना
 करत हीं।^{१६} तू पचन्क ओन सबहिं लोगन्क नास
 जरूर करइ चाही जेनका हरावइ मैं यहोवा तोहार
 मदद करत ह। ओन पइ दाया न करा। ओनके
 देवतन क सेवा न करा। उ तोहार बरे फ़ंदा अहइ।

यहोवा आपन लोगन क सहायता क बचन देत ह

१७ “आपन मन मैं इ न सोचा, ‘इ सबइ रास्ट्र
 हम लोगन्स जियादा बरिआर अहइं। हम पचे
 ओनका दबाव डाइके कइसे भगाइ सकित ह ?’
 १८ तू पचन्क ओनसे ड़ेराइ नाही चाही। तू पचन्क
 सुमिरइ चाही जउन यहोवा तोहार परमेस्सर
 फ़िरौन अउर मिस्र क लोगन्क संग किहस।
 १९ जउन बड़की बिपदन उ दिहस तू पचे ओनका
 लख्या। तू पचे ओकरे किए भए चमत्कार अउ
 अचरजन क लख्या। तू पचे यहोवा क बड़की
 सकती अउ मजबूती क, तू पचन्क बाहेर लिआवइ
 मैं उपयोग करत देख्या। यहोवा, तोहार परमेस्सर
 उहइ सकती क उपयोग ओन लोगन्क खिलाफ करी
 जेनसे तू पचे ड़ेरात अहा।

२० “यहोवा तोहार परमेस्सर, ओकर खिलाफ बरों क भेजब जउन बचा भवा अहइ अउ आपन क तोहस छुपाए अहइ। यहोवा ओन सबहिं मनइयन क नास करी। २१ तू पचे ओनसे जिन डेराअ, काहेकि यहोवा तोहार परमेस्सर तोहरे संग अहइ। उ महान अउ आस्वर्यजनक परमेस्सर अहइ। २२ यहोवा तोहार परमेस्सर ओन रास्टरन क तोहार देस थोड़ा-थोड़ा कइके तज देइ क मजबूर करी। तू पचे ओनका हाली मैं सबहिं क नास नाहीं कइ पउब्या। अगर तू पचे अइसा करब्या तउ जगंली जनावरन क तादाद तोहर बरे बहोत जियादा होइ जाइ। २३ मुला यहोवा तोहार परमेस्सर ओन रास्टरन क तू पचन्क दइ देइ। उ ओनका बरबाद होइ तलक बड़ा उलझन मैं डाइ के परेसान करब्या। २४ यहोवा तू पचन्क ओनके राजा लोगन क हरावइ मैं मदद करी। तू पचे ओनका मारि डाउब्या अउ उ बिसारि जाब। कउनो भी तू पचन्क रोक नाहीं सकी। तू पचे ओन सबहिं क बरबाद करब्या।

२५ “तू पचन्क ओनके देवतन क मूरतियन क वारि डावइ चाही। तू पचन्क ओन मूरतियन पइ मद्दा भवा सोना या चाँदी क लेइ क इच्छा नाहीं करइ चाही। तू पचन्क उ सोना क अउ चाँदी क अपने खातिर नाहीं लेइ चाही। इ तोहका फंसा लेइहीं काहेकि उ सबइ मूरती यहोवा तोहार परमेस्सर बरे नफ़रत-अंगेज अहइ। २६ इ सबइ मूरतियन क बर्बाद कीन्ह जाब्या। तू पचन्क ओन प्रकार क मूरतियन क आपन घरे मैं नाहीं लावइ चाही। एह बरे तू पचन्क ओनकर संग बर्बाद नाहीं कीन्ह जाब्या। तू पचन ओका अस्वीकार करइ चाही अउ ओन से घिना करइ चाही।

यहोवा क सुमिरा

१ “तू पचन्क आजु मइँ जउन सबइ कानून क देत ह ओका मानइ मैं होसियार रहइ चाही। काहेकि तब तू पचे जिअत रहब्या। तोहार गनती जियादा स जियादा होत जाइ। तू पचे उ देस मैं जाब्या अउ ओहमाँ रहब्या जेका यहोवा तोहरे पुरखन क देइ क बचन दिहे अहइ। २ अउ तू पचन्क उ लम्बी जात्रा क याद रखइ चाही जेका यहोवा तोहार परमेस्सर रेगिस्ताने मैं चालीस बरिस तलक कराएस ह। यहोवा तोहार परमेस्सर तोहका परिपूर्ण बनाएस ह। उ तू पचन्क बिनमूर बनवइ चाहत रहा। अउ तोहार परीच्छा लइ

चाहत रहा। उ पचे तोहार हिरदय क बारे मैं जानइ क चाहत रहा कि तू पचे ओकरे हुकुमन क पालन करब्या या नाहीं। ३ यहोवा तू पचन्क बिनमूर बनाएस अउ तू पचन्क भूखा रहइ दिहस। तब उ तू पचन्क मन्ना खियाएस जेका तू पचे पहिले स नाहीं जानत रह्या, यहाँ तक कि ओका तोहार पुरखन भी कबहुँ नाहीं लखे रहेन। यहोवा इ काहे किहस ? काहेकि उ चाहत रहा कि तू पचे जान ल्या कि मनइयन सिरिफ़ रोटी प ही जिअत नाहीं रहत ह किन्तु यहोवा क मुहँ स निकरा भवा हर एक बातन पइ टिका रहत ह। ४ इ सबइ पिछले चालीस बरिसन मैं तोहार ओढ़ना नाहीं निकलेन। तोहरे गोड़वन मैं चोट नाहीं लागेन काहेकि यहोवा तोहार रच्छा किहेन। ५ एह बरे तोहका पचन्क जानइ चाही कि यहोवा तोहार परमेस्सर तू पचन्क सिच्छा देइ अउ सुधारइ बरे उ सब वइसेन ही किहस जइसे कउनो पिता अपने बेटा क सिच्छा बरे करत ह।

६ “तू पचन्क यहोवा आपन परमेस्सर क आदेसन क मानइ चाही। ओकरे बताए भए राहे पइ जीवन बितावा अउ ओकर मान करा। ७ यहोवा तोहार परमेस्सर तू पचन्क एक टु नीक देसे मैं लइ जात अहइ, अइसे देस मैं जेहमाँ नदियन, फव्वारन अउ झरणा घाटियन अउ पहाड़ियन मैं बहत ह। ८ इ अइसा देस अहइ जेहमाँ गोहँ, जउ, अंगूरे क सबइ बेल, अंजीर क वृच्छ अउ अनार होत ही। इ अइसा देस अहइ जेहमाँ जइतून क तेल अउ मधु होत ह। ९ हुआँ तू पचन्क बहोत जियादा भोजन मिली। तू पचन्क हुआँ कउनो चीज क कमी नाहीं होइ। इ अइसा देस अहइ जहाँ लोहा क चट्टान अहइँ। तू पचे पहाड़ियन स ताँबा खन सकत ह। १० तोहरे पचन्क खाइ बरे खूब जियादा होइ अउ तू पचे संतुट्ट होब्या। तब तू पचे आपन परमेस्सर क तारीफ़ करब्या कि उ तू पचन्क अइसा बढ़िया देस दिहस।

यहोवा क कारजन क जिन बिसरा


११ “होसियार रहा, यहोवा आपन परमेस्सर क जिन बिसरा। होसियार रहा कि आज मइँ जउने हुकुमन क, कानूनन अउ नेमन क दइ देत हउँ ओनका माना। १२ तू पचे खाब्या अउ संतट्ट रहब्या। तू पचे बढ़िया मकान बनउब्या अउ ओनमाँ रहब्या। १३ तोहार लगे गोरुअन अउर

१७ :२० बरों इ एक प्रकार क डंक मारइ क कीड़ा अहइ। इ बड़का भिड़ या मधुमक्खि क नाई अहइ। हीआँ एकाँ अरथ अहइ परमेस्सर क सरगदूत या ओकरे महानसक्ती।

भेड़िन क बहोत बड़का झुण्ड होइहीं, तू पचे जियादा स जियादा सोना अउ चाँदी पउब्या। तोहरे लगे बहोत स चिजियन होइहीं।^{१४} जब अइसा होइ तउ तू पचन्क होसियार रहइ चाही कि तू पचन्क घमण्ड न होइ। तू पचन्क यहोवा आपन परमेस्सर क नाही बिसरइ चाही। उ तू पचन्क मिस्र स बाहर लाएस ह, जहाँ तू पचे गुलाम रह्या।^{१५} यहोवा तू पचन्क बहोतइ बड़का अउ खउफनाक रेगिस्ताने स लिआवा। हुवाँ जहरिला साँप अउ बीछू उ रेगिस्ताने मँ रहन। जमीन झुरान रही अउ कतहँ पानी नाही रहा। मुला यहोवा तोहका कठोर चट्टान स पानी बाहेर निकारि के दिहस।^{१६} रेगिस्ताने मँ यहोवा तू पचन्क मन्ना खिआएस, अइसी चीज जेका तोहार पुरखन कबहुँ नाही जान पाएन। यहोवा तोहार परीच्छा लिहस। काहेकि यहोवा तू पचन्क बिनमूर बनवइ चाहत रहा। उ चाहत रहा कि आखीर मँ तोहार सबन्क भला होइ।^{१७} आपन मने मँ कबहुँ अइसा जिन सोचा कि, 'मइ इ सारी सम्पति आपन सकती अउ जोगगता स पाएँ ह।'^{१८} यहोवा आपन परमेस्सर क सुमिरा। उहइ एक बाटइ जउन तू पचन्क सम्पत्ति पुराप्त करइ क सकती देत ह। यहोवा अइसा काहे करत ह? काहेकि उ तोहरे पुरखन क संग कीन्ह गइ वाचा क पूरा करइ क चाहत ह। उ आजु उहइ करत ह जउन उ वाचा किहे रहा।

^{१९} 'यहोवा आपन परमेस्सर क जिन बिसरा। कउनो दूसर देवता क पाछा जिन करा। ओकर पूजा या सेवा जिन करा। अगर तू पचे अइसा करब्या तउ मइ तू पचन्क आज चितउनी देत हउँ कि तू पचे निस्चय ही नस्ट कइ दीन्ह जाब्या।^{२०} यहोवा तोहरे बरे दूसर रास्टरन क नास करत अहइ। तू पचे भी ओनहीं रास्टरन क नाई बरबाद होइ जाब्या जेनका यहोवा तोहरे समन्वा नास करत अहइ। इ होइ काहेकि तू पचे यहोवा आपन परमेस्सर क आग्या क मान्या नाही।

यहोवा इस्राएल क मनइयन क साथ देइ

 ^१ 'धियान द्या, इस्राएल क मनइयो! आजु तू पचे यरदन नदी क पार करब्या। तू पचे उ देस मँ अपने स बड़का अउ सकतीवाला क दबाव डाइके हटावइ बरे जाब्या। ओनकइ सहर बड़वार अउ अकासे क छुअत ऊँची दीवार स किलेबन्द अहइ।^२ उ देस क मनई लम्बा अउ बरिआर अहइ। उ पचे अनाकी लोग अहइ। तू सबइ इ सबइ लोगन क बाबत जानत अहा। इ कहत भवा सुनेस,

'कउनो मनई अनाकी लोगन क मुकाबिला नाही कइ सकत ह।'^३ मुला तू पचे जान सकत ह कि यहोवा तोहार परमेस्सर भसम करइवाली आगी क नाई तोहरे आगे नदी क पार जात अहइ। यहोवा ओन रास्टरन क बरबाद कइ देइ। उ ओनका तोहरे समन्वा हराइ देइ। तू सबइ ओनँ क बाहर खदेर देब्या अउ हाली ही ओका बारबाद कइ देब्या जइसन ही यहोवा तोहका कहिहीं।

^४ 'यहोवा तोहार परमेस्सर जब ओन रास्टरन क दबाव डाइके तू पचन्स दूर हटाइ देइ। तउ अपने मने मँ इ न सोच्या कि, 'यहोवा हम लोगन्क इ देस मँ रहइ बरे, एह बरे लिआएस कि हम लोगन्क रहइ क तरीका ठीक अहइ।' यहोवा ओन रास्टरन क तू लोगन्स दूर दबाव डाइके काहे हटाएस? काहेकि उ पचे दुस्टपूर्ण तरीका स रहत रह्या।^५ तू सबइ ओनकइ देस कब्जा बरे जात अहा, मुला एह बरे नाही कि तू पचे नीक अहा अउ उचित तरीका स रहत अहा। यहोवा तोहार परमेस्सर उ रास्टरन क ओकर आपन दुस्टता क कारण तोहका हुवाँ जाई स पहिले ओका उ रास्टर स खदेर देब अउर तू ओकर देस पइ कब्जा कइ लेब्या काहेकि उ चाहत रहा कि जउन बचन उ तोहरे पुरखन इब्राहीम, इसहाक अउ याकूब क दिहस उ पूरा होइ।^६ यहोवा तोहार परमेस्सर उ बढिया देस क तू सबन्क रहइ बरे देत अहइ, मुला तू सबन्क इ जानइ चाही कि अइसा तोहरी जिन्नगी क ठीक तरीका क होइ क कारण नाही होत अहइ। सच्चाइ इहइ अहइ कि तू सबइ अड़ियल लोग अहा।

यहोवा क किरोध याद रखा

^७ 'याद रखा अउ इ जिन बिसरा कि तू पचे यहोवा आपन परमेस्सर क रेगिस्ताने मँ कोहाइ दिहा। तू सबइ उहइ दिना स जउने दिन स मिस्र स बाहेर निकइया अउर इ जगह पइ आवइ क दिन तलक यहोवा क हुकुम क मानइ स इन्कार कइ दिह्या ह।^८ तू पचे यहोवा क होरेब पहाड़े पइ भी कोहाइ दिह्या। यहोवा तू पचन्क बरबाद कइ देइ क हद तलक कोहाइ ग रहा।^९ मइ पाथरे क सिलन क लेइ बरे पहाड़े क ऊपर गएँ। जउन वाचा यहोवा तोहरे संग किहेस, ओन सिलन पइ तरासा भवा रहेन। मइ हुआँ पहाड़े पइ चालीस दिन अउ चालीस रात ठहरेँ। न तउ मइ रोटी खाएँ, अउर न ही पानी पिएँ।^{१०} तब यहोवा मोका दुई पाथर क सिलन दिहस। यहोवा ओन सिलन पइ खुद आपन अगुरियन स लिखेस ह, उ हर उ एक बात क लिखेस ह जेनका उ आगी मँ

स कहे रहा, जब तू पचे पहाड़ी क चारिहूँ कइती बटुरा रह्या।

११ “एह बरे, चालीस दिन अउ चालीस रात क आखीर मँ यहोवा मोका वाचा क दुइ टु पाथर क सिलन दिहस। १२ तब यहोवा मोसे कहेस, ‘उठा अउ जल्दी स हिआँ स खाले जा। जउन मनइयन क तू पचे मिस्र स बाहेर लिआया ह उ मनइयन खुद क पाछे ही बरबाद कइ लिहिस ह। उ पचे ओन बातन स पराइ ग अहई, जेनके बरे मई हुकुम दिहे अहउँ। उ पचे एक टु धातू क मूत्तिर् बनाइ लिहे अहई।’

१३ “यहोवा मोसे इ भी कहेस, ‘मई इ लोगन पइ आपन निगाह रखेउँ ह। उ पचे बहोतइ अडियल अहई।’ १४ मोका अकेला रहइ द्या। मई इ मनइयन क पूरी तरह बरबाद करइ क चाहत अहउँ। ताकि कउनो मनई ओनकइ नाउँ कबहुँ याद नाही करी। तब मई तू पचन्स रास्टर बनाउबउँ जउन ओनके रास्टर स बड़का अउ जियादा सक्तीवाला होइ।’

सोने क बछ्वा

१५ “तब मई मुड़ेउँ अउ पहाड़े स खाले आएउँ। पहाड़ आगी स बरत रहा। वाचा क दुइनउँ पाथर मोर दुइनउँ हाथे मँ रही। १६ जब मई नजर डालेउँ, तउ लखेउँ कि तू पचे यहोवा आपन परमेस्सर क खिलाफ पाप किहे रहा। तू पचे अपने बरे धातू एक टु बछ्वा बनाया ह। यहोवा जउन हुकुम दिहे अहई ओसे तू पचे दूर पराइ ग अहा। १७ एह बरे मई दुइनउँ सिलन क लिहेउँ अउ ओनका नीचे फैंकि दहेउँ। हुआँ तोहरी आँखियन क समन्वा सिलन क टूका होइ गएन। १८ तब मई यहोवा क समन्वा निहरेउँ अउ आपन चेहरा क जमीन पइ कइके चालीस दिन अउ चालीस रात वइसे ही बिताउँ। मई न तउ रोटी खाएउँ, अउ न ही पानी पिएउँ। मई इ एह बरे किहेउँ, कि तू पचे एतना बुरा पाप किह्या ह। तू पचे यहोवा बरे बुरा किहा अउर ओका कोहाइ दिह्या। १९ मई यहोवा क खउफनाक किरोध स डेराइ ग रहेउँ। उ तोहरे पचन्क खिलाफ एतना कोहाइ ग रहा कि तू पचन्क नास कइ देत। मुला यहोवा मोर बात फुन सुनेस। २० यहोवा हारून पइ बहोत कोहान रहा। उ काफी किरोधित रहा अउ ओका बरबाद करइ चाहत रहा। एह बरे उ समइ मई हारून बरे भी पराथना किहे रहा। २१ मई उ पापे स भरा भए तोहार बनवा सोना क बछ्वा क लिहेउँ अउ ओका आगी मँ बारि दिहेउँ। मई ओका नान्ह नान्ह टूकन मँ तोड़ेउँ अउ मई बछ्वा क टूकन क तब तलक कुचर दिहेउँ जब तलक उ सबइ

धूरि नाही बन गएन अउर तब मई उ धूरि क पहाड़े स खाले बहइवाली नदी मँ फेकेउँ।

मूसा परमेससर स छिमा माँगत ह

२२ “मस्सा, तबेरा अउ किब्रोत-हतावा पइ तू पचे फिन यहोवा क किरोधी कइ दिहा। २३ अउर जब यहोवा तू पचन्स कादेसबनेँ तजइ क कहेस तब तू पचे ओकरी आग्या क नाही मान्या। उ कहेस, ‘अगवा बढा अउ उ देस मँ रहा जेका मई तोहका पचन्क दिहेउँ ह।’ मुला तू पचे ओह पइ बिस्सास नाही किह्या। तू पचे ओकरे आदेस क अनसुनी किह्या। २४ पूरा समइ जबहिँ स मई तू पचन्क जानत हउँ तू लोगो यहोवा क आग्या क मानइ स इन्कार किहा ह।

२५ “एह बरे मई चालीस दिन अउ चालीस रात यहोवा क समन्वा निहुरा रहा। काहेकि यहोवा कहेस कि उ तू पचन्क नास करी देब्या। २६ मई यहोवा स पराथना किहेउँ। मई कहेउँ: ‘यहोवा, मोर सुआमी, आपन लोग, आपन मीरास क बरबाद जिन करा। तू आपन बड़की ताकत अउ सक्ती स ओनका अजाद किहा अउ मिस्र स लिआया। २७ तू आपन सेवकन इब्राहीम, इसहाक अउ याकूब क याद करा। कृपा कइके तू इ लोगन क हठीलापन क भूल जा। २८ अगर तू आपन लोगन क सजा देब्या तउ मिस्री कहि सकत ही, ‘यहोवा आपन लोगन क लइ जाइ मँ समर्थ नाही रहा, जेहमाँ लइ जाइ क बचन दिहे रहा। उ ओनसे घिना किहेस। एह बरे उ ओनका मारइ बरे रेगिस्तान मँ लइ गवा।’” २९ मुला उ सबइ तोहार लोगन अहई। यहोवा उ तोहार सम्बंधित अहई। तू आपन बड़की ताकत अउ मजबूती स ओनका मिस्र स बाहेर लिआया।’

नवा पाथर क सिलन

१ “ओह समइ, यहोवा मोसे कहेस, ‘तू पहिली सिलन क नाई पाथर फारिके दुइ सिला बनावा। तब तू पचे मोरे लगे पहाड़े पइ आवा। अपने बरे एक काठे क संदूख भी बनावा। २ मई पाथरे क सिलन पइ उ सबइ सव्द लिखब जउन पहिली सिलन पइ लिखे रहेन। तू पहिली सिलन क तोड़ी दिहेन। तब तू पचन्क इ नवी सिलन क सन्दूखे मँ रखइ चाही।’

३ “एह बरे मई बबूल क एक टु सन्दूख बनाएउँ। मई पहिली सिलन क तरह पाथर फारिके दुइ सिलन बनाएउँ। तब मई पहाड़े पइ गएउँ। मोरे हथवा मँ दुइ सिलन रहिन ४ अउर यहोवा ओनही

सबदन क लिखेस जेनका उ तब लिखे रहा जब दस हकुमन क उ आगी मँ स तू पचन्क दिहे रहा अउर तू पचे पहाड़े क चारिहूँ कइँती बटुरा रह्या। तब यहोवा पाथर क सिलन मोका दिहस।^५ मइँ घूमेउँ अउर पहाड़े क खाले आएउँ। मइँ आपन बनाए भए सन्दूखे मँ सिलन क रखेउँ। यहोवा मोका एन सिलन क ओहमाँ धरइ क आदेस दिहेस।”

६ (इस्राएल क लोग याकान क लोगन क कुआँ स मोसेरा क जात्रा किहेन। हुआँ हारुन मरा अउर दफनाव गवा। हारुन क पूत एलीआज़ार हारुन क जगह पइ याजक क रुप मँ सेवा सुरु किहस।^७ तब इस्राएल क लोग मोसेरा स गुदगोदा गएन अउर उ पचे गुदगोदा स नदियन क पहँटा योतबाता गएन।^८ ओह समइ यहोवा लेवी क परिवार समूह क आपन खास काम बरे दूसर परिवार समूहन स अलगाइ दिहस। ओनका यहोवा क करार क सन्दूखे क लइ जाइ क काम, यहोवा क समन्वा खड़ा होइके अउर ओकर सेवा करइ क काम रहा। उ यहोवा क नाउँ पइ उ पचे लोगन क आसीबाद देइ क काम भी करत रहेन। उ पचे अब भी इ खास काम करत हीं।^९ इहइ कारण अहइ कि लेवी बंस क मनइयन क भुइँया क कउनो हींसा दूसर परिवार समूहन क नाई नाहीं मिल पावा। लेवी बंसियन क हींसे मँ यहोवा पड़ा। यहोवा तोहार परमेस्सर ओकर संग इ वाचा किहेस।)

१० “मइँ पहाड़े पइ पहिली दाई क तरह चालीस दिन अउर चालीस रात रुका रह। यहोवा ओह समइ भी मोर बातन क सुनेस। यहोवा तू पचन्क नास न करइ क निहचय किहेस।^{११} यहोवा मोसे कहेस, ‘जा अउर मनइयन क जात्रा पइ लइ जा। उ पचे उ देस मँ जइही अउ ओहमाँ रइही जेका मइँ ओनके पुरखन क देइ क बचन दिहे अहउँ।’

यहोवा असलियत मँ का चाहत ह

१२ “इस्राएल क लोगो, अब सुना! यहोवा, तोहार परमेस्सर जउन चाहत ह उ इ बाटइ : उ चाहत ह कि तू ओकर सम्मान करा अउ ओकर रास्ता प रहा। उ चाहत ह परमेस्सर स पिरम अउर ओकर अराधना आपन पूरा हिरदइ अउर पूरा आतिमा स करा।^{१३} यहोवा क नेमन अउ आदेसन क पालन करा। मइँ इ सबइ आदेसन तोहका आपन भलाई बरे देत अहइँ।

१४ “हर एक चीज, यहोवा तोहरे परमेस्सर क अहइ। सरग, सबन त ऊँचा उहइ क अहइ। भुइयाँ अउ ओह पइ क सारी चिजियन यहोवा तोहरे परमेस्सर क अहइँ।^{१५} यहोवा तोहरे पुरखन स बहोत पिरम करत रहा। उ ओनसे एतना पिरम करत रहा कि ओनके सन्तान, तू पचन्क, उ आपन लोग बनाएस। उ कउनो दूसर रास्टर क जगह पइ तू पचन्क चुनेस अउ आजु भी तू पचे ओकर चुना भवा लोग अहा।

१६ “तू पचन क आपन हिरदय क खतना करइ चाही।^{१७} तू पचन्क अडियल होब तजि देइ चाही।^{१८} काहेकि यहोवा तोहार परमेस्सर अहइ। उ देवतन क परमेस्सर, अउ देवतन क यहोवा अहइ। उ महान परमेस्सर अहइ। उ अरज करइवाला अउ सक्तीवाला जोद्धा अहइ। यहोवा क निगाहे मँ सबहिं मनई बराबर अहइँ। यहोवा आपन इरादा बदलइ बरे धन नाहीं लेत।^{१९} उ अनाथ क अउ राँड़ क निआउ करत ह। उ हमरे देस मँ रहइवाला पूरवासी स पिरम करत ह। उ ओनका खइया क अउ ओदना देत ह।^{२०} एह बरे तू पचन्क भी इ अजनबियन स पिरम करइ चाही। काहेकि तू पचे खुद भी मिस्र मँ अजनबी रह्या।

२० “तोहका यहोवा आपन परमेस्सर क मान करइ चाही अउ सिरिफ उहइ क उपासना करइ चाही। ओका कबहूँ न तजा। जब तू पचे बचन द्या तउ सिरिफ ओकरे नाउँ क उपयोग करा।^{२१} तू पचन्क ओका बड़कई करइ चाही। उ तोहार परमेस्सर अहइ। उ तोहरे बरे महान अउ अचरजे स भरा भवा काम किहेस ह। इ सबइ कारजन क तू पचे आपन आँखिन स लख्या ह।^{२२} जब तोहार पुरखन मिस्र ग रहेन तउ सिरिफ सत्तर रहेन। अब यहोवा तोहार परमेस्सर तू पचन्क बहोतइ जियादा मनइयन क रुप मँ बढाइ दिहे अहइ जेतँना अकासे मँ तारा बाटेन।

यहोवा क सुमिरा

११ “एह बरे तू पचन्क आपन परमेस्सर यहोवा स पिआर करइ चाही। तू पचन्क उहइ करइ चाही जउन उ करइ बरे तू सबन्स कहत ह। तू पचन्क ओकरे नेमन, हुकुमन अउ आदेसन क हमेसा ही मानइ चाही।^२ याद रखा सिरिफ तोहार गदेलन उ एक नाहीं अहइ जेका उ लख्या ह अउर जउन यहोवा तोहार परमेस्सर बरे महान

१०:१६ तू पचन ... चाही इ प्रमाण अहइ कि तू परमेस्सर क अहइ। हम पचन्क आकर आदेसन क पालन करत ह।

काम करइ मैं तजुरवा राखत अहइ । उ सबइ तू लोग रह्या तोहरे सबन्क जउन उ लखेन अउर तू पचे लख्या ह कि यहोवा केतना महान, मजबूत अउ केतना सक्तीसाली अहइ । ३ तू पचे ओकरे चमत्कारन क लख्या ह । तू पचे उ सबइ लख्या ह जउन उ मिस्र क राजा फिरौन अउ ओकरे पूरे देस क संग किहस । ४ तू पचे मिस्र क फउज, ओनकइ घोड़न अउ रथन क संग यहोवा जउन किहस, लख्या ह । उ सबइ तू सबन्क पाछा करत रहेन, मुला तू पचे लख्या ह, यहोवा ओनका लालसागरे क जले मैं बोर दिहस । तू पचे लख्या ह कि यहोवा ओनका पूरी तरह बरबाद कइ दिहस । ५ तू पचे उ सबइ चिजियन क लख्या ह जउन यहोवा तोहार परमेस्सर उ रेगिस्तान मैं तू पचन्क इ जगह मैं आवइ तलक किहेस ह । ६ तू पचे लख्या ह कि यहोवा रूबेन क परिवार क एलिआब क दूइ पूतन दातान अउ अबीराम क संग का किहेस । इसुराएल क सबहिं मनइयन लख्या ह कि भुइया मुँहे क नाई खुलत भवा ह अउ ओन मनइयन, ओनके परिवारे, खेमन, सबहिं नउकरन अउ ओनकर सबहिं जनावरन क निगल लिहस । ७ तू पचे यहोवा क जरिये कीन्ह गएण महान कारनामा क लख्या ह ।

८ “एह बरे आजु जउन आदेस मई देत अहउँ, तू पचन क ओन सबन क जरूर मानइ चाही । तबहिं तू पचे सक्तीसाली बनब्या । अउर तू पचे नदी क पार करइ लायक बनब्या अउर उ देस पइ कब्जा करब्या जेहमाँ प्रवेस करइ बरे तू पचे तइयार अहा । ९ उ देस मैं तोहार उमिर लम्बी होई । इ उहइ देस अहइ जेका यहोवा तोहरे पुरखन स ओनके अउ ओनके सन्तानन क देइ क बचन दिहे रहा । इ देस मैं दूध अउर सहद बहत ह । १० जउन देस क तू पचे पउब्या उ मिस्र क नाई नाहीं अहइ जहाँ से तू पचे आया ह । मिस्र मैं तू पचे बिआ बोअत रह्या अउर पौधन क गोड़न क जरिये नहर स पानी निकाल कइ सबजियन क बगियन क नाई सींचत रहा । ११ मुला जउन पहुँटा तू पचे हाली ही पउब्या उ मैं पहाड़न अउ घाटियन अहइ । इ भुइया बरखा स पानी अकासे स पावत ह । १२ यहोवा तोहार परमेस्सर उ देस क देख-भला करत ह । यहोवा तोहार परमेस्सर बरिस क सुरू स आखिर तलक ओकर देख-भाल लगातार करत रहत ह ।

१३ “तू पचन्क जउन आदेसन मई आजु देत अहउँ, ओका तोहका होसियारी स जरूर सुनइ चाही । तू पचन क यहोवा तोहार परमेस्सर स

पिरेम अउ ओकर सेवा पूरा हिरदय अउ आतिमा स जरूर करइ चाही । अगर तू पचे अइसेन करब्या, १४ तउ मई ठीक समइ पइ तोहरी भुइया बरे बरखा पठउब । मई पतझर अउ बसन्त क समइ क भी बरखा दुआरा तोहका आसीर्बाद देब । तू पचे आपन अन्न, नवा दाखरस अउ तेल बटोरब्या । १५ अउर मई तोहरे खेतन मैं तोहरे पचन्क गोरुअन बरे घास जमाउब । तोहरे पचन्क भोजन बरे बहोत जिआदा होइ ।’

१६ “मुला होसियार रहा कि ललचाया नाहीं जा । दूसर देवतन क पूजा अउ सेवा करइ बरे जिन घूमा ।’ १७ अगर तू पचे अइसा करब्या तउ यहोवा तू पचन पइ बहोतइ कोहाइ जाइ । उ अकासे क बन्द कइ देइ अउ बरखा नाहीं होइ । भुइया स फसल नाहीं जमी अउर तू पचे उ नीक देस मैं हाली ही मरि जाब्या जेका यहोवा तू पचन्क देत अहइ ।

१८ “इ सब्दन क आपन दिमाग अउर हिरदइ मैं रखा । एँका आपन कमर अउ कपाल पइ यादगार क रूप मैं रखा । १९ एँन नेमन क सिच्छा आपन गदेलन क द्या । एँनके बारे मैं जउन तू आपन घरे मैं बइठा, जउन तू सड़किया पइ टहरत रहा, जउन तू लोटत रहा अउ जउन जागत भए रहा, बतावा करा । २० एँन आदेसन क आपन घरे क दुआरे क चौखट अउ फाटकन पइ लिखा । २१ तबहिं तू पचे अउ तोहार गदेलन उ देस मैं लम्बे समइ तलक रइहीं । इ उहइ भुइया अहइ जेका यहोवा तोहरे पुरखन क देइ क बचन दिहे रहा । तू पचे तब तलक रहब्या जब तलक धरती क ऊपर अकास रही ।

२२ “होसियार रहा कि तू पचे उ हर एक आदेस क मानत रहा जेका मानइ बरे मई तू पचन्स कहेउँ ह । आपन परमेस्सर यहोवा स पिरेम करा । ओकर बताए भए सबहिं राहे प चला । ओहसे लगा रहा । २३ यहोवा ओन सबहिं रास्ट्रन क ताकत लगाइके बाहर करब । तू पचे ओन रास्ट्रन स भुइया लेब्या जउन तोहसे पचन्स लम्बा अउ मजबूत अहइ । २४ उ सारा प्रदेस जेह पइ तू पचे चलब्या, उ तोहार होइ । तोहार देस दक्खिन मैं रेगिस्ताने स लइके लगातार उत्तर मैं लवानोन तलक होइ । इ पूरब मैं फरात नदी स लइके पस्चिमी सागर तलक होइ । २५ कउनो मनई तोहरे पचन्क खिलाफ टाड़ न होइ । यहोवा तोहार परमेस्सर ओन लोगन्क तू पचन्स डेरवाइ देइ जहाँ कहुँ तू पचे उ देस मैं जाब्या । इ उहइ जेकरे बरे यहोवा पहिले तोहका पचन्क बचन दिहे रहा ।

इस्राएलियन बरे चुनाव: आसीबांद या अभिसाप

२६ "आजु मई तू पचन्क आसीबांद या अभिसाप मँ स एक क चुनइ क बचन देत अहउँ। २७ तू सबइ बरदान पउब्या, अगर तू पचे यहोवा आपन परमेस्सर क आदेसन क पालन करब्या। मई आजु इ आदेसन क तोहका देत अहउँ। २८ मुला तू पचे ओह समइ अभिसाप पउब्या जब तू पचे यहोवा आपन परमेस्सर क आदेसन क मानइ स इन्कार करब्या। एँह बरे जउने राहे पइ चलइ क आदेस मई आजु तू पचन्क दइ देत अहउँ, ओहसे धूमब्या अउ ओन दूसर देवतन क पाछा करब्या जेनका तू पचे जानत्या नाहीं।

२९ "जब यहोवा तोहार परमेस्सर तू पचन्क उ देस मँ लावत ह जहाँ तू पचे रहब्या, तब तू पचन्क गरीज्जीम पहाड़े क चोटी पइ जाइ चाही अउ हुआँ स आसीबांदन क लोगन क सुनावइ चाही। तब तू पचन्क एवाल पहाड़े क चोटी पइ भी जाइ चाही अउ हुआँ स अभिसापन क लोगन क सुनावइ चाही। ३० इ सबइ यरदन नदी क दूसर कइती कनानी लोगन्क प्रदेश मँ अहइँ जउन यरदन घाटी मँ रहत हीं। इ सबइ पहाड़ गिलगाल सहर क निचके मोरे क बांज क वृच्छन क निअरे पच्छिम कइती अहइँ। ३१ तू पचे यरदन नदी क पार कइके जाब्या। तू पचे उ पहुँटा क लेब्या जेका यहोवा तोहार परमेस्सर तू पचन्क दइ देत अहइ। इ देस तोहार होइ। जब तू पचे इ देस मँ रहइ लगब्या तउ ३२ तोहका ओन सबहिं हुकुमन अउ नेमन क मानब होसियारी स करी चाही जेनका आजु मई तू पचन्क दइ देत अहउँ।

परमेस्सर क उपासना क ठउर

१२ "इ सबइ नेम अउर हुकुम अहइ जेका तोहका आपन नवा भुइया मँ होसियारी क साथ जरूर पालन करइ चाही। यहोवा तोहार पुरखन क परमेस्सर तोहका इ भुइया दइ दिहा ह जब तलक तू पचन्क इ धरती पइ रही तोहका आपन अधिकार मँ रखइ बरे दिहेस ह। २ तू पचे उ पहुँटा क ओन रास्टरन स लेब्या जउन अब हुआँ रहत अहइँ। तू पचन्क ओन सबहिं ठउरन क पूरी तरह नास कइ देइ चाही जहाँ इ सबइ रास्टर आपन देवतन क पूजत हीं। इ सबइ ठउर ऊँचे

पहाड़न, पहाड़ियन अउ सबइ हरिअर वृच्छन क खाले अहइँ। ३ तू पचन्क ओनकर वेदियन क बरबाद करइ चाही अउ ओनके स्मृति पाथरन क टूका-टूका कइ देइ चाही। तू पचन्क ओनके पवित्तर खम्भन क बार देइ चाही। ओनके देवतन क मूरतियन क काट ड़ावइ चाही अउ ओनकर नाउँ हुआँ स मेट देइ चाही।

४ "मुला तू पचन्क यहोवा आपन परमेस्सर क उपासना उ तरह नाहीं करइ चाही जउने तरह उ सबइ लोग आपन देवतन क पूजन हीं। ५ यहोवा तोहार परमेस्सर तोहरे परिवार समूह स खास ठउर चुनब। उ हुआँ आपन नाउँ क थापना करी। अउ हुआँ निवास करी तू पचन्क ओकर उपासना करइ बरे उ ठउर प जाइ चाही। ६ हुआँ तू पचन्क आपन होमबलि, आपन सबइ बली, दसवाँ हीसा, आपन खास भेंट, यहोवा क बचन दीन्ह गइ भेंट, आपन क इच्छा स भेंट अउर झुण्ड अउ रेवइ क पहिला पइदा भवा बचन क लियावइ चाही। ७ तू अउर तोहार परिवार हुआँ यहोवा तोहार परमेस्सर क मौजूदगी मँ भोजन करिहीं। जउने अच्छी चिजियन बरे तू पचे काम किह्या ह आपन परमेस्सर क कारन स तू आनन्द पाउब्या। काहेकि यहोवा तोहार परमेस्सर तोहका आसीबांद दिहेस ह।

८ "उ उहइ तरह उपासना करत नाहीं रहइ चाही जउने तरह हम उपासना करत आवत अही। अबहिं तलक हम मँ स हर एक जइसा चाहे परमेस्सर क उपासना करत रहा। ९ काहे अबहिं तलक हम उ सान्त देस मँ नाहीं पहुँचे रहेन जेका यहोवा तोहार परमेस्सर तू पचन्क देत अहइ। १० मुला तू पचे यरदन नदी क पार करब्या अउ उ देस मँ रहब्या जेका यहोवा तोहार परमेस्सर तू पचन्क देत अहइ। हुआँ यहोवा तू पचन्क सबहिं दुस्मनन स चैन स रहइ देइ अउ तू सुरच्छित रहब्या। ११ तब यहोवा आपन बरे खास ठउर चुनी उ हुआँ आपन नाउँ क थापना करी अउर तू पचे ओन सबहिं चीजनक हुआँ लइ अउब्या जेनके बरे मई आदेस देत हउँ। हुआँ तू पचे आपन क सबइ होम बलियन, आपन बलियन, दसवाँ हीसा, आपन इच्छा क भेंट, आपन खास भेंट, अउ आपन क स्वतंत्र इच्छा क भेंट, जउन तू यहोवा क देइ क बचन दिहेस ह। १२ उ ठउरे पइ तू पचे आपन सबहिं लोग, आपन बेटवन अउ बेटियन,

१२:११ दसवाँ हीसा मनई क लाभ क दसवाँ हीसा परमेस्सर क उपहार क रूप मँ दइ जात रहा। कबहुँ इ सबइ दोस्तन अउर पड़ोसियन क बीच मेल बाले क रूप मँ बाँट लइ जात रहा, कबहुँ इ विधावा अउ अनाथ क जात रहा, अउर कबहुँ इ मन्दिर क जात रहा।

मरद अउ मेहरारु नउकरन, अउर आपन सहर मँ बसइया सबहिं लेवीबंसियन क संग बटुर जा। (इ सबइ लेवीबंसी आपन बरे भुइया क कउनो हीसान पइहीं।) यहोवा आपन परमेस्सर क मौजूदगी मँ हुआँ आनंद मनावा।^{१३} होसियारी बरता कि तू पचे आपन होम बलियन क जहाँ लखा हुआँ जिन चढ़ावा।^{१४} तोहरे परिवार समूहे मँ स कउनो एक क इलाका मँ यहोवा आपन खास ठउर चुनी। हुआँ आपन होमबलि चढ़ावा अउ तू पचन्क बतावा गवा सबहिं आदेसन क हुअँइ करा।

^{१४} “जउने कउने जगह तू पचे रहा तू कउनो जनावर क मारिके खाइ सकत ह। तू हरिण या नील गाय क साथ ठीक वइसा ही करा। तू पचे ओतना माँस खाइ सकत ह जेतना तू चाहा, जेतना यहोवा तोहार परमेस्सर तू पचन्क देइ। कउनो भी मनई इ गोस क खाइ सकत ह, चाहे उ पवितर होइ या अपवितर होइ।^{१६} मुला तू पचन्क रकत नाहीं खाइ चाही। तू पचन्क खून क पानी क तरह जमीन प बहाइ देइ चाही।

^{१७} “कछ्छु अइसी चिजियन अहइँ जेनका तू पचन्क ओन ठउरन पइ नाहीं खाइ चाही जहाँ तू पचे रहत अहा। इ सबइ अहइँ: आपन अनाज क, दाखरस क, अउ तेल क दसवाँ हीसा। तोहार भेइ अउ गोरुअन क पहिला पइदा भवा बच्चा, परमेस्सर क वचन दीन्ह गइ भेंट, कउनो आपन इच्छा भेंट या कउनो भी परमेस्सर क दूसर भेंट।^{१८} तू पचन्क ओन भेंटन क सिरिफ यहोवा तोहार परमेस्सर क मौजूदगी मँ खाइ चाही यानी यहोवा तोहार परमेस्सर जउने ठउरे क चुनइ। तू पचन्क हुअँइ जाइ चाही अउर आपन पूतन, बिटियन, सबहिं मरद अउ मेहरारु नउकरन अउर तोहरे सहरन मँ बसइयन लेवी बंसियन क संग मिलिके खाइ चाही। यहोवा आपन परमेस्सर क मौजूदगी मँ आनन्द मनावा। जउने चिजियन बरे काम किहा ह ओनकर आनन्द ल्या।^{१९} धियान रखा कि इ भोजनन क लेवी बंसियन क संग बाँटिके खा। इ तब तलक करा जब तलक आपन देस मँ रहा।

^{२०-२१} “यहोवा तोहार परमेस्सर इ बचन दिहे अहइ कि उ तोहरे देस क सीमा क अउर बढ़ाई। जब यहोवा अइसा करी तउ उ ओकरे चुने भए खास निवास स दूर रहि सकत ह अउर तोहरे पचन्क गोस क भूख अहइ तउ तू पचे कउनो भी तरह क गोस क, जउन तोहरे लगे अहइ खाइ सकत ह। तू पचे यहोवा क दीन्ह झुण्ड अउ समूह मँ स कउनो भी जनावर क मारि सकत ह। इ वइसे ही करा

जइसा करइ क हुकुम मई दिहे अहउँ। इ गोस, तू पचे जबहिं चाहा जहाँ भी रह्या, खाइ सकत ह।^{२२} तू पचे इ गोस क वइसे ही खाइ सकत ह जइसे नीलगाय अउर हिरन क गोस खात ह। कउनो भी मनई इ कइ सकत ह चाहे उ सबइ पवितर होई या अपवितर।^{२३} मुला निहचय ही खून जिन खा। काहेकि खून मँ जिन्नगी अहइ अउर तू पचन्क उ गोस नाहीं खाइ चाही जेहमाँ अबहिं जिन्नगी होइ।^{२४} खून जिन खा। तू पचन्क खून क पानी क नाई भुइया पइ डाइ देइ चाही।^{२५} तू पचन्क उ सब कछ्छु करइ चाही जेका परमेस्सर उचित समझत ह। एह बरे खून जिन खा। तब तोहार अउ तोहरे सन्तानन क भला होइ।

^{२६} “कउनो भी तरह तोहका आपन पवितर बलिदान क अउर वचन क उपहारन क उ जगह पइ लावइ चाही जेका यहोवा चुनी।^{२७} तू पचन्क आपन होमबलि हुआँइ चढ़ावइ चाही। आपन होमबलि क गोस अउ रकत यहोवा आपन परमेस्सर क वेदी पइ चढ़ावा। रकत क बाहर निकाला। तब तू पचे गोस खाइ सकत ह।^{२८} जउन आदेस मई देत अहउँ ओनका मानइ मँ होसियार रहा। जब तू पचे उ सब कछ्छु करत अहा जउन यहोवा तोहार परमेस्सर बाटइ अउ ठीक अउ अच्छा अहइ, तब हर चीज तोहरे बरे अउ तोहरे सन्ताने बरे भविस्य मँ सदा भला रही।

^{२९} “जब यहोवा तोहार परमेस्सर उ रास्ट्रन क बरबाद करब्या अउ तो ओकर भुइया पइ कब्जा करब्या। तू पचे हुआँ जाब्या अउ ओनसे भुइया लेब्या। तू पचे ओनकइ भुइया पइ रहब्या।^{३०} किन्तु ओकर पाछे होसियार रहा काहेकि उ तोहार समन्वा बरबाद भवा। ओकरे कैद मँ जिन फँसा जेहसा उ देवतन क पूजा करत अहइ। इ सीखइ क कोसिस न करा कि उ सबइ आपन देवतन क पूजा कइसे करत हीं। उ सबइ जइसे पूजा करत ही वइसेन पूजा करइ क बारे मँ जिन सोचा।^{३१} तू पचे यहोवा आपन परमेस्सर क वइसेन उपासना नाहीं करब्या जइसे उ पचे आपन देवतन क करत हीं। काहेकि उ पचे आपन पूजा मँ सब किसिम क बुरी चीजन करत हीं जेनसे यहोवा घिना करत ह। उ पचे आपन देवतन क बलि बरे आपन गदेलन क भी बार देत हीं।

^{३२} “तू पचन्क ओन सबहिं काम क करइ बरे होसियार रहइ चाही जेनके बरे मई आदेस देत हउँ। जउन मई तू पचन्स कहत हउँ ओहमाँ न तउ कछ्छु जोरा, न ही ओहमाँ स कछ्छु कमती करा।

झूठे नबियन

१३ "कउनो नबी या सपन क फले क जानइवाला तोहरे लगे आइ सकत ह। उ ई कहि सकत ह कि उ कछू दैवी चीन्हा या अचरजवाला काम देखाइ। २ उ दैवी चीन्हा या अचरजवाला काम, जेकरे बारे मैं उ तू पचन्क बताएस ह, उ सही होइ सकत ह। तब उ तू पचन्स कहि सकत ह कि तू पचे दूसर देवतन क माना (जेनका तू पचे नाही जानत अहा।) उ तू पचन्स कहि सकत ह, 'आवा हम ओन देवतन क सेवा करी।' ३ उ नबी या सपन काल क बातन क जिन सुना। काहेकि यहोवा तोहार परमेस्सर तोहार परीच्छा लेत अहइ। उ इ जानइ चाहत ह कि तू पचे पूरे हिरदय अउ आतिमा स पिरेम करत अहा कि नाही। ४ तू पचन्क यहोवा आपन परमेस्सर क अनुसरण करइ चाही। तू पचन्क ओकर सम्मान करइ चाही। यहोवा क आदेसन क माना अउर उ करा जउन उ कहत ह। यहोवा क सेवा करा अउ ओका कबहुँ जिन तजा। ५ उ नबी या सपन फले क जानइवाला मार दीन्ह जाइ चाही। काहेकि उ ही न तू पचन्स यहोवा तोहरे परमेस्सर क रास्तन स भटकत ह। यहोवा तू पचन्क मिस्र स बाहेर लिआवा। यहोवा तू पचन्क हुआँ क दासता क जिन्नगी स अजाद किहेस। उ ही अहइ जउन तोहका रोकइ क कोसिस करत अहइ कि तू पचे यहोवा आपन आदेस क मुताबिक जिन्नगी जिन बितावा। एह बरे आपन लोगन स बुरा मानुस क जरूर बरबाद करइ चाही।

६ "तोहार आपन भाइ, बेट्वा, बिटिया, तोहार पियारी मेहरारु या तोहार पियारा दोस्त छुपाइ के कहि सकत है, 'आवा चली, दूसर देवतन क सेवा करी।' (इ सबई वइसेन देवतन अहइ जेनका तू पचे अउ तोहार पुरखन कबहुँ नाही जानेन। ७ उ सबइ ओन लोगन क देवता अहइ जउन तोहरे चारिहुँ कइती दूसर देसन मैं रहत हीं, कछू निचके अउ कछू दूर।) ८ तू पचन्क उ मनई क संग राजी नाही होइ चाही। ओकर बात जिन सुना। ओह पइ दया न देखावा। ओका आज्ञादी स जिन जाइ द्या। ओकर रच्छा जिन करा। ९-१० तू पचन्क ओका मारि डावइ चाही। पाथर उठावइ वालन मैं स तू पचन्क पहिला होइ चाही अउर ओका मारइ चाही। तब सबहि मनइयन क ओका मारि देइ क बरे ओह पइ पाथर लोकावइ चाही। काहेकि उ मनई तू पचन्क यहोवा तोहरे परमेस्सर स दूर हटावइ क

कोसिस किहस। यहोवा सिरिफ एक अहइ जउन तोहे सबन्क मिस्र स लिआवा, जहाँ तू पचे दास रह्या। ११ तब इस्राएल क सबहि लोग सुनिहीं अउ डेराइ जइहीं अउर उ सबइ तोहरे पचन्क बीच अउर जियादा इ तरह क बुरा काम फुरइ स करिहीं।

१२ "यहोवा तोहार परमेस्सर तू पचन्क रहइ बरे सहरन दिहे अहइ। कबहुँ-कबहुँ तू पचे सहरन मैं स कउनो क बारे मैं बुरी खबर सुन सकत ह। तू सबइ सुनि सकत ह कि १३ तोहारे पचन्क आपन रास्टर मैं ही कछू बुरे लोग आपन सहर क लोगन्क बुरी बातन बरे तइयार करत अहइ। उ पचे आपन सहर क लोगन स कहि सकत हीं, 'आवा चली, दूसर देवतन क सेवा करी।' (इ सबइ अइसे देवता होइहीं जेनका तू पचे पहिले नाही जान्या ह।) १४ तब तोहका सबइ चिजियन क पूरी तरह निरिच्छन करइ चाही। अगर तू पावत ह कि इ सही अहइ, तउ तू साबित कइ सकत ह कि सचमुच अइसा भयंकर बात भइ, १५ तब तू पचन्क उ सहर क लोगन्क निहचय ही स जरूर मारिइ चाही। उ सहर अउ ओकर सबइ चिजियन क, गिरुअन सहित बरबाद करइ चाही। १६ तब तू पचन्क सबहि कीमती चीजन्क बटोरइ चाही अउर ओका सहर क बीच लइ जाइ चाही अउर सब चिजियन क सहर क संग बारि देइ चाही। इ तोहरे परमेस्स यहोवा बरे होमबलि होइ। सहर क सदा बरे राख क ढेर होइ जाइ चाही। इ कबहुँ दोबारा नाही बनावा जाइ चाही। १७ एह बरे तू पचन्क कउनो चीज आपन बरे नाही राखइ चाही। अगर तू पचे इ हुकुम क मानत अहा तउ यहोवा तू पचन्पइ कोहाइ स रोकि देइ। यहोवा तोहे पचन्पइ दया करी अउ तरस खाइ। उ तोहरे पचन्क रास्टर क वइसा बड़का बनाइ जइसा उ तोहरे पुरखन क बचन दिहे रहा। १८ इ तब होइ जब तू पचे यहोवा आपन परमेस्सर क बात सुनब्या यानी अगर तू पचे ओन हुकुमन क मनब्या जेनका मइँ तू पचन्क आजु दइ दत अहउँ। अउर तू पचन्क उहइ करइ चाही जेका यहोवा तोहार परमेस्सर उचित बतावत ह।

इस्राएली, यहोवा क खास लोग

१४ "तू पचे यहोवा आपन परमेस्सर क गदेलन अहा। अगर कउनो मरइ तउ तू पचन्क आपन दुखे मैं पड़ा भवा देखावइ बरे खुद क नाही काटइ चाही। तु पचन्क आपन मूँडे क अगवा क हीसा क बार नाही कटवावइ चाही।

**२ काहेकि तू पचे यहोवा आपन परमेस्वर क खास लोग अहा। उ संसार क सब मनइयन मँ स, तू पचन्क आपन खास लोगन्क रूप मँ चुना ह।

इस्राएलियन क भोजन जेका
खाइ क अनुमति रही

३ “अइसी कउनो चीज जिन खा, यहोवा जेहसे घिना करत ह। ४ तू पचे एँन जनावरन क खाइ सकत ह: गाय, भेड़, बोकरी, ५ हिरन, नीलगाय, मृग, जंगली भेड़, जंगली बोकरी, चीतल अउ पहाड़ी भेड़। ६ तू पचे अइसे कउनो भी जनावरे क खाइ सकत ह जेकर खुर दुइ हीसा मँ बँटा होई अउर जउन जुगाली करत होई। ७ उ सबइ जनावर जउन जुगाली करत हीं या जेकर खुर दुई भाग मँ फाट भवा नाहीं होतेन तू पचन क सिरिफ एका नाहीं खाई चाही। ऊँट चट्टानी बिच्छु अउर खरहा क जिन खावा। इ सबइ जनावर जुगाली करत हीं किन्तु एकर खुर फटा भवा नाहीं होतेन। एह बरे इ तू पचन्क बरे असुद्ध अहई। ८ तू पचन्क सुअर नाहीं खाइ चाही। ओनकइ खुर फाट होत हीं, मुला उ सबइ जुगाली नाहीं करतेन। एह बरे सुअर तोहरे बरे असुद्ध अहइ। सुअर क कउनो गोस जिन खा अउर न हीं मरे भए सुअर क छुआ।

९ “तू पचे अइसी मछरी खाइ सकत ह जेकरे पर अउ सेहरा होई। १० मुला अइसी मछरी क न खा जेकरे पर अउ सेहरा दुइनाउँ न होई। इ सबइ तोहरे बरे असुद्ध भोजन अहई।

११ “तू पचे कउनो सुद्ध चिरई क खाइ सकत ह। १२ मुला इ चिरइयन मँ स कउनो क जिन खा गरुड़, गीद्ध, बुज्जद, १३ लाल चील, बाझ, कउनो तरह क चील, १४ कउनो तरह क काला कौआ १५ सुतुरमुर्ग, उल्लू, घुघू, कउनो तरह क बहोर, १६ नान्ह उल्लू बड़वार उल्लू, उज्जर उल्लू, १७ रेगिस्तानी उल्लू, मच्छरी क सिकार करइवाला बड़ा पंछी, जल कौआ, १८ चमरघेंच, कउनो तरह क बगुला, नौवा या चमगादड़।

१९ “पंखवाला किरउनन तोहरे बरे असुद्ध भोजन अहई। तू पचन्क ओनका नाहीं खाइ चाही। २० मुला तू पचे कउनो सुद्ध चिरइया क खाइ सकत ह।

२१ “खुद मरे भएन जनावरन क जिन खा। तू पचे मरे भए जनावरन क तोहार बीच रहइवाला कउनो प्रावासी क दइ सकत ह या ओका कउनो बिदेसी

क हाथे बेंच सकत ह। मुला तू यहोवा तोहार परमेस्वर क खास लोग अहा।

“बोकरी क बच्चा क ओकरी महतारी क दूधे मँ जिन पकावा।

मंदिर क दीन्ह जाइवाला दसवँ हीसा

२२ “तू पचन्क हर बरिस आपन खेतन मँ उगी भइ फसिल क दसवँ हीसा निहचय ही बचावइ चाही। २३ तब तू पचन्क उ ठउर पइ जाइ चाही जेका यहोवा आपन नाउँ बरे चुनत ह। हुआँ यहोवा आपन परमेस्वर क मौजूदगी मँ आपन फसिल क दसवँ हीसा, अनाजे क तोहरे नवा दाखरस, तोहार तेल क दसवाँ हीसा, झण्ड अउ समूह मँ पइदा पहिला बच्चा, खाइ चाही। तब तू पचे यहोवा आपन परमेस्वर क जीवन भर डर करब सिखब्या। २४ मुला उ ठउर एँतना दूर होइ सकत ह कि तू पचे हुआँ तलक क जात्रा नाहीं कइ सकत ह। इ होइ सकत ह कि यहोवा जउन फसिल क बरदान दिहे अहइ ओकर दसवाँ हीसा तू पचे हुआँ न पहाँचाइ सका। अगर अइसा होत ह तउ इ करा: २५ आपन फसिल क उ हीसा बेचँ द्या। तब उ धने क लइके यहोवा तोहार परमेस्वर क जरिये चुने भएन खास ठउरे पइ जा। २६ उ धने क उपयोग जउन कछू तू पचे चहा ओकरे बेसहइ मँ करा। गाय, भेड़ी, दाखरस या दूसर उबला भवा पेय या कउनो दूसर चीज जउन तू पचे चाहत अहा। तब तू पचन्क तोहरे परिवार क संग खइया खाइ चाही अउर यहोवा आपन परमेस्वर क मौजूदगी मँ हुआँ उ ठउरे पइ आनन्द मनावइ चाही। २७ मुला आपन सहर मँ बसइया लेवी बंसी लोगन क जिन बिसिरा काहेकि ओनके लगे तोहरी तरह भुइँया क हीसा नाहीं अहइ।

२८ “हर तीन बरिस क आखीर मँ आपन उ बरिस क पइदा भवा फसिल क दसवँ हीसा बटोरब्या। इ भोजन क आपन सहर मँ रखा। २९ इ भोजन लेवी बंसी लोगन क बरे अहइ, काहेकि ओनके लगे आपन कउनो भुइँया नाहीं अहइ। इ भोजन तोहरे सहर मँ ओन लोगन बरे अहइ जेनका एकर जरूरत अहइ जइसे तोहार बीच रहइवाला पूरवासी, अनाथ अउर राँड मेहररुअन उ पचे खाब्या अउ संतुट्ट होब्या। अगर तू पचे इ करत अहा तउ यहोवा तोहार परमेस्वर सबहिँ काम तू पचे जउन कछू करब्या ओकरे बरे आसीबाद देइ।

**१४:१ बार नाहीं कटवाइ चाही जइसा मूसा क समइ मँ कउनो क मरे पइ दु:ख परगट करइ बरे आपन बार क कटवाइ लेत रहन या आपन मूँडे क बार छोलवाइ लेत रहन।

कर्ज क खत्म करइ क खास त्योंहार

१५

१ "हर सात बरिस क आखीर मँ, तू पचन्क कर्ज खतम कइ देइ चाही। २ कर्ज क तू पचन्क इ तरह खत्म करइ चाही: हर एक मनई जउन कउनो इस्राएलियन क कर्ज दिहे अहइ आपन कर्ज खत्म कइ दे। ओका आपन भाई (इस्राएली) स कर्ज अदा करइ क नाही कहइ चाही। काहेकि यहोवा कहेस ह कि उ बरिस कर्ज खत्म कइ दीन्ह जात हैं। ३ तू पचे बिदेसी स आपन कर्ज वापस लइ सकत ह। मुला उ कर्ज क खत्म कइ देब्या जउन कउनो दूसर इस्राएली पइ अहइ। ४ मुला तोहरे पचन्क बीच कउनो गरीब मनई नाही रहइ चाही। काहेकि यहोवा तोहार पचन्क परमेस्सर तू पचन्क उ भुइया क बरदान देइ। जेका तू कब्जा करिहीं। ५ इहइ होइ, अगर तू पचे यहोवा आपन परमेस्सर क बातन क पूरी तरह मानब्या। तू पचन्क उ हर एक कानूनन क मानइ मँ सावधान रहइ चाही जेका मई तू पचन्क दिहे हउँ। ६ यहोवा तोहार परमेस्सर तू पचन्क आसीबाद देइ, जइसा कि उ बचन दिहे अहइ अउर तोहरे पचे बहोत स रास्टरन क कर्ज देइ बरे काफी धन होइ। मुला तू पचन्क कउनो स कर्ज लेइ क जरूरत नाही होइ। तू पचे बहोत स रास्टरन पइ सासन करब्या। मुला ओन रास्टरन मँ स कउनो रास्टर तोह पइ सासन नाही करब्या।

७ "जब तू पचे ओह देसे मँ रहब्या जेका यहोवा तोहार पचन्क परमेस्सर तू पचन्क देत अहइ तब तोहरे लोगन मँ स एक गरीब होइ सकत ह। तू पचन्क स्वार्थी नाही होइ चाही। तू पचन्क उ गरीब मनई क मदद देइ स इन्कार नाही करइ चाही। ८ तू पचन्क ओका हाथ बटावइ क इच्छा रखइ चाही। तू पचन्क उ मनई क जेतने कर्ज क जरूरत होइ, तोहका प्रचूरता स देइ चाही।

९ "कउनो क मदद देइ स एह बरे इन्कार जिन करा, काहेकि कर्ज क सतवाँ बरिस निजके अहइ। इ तरह क बुरा विचार अपने मन मँ जिन आवइ द्या। तू पचन्क उ मनई क बरे बुरा विचार नाही रखइ चाही जेका मदद क जरूरत बाटइ। तू पचन्क ओकर मदद करइ स इन्कार नाही करइ चाही। अगर तू पचे उ गरीब मनई क कछू नाही देत्या तउ उ यहोवा स तोहरे खिलाफ सिकाइत करी अउर यहोवा तू पचन्क पाप क उत्तरदायी पाइ।

१० "गरीब क तू पचे प्रचूरता स द्या अउर ओका देइ क बुरा न माना। काहेकि यहोवा तोहार परमेस्सर इ नीक काम बरे तू पचन्क आसीस देइ।

उ तोहरे पचन्क सबहिं काम अउर जउन कछू तू पचे करब्या ओहमाँ तोहार मदद करी। ११ देस मँ सदा गरीब लोग भी होइहीं। इहइ कारण अहइ कि मई तू पचन्क आदेस देत अहउँ कि तू पचे आपन लोगन, जउन लोग तोहरे देस मँ गरीब अउर सहायता चाहत हीं, ओनका सहायता देइ बरे तइयार रहा।

सतएँ बरिस मँ दासन क अजाद करइ क नेम

१२ "अगर तोहरे लोगन मँ स कउनो, हिब्रू मेहरारू या मनसैधू, तोहरे हाथे बेचा जाइ तउ उ मनई क तोहार सेवा छ: बरिस करइ चाही। तब सतएँ बरिस तू पचन्क ओका आपन स अजाद कइ देइ चाही। १३ मुला जब तू पचे आपन दास क अजाद करा तउ ओसे बगैर कछू लिए भए जिन जाइ द्या। १४ तू पचन्क दास क आपन झुण्ड स, अनाज स, अउ आपन दाखरस स, प्रचूरता स देइ चाही। यहोवा तोहार परमेस्सर तू पचन्क बहोतइ नीक चीजन क पाए पइ आसीबाद दिहेस ह। उहइ तरह तू पचन्क भी आपन दास क बहोत सारी चीजन क देइ चाही। १५ तू पचन्क याद रखइ चाही कि तू पचे मिसर मँ दास रह्या। यहोवा तोहार परमेस्सर तोहका पचन्क अजाद किहेस ह। इहइ कारण अहइ कि मई तू पचन्स आजु इ करइ क कहत हउँ।

१६ "मुला तोहरे दासन मँ स कउनो कहि सकत ह, 'मई आप क नहीं तजब।' उ अइसा एह बरे कहि सकत ह कि उ तू पचन्स, तोहरे परिवारे स पिरम करत ह अउर उ तोहरे संग बढ़िया जिन्नगी बिताएस ह। १७ इ सेवक क आपन दुआरे स कान लगावइ द्या अउर एक टु सूए क उपयोग ओकरे काने मँ छेद करइ बरे करा। तब उ सदा बरे तोहार दास होइ जाइ। तू पचे दासियन बरे भी इहइ करा जउन तोहरे हिआँ रहइ चाहत ह।

१५ "तू सबइ आपन दास क अजाद करत समइ दु:खे क अनुभव जिन करा। याद रखा, उ छ: बरिस तलक तोहार सेवा, सामान्य मजदूर क दुई गुणा सेवा करइ कइ किहेस ह। यहोवा तोहार परमेस्सर तू पचे जउन करब्या ओकरे बरे असीस देइ।

पहिला पइदा भवा जनावर क वाबत नेम

११ "तू पचे आपन झुण्ड अउ समूह मँ सबइ पहिला पइदा भवा जनावरन क यहोवा तोहार परमेस्सर क खास जनावर बनाइ द्या। ओनमाँ स कउनो बर्धन क उपयोग आपन काम बरे जिन करा। इ भेड़न मँ स कउनो क ऊन जिन काटा। २० हर

साल तोहका गोरुअन क झण्ड मँ पहिला पइदा भवा जनावर क बच्चा क उ ठउरे पइ लइ आवइ चाही जेका यहोवा चुनइ। हुआँ तू पचे अउ तोहरे परिवारे क लोगन क यहोवा तोहार परमेस्सर क मौजूदगी मँ ओन जनावरन क खइहीं।

२१ “मुला अगर जनावरन मँ कउनो दोख होइ, या लंगड़ा, आँधर होइ या एहमाँ कउनो दोख होइ, तउ तू पचन्क ओका यहोवा आपन परमेस्सर क भेंट नाही चढ़ावइ चाही। २२ मुला तू पचे ओकर गोस आपन सहरन मँ खाइ सकत ह। एँका कउनो मनई खाइ सकत ह, चाहे उ सुद्ध होइ चाहे असुद्ध। नीलगाय या हिरन क गोस खाइ पइ इहइ नेम लागू करा जउन इ गोस पइ लागू होत ह। २३ मुला तू पचन्क जनावरन क रकत नाही खाइ चाही। तू पचन्क खून क पानी क तरह भुइँया पइ बहाइ देइ चाही।

फसह क त्यौहार

१६ १ “यहोवा आपन परमेस्सर क फसह क त्यौहार आबीब क महीना मँ मनावा। काहेकि आबीब क महीना मँ तोहार परमेस्सर तू पचन्क रात मँ मिस्र स बाहेर लिआवा रहा। २ तू पचन्क उ ठउरे पइ जाइ चाही जेका यहोवा आपन नाउँ क हुआँ रखइ बरे चुनब्या। हुआँ तू पचन्क यहोवा क सम्मान मँ फसह भेंट मँ भेँइ अउ गोरु चढ़ावइ चाही। ३ इ भेंट क संग खमीर वाली रोटी जिन खा। तू पचन्क सात दिना तलक बेखमीरे क रोटी खाइ चाही। इ रोटी क ‘विपत्तियन क रोटी’ कहत हीं। सुमिर ल्या कि केतनी हाली हाली तू पचन्क मिस्र तजि देइ क पड़ा। तू पचन्क उ देस स आपन प्रस्थान क तब तलक सुमिरइ चाही जब तलक तू पचे जिअत रहा। ४ सात दिना तलक देस मँ कउनो क घरे मँ कहूँ खमीर नाही होइ चाही। फसह भेंट जउन गोस क पहिले दिन क साँझ क भेंट मँ चढ़ावा ओका भिन्सार होइ क पहिले खाइ लेइ चाही।

५ “तू पचन्क फसह क जनावरन क बलि ओन सहरन मँ स कउनो मँ नाही चढ़ावइ चाही जेनका यहोवा तोहार परमेस्सर तू पचन्क दिहे अहइ। ६ तू पचन्क फसह क त्यौहार क जनावर क बलि सिरिफ उ ठउरे पइ चढ़ावइ चाही जेका यहोवा तोहार परमेस्सर आपन बरे खास निवास क रूप मँ चुनइ। हुआँ तू पचे फसह क त्यौहार क जनावर क जब सूरज बूँडइ तब साँझ क बलि चढ़ावइ चाही। तू पचे एका बरिस क उहइ समइ मँ करब्या जउन समइ तू पचे मिस्र स बाहेर निकरा रह्या। ७ अउर

तू पचन्क फसह क त्यौहार क गोस यहोवा तोहार परमेस्सर जउने ठउर क चुनी हुआँइ पकउब्या अउर खाब्या। तब भिन्सारे तू पचन्क आपन खेमन मँ चला जाइ चाही। ८ तू पचन्क बेखमीरी क रोटी छुः दिना तलक खाइ चाही। सतएँ दिन तू पचन्क कउनो भी काम नाही करइ चाही। उ दिन यहोवा आपन परमेस्सर बरे खास सभा मँ भी सबहिँ एकट्ठा होइहीं।

हफ्तन क त्यौहार (पिन्तेकुस्त)

१ “जब तू पचे दोबारा फसल काटब सुरु करा तबहिँ स तू पचन्क सात हफता गनइ चाही। २ तब यहोवा आपन परमेस्सर बरे हफ्तन क त्यौहार करा। एँका एक स्वच्छ बलि ओका लिआइके करा। तू पचन्क केतना देब अहइ, एकर निहचय इ बिचारिके करा कि यहोवा तोहार परमेस्सर केतना तू पचन्क आसीबाद दिहे अहइ। ३ उ ठउरे पइ जा जेका यहोवा आपन नाउँ स हुवाँ बसइ बरे चुनी। हुआँ तू पचे अउर तोहार लोग, यहोवा आपन परमेस्सर क मौजूदगी मँ आनन्द क समइ बितइहीं। आपन सबहिँ लोगन, आपन पूतन, आपन बिटियन अउर आपन सबहिँ मनसेधू अउ मेहरारू दासन क हुआँ लइ जा अउर आपन सहर मँ बसइयन लेवी लेवीबंसियन, प्रवासियन, अनाथन अउर राँड मेहररुअन क भी संग लइ जा। ४ सुमिरा कि तू पचे मिस्र मँ दास रह्या। तू पचन्क निहचय करइ चाही कि तू पचे इ नेमन क मनब्या।

खेमन क त्यौहार

१३ “जब तू पचे आपन खरिहान स फसिल अउ दाखरससाला स दाखरस बटोर लेब्या तब कुटीर क त्यौहार सात दिना तलक मनवा। १४ तू पचे, तोहार पूतन, तोहार बिटियन, तोहार सबहिँ मरद अउ मेहरारू दासन, तोहरे सहर मँ बसइयन लेवीबंसियन, प्रवासियन, अनाथ अउ राँड मेहररुअन सबइ इ दावत मँ आनन्द मानवइ। १५ तू पचन्क इ दावत क सात दिना तलक उ खास ठउरे पइ मनावइ चाही जेका यहोवा चुनी। इ तू पचे यहोवा आपन परमेस्सर क सम्मान मँ करा। आनन्द मनावा! काहेकि यहोवा तोहार परमेस्सर तू पचन्क तोहरी फसिल बरे अउर तू पचे जउन कछु भी किहा ह ओकरे बरे आसीस दिहस ह।

१६ “तोहार पचन्क सबहिँ मनइयन बरिस मँ तीन दाई यहोवा आपन परमेस्सर स मिलइ बरे उ खास ठउरे पइ अइहीं जेका उ चुनी। इ बे खमीरे क रोटी क त्यौहार क समइ, हफ्तन क त्यौहार क

समझ अउ कटीर क त्यौहार क समझ होइ । कउनो मनई क बिना भेंट लइ यहोवा स नाही मिलइ जाइ चाहीं ।^{१७} हर एक मनई ओतना देइ जेतना उ दइ सकी । केतना देव अहइ, ओकर निहचय उ इ सोचिके करी कि ओका यहोवा केतना दिहे अहइ ।

लोगन बरे निआवधीस अउ अफसर

१८ “यहोवा तोहार परमेस्सर जउन सहरन क तू पचन्क दइ देत अहइ ओनमाँ स हर एक सहर माँ तू पचन्क आपन परिवार समूह बरे निआव क निआवाधीस अउ अफसर बनवइ चाही । इ निआव क निआवाधीसन अउर अफसरन क जनता क संग सही अउ ठीक निआव करइ चाही ।^{१९} तू पचन्क ठीक निआव क बदलइ नाही चाही । तू पचन्क पच्छपाती नाही हाई चाही । तू पचन्क कउनो क सम्बन्ध माँ आपन इरादा क बदल देइ बरे धन नाही लेइ चाही । धन बुद्धिमान मनइयन क आँधर करत ह । इ सच्चा मनई क सब्दन क बदल देतह ।^{२०} तू पचन्क हर समझ बिना पच्छ लिए अउ निआवा स ठीक होइ क पूरी कोसिस करइ चाही । तब तू पचे जिअत रहब्या अउर तू पचे उ देस क पउब्या जेका यहोवा तोहार परमेस्सर तू पचन्क दइ देत अहइ अउर तू पचे ओहमाँ रहब्या ।

परमेस्सर मूरतियन स घिना करत ह

२१ “आसेर देवी क सम्मान बरे उ वेदी बगल माँ काठ क खम्भन जिन लगावा जेका तू पचे यहोवा आपन परमेस्सर बरे बनाउब्या ।^{२२} अउर तू पचन्क खास पाथर लबार देवतन क पूजा बरे नाही खड़ा करइ चाही । यहोवा तोहार परमेस्सर एनसे घिना करत ह ।

बलियन बरे गोरु निदोख होइ चाही

१७ “तू पचन्क यहोवा आपन परमेस्सर क कउनो एक अइसी गाय या भेड़, बलि माँ नाही चढ़ावइ चाही जेहमाँ कउनो दोख या कमी होइ । काहेकि यहोवा तोहार पचन्क परमेस्सर एहसे घिना करत ह ।

मूरति क पुजवइया क सजा

२ “तू पचे ओन सहरन माँ स कउनो बुरी बात होइ क सूचना पाइ सकत ह जेनका यहोवा परमेस्सर तू पचन्क देत अहइ । तू पचे इ सुनि सकत ह^३ कि तू पचन माँ स कउनो मेहरारु या मनसेधू यहोवा क खिलाफ पाप किहस ह । तू पचे इ सुनि सकत ह कि उ पचे यहोवा स करार तोड़ैत ह यानी उ पचे

दूसर देवतन क पूजा किहेन ह । या इ होइ सकत ह कि उ पचे सूरज, चन्द्रमा या तारन क पूजा किहे होई । इ यहोवा क आदेस क खिलाफ अहइ जेका मई तोहे सबन्क दिहे अहउँ ।^४ अगर तू पचे अइसी बुरी खबर सुनत ह तउ तू सबन्क ओकर जाँच होसियारी स करइ चाही । तू पचन्क इ जान लेइ चाही कि का इ फुरइ अहइ कि इ खौफनाक काम इस्राएल माँ होइ चुका अहइ । अगर तू पचे एँका साबित कइ सकत ह कि इ फुरइ अहइ,^५ तब तू पचन्क उ मनसेधू या मेहरारु क जरूर सजा देइ चाही जउन इ बुरा काम किहे अहइ । तू पचन्क उ मनसेधू या मेहरारु क सहर क दुआरे क लगे लइ जाइ चाही अउर ओका पाथरन स मारि डावइ चाही ।^६ मुला अगर एक ही गवाह इ कहत ह कि उ बुरा काम किहस ह तउ ओका मउत क सजा नाही दीन्ह जाइ । अगर दुइ या तीन गवाह इ कहत हीं कि इ फुरइ अहइ तउ उ मनई क फाँसी पइ चढ़ाइ देइ चाही ।^७ गवाह क पहिला पाथर उ मनई क मारि डावइ बरे लोकावइ चाही । तबहि दूसर लोगन क ओकर मउत पूरी करइ बरे पाथरन क लोकावइ चाही । इ तरह तू पचन्क उ बुराई क आपन बीच स दूर करइ चाही ।

जटिल मुकदमा

८ “कबहुँ अइसी समस्या आइ सकत ह कि जउन तोहरे अदालत बरे फइसला देइ माँ एतना कठिन होइ कि फइसला ही न देइ सकई । इ दूसर तरह खून-खराबा क मुकदमा, कउनो प्रकार क आकामण, कउनो दावा क पूरा होवइ सकत ह । जब इ मुकदमन पइ तोहरे सहरन माँ बहस होत ह तउ तोहार निआव क जज होइ सकत ह, फइसला न कइ सकई कि ठीक का अहइ? तब तू पचन्क उ खास ठउरे पइ जाइ चाही जेका यहोवा तोहार परमेस्सर क जरिये चुना ग होइ ।^९ तू पचन्क लेवी परिवार समूह क याजकन अउ उ समझ क निआव क जज क लगे जाइ चाही । तउ मुकदमा क ओनका देइ चाही । अउर उ मुकदमन क फइसला प्रस्तुत करब्या ।^{१०} यहोवा क खास ठउरे पइ उ पचे आपन फइसला तू पचन्क सुनइहीं । जउन भी उ पचे कहई ओका तू पचन्क करइ चाही । तू पचन्क ओनकर फइसला स्वीकारइ चाही अउर ओनकर निर्देस क ठीक ठीक मानइ चाही ।^{११} तोहका ओकर निर्देसन अउ फइसलन क सही-सही मानइ चाही । तू पचन्क ओनसे अलग कछु भी नाही करइ चाही जउन उ सबइ तू पचन्क करइ क कहत हीं ।

१२ “तू पचन्क यहोवा आपन परमेस्सर क सेवा क करइया उ समइ क याजक अउ निआव क निआधीसन क आग्या मानइ स इन्कार करइवाला क जउन अभिमान पूर्वक कार्य करइ, सजा देइ चाही। उ मनई क मरइ चाही। इही प्रकार तू इस्राएल स बुराई क हटाउव्या।^{१३} सबहि लोग इ सजा क बारे में सुनिहीं अउर अहंकारी कार्य करइ बरे डेरइहीं।

राजा कइसे चुनई

१४ “तू पचे उ प्रदेश में जाव्या जेका यहोवा तोहार परमेस्सर तू पचन्क दइ देत अहइ। तू पचे उ देस पइ कब्जा करव्या अउर ओहमाँ रहव्या। तब तू पचे कहव्या, ‘हम लोग अपने ऊपर एक ठु राजा वइसेन ही रखब जइसेन हमरे चारिहुँ कइँती क रास्टरन में अहइ।’^{१५} जब अइसा होइ तब तू पचन्क इ पक्का निहचय होइ चाही कि तू पचे ओका ही राजा चुन्या ह जेका यहोवा तोहार परमेस्सर चुनत ह। तोहार राजा तू पचन्क आपन लोगन में स होइ चाही। तू पचन्क बिदेसियन क आपन राजा नाही बनावइ चाही।^{१६} राजा क बहोत जियादा घोड़न क अपने बरे नाही रखइ चाही अउर ओका लोगन क जियादा घोड़न क लियावइ बरे मिस्र नाही पठवइ चाही। काहेकि तू पचन्क यहोवा कहेस ह, ‘तू पचन्क उ राहे पइ कबहुँ नाही लउटव अहइ।’^{१७} राजा क बहोत पत्नियन क भी नाही रखइ चाही। काहेकि इ काम ओका यहोवा स दूर हटाइ अउर राजा क सोना, चाँदी स आपन क मालामाल नाही बनावइ चाही।

१५ “जब राजा हुकूमत सुरु करइ लागइ, तउ ओका एक किताबे में आपन बरे नेमन क नकल कइ लेइ चाही। ओका याजकन अउ लेवी बंसियन क समन्वा नकल कइ चाही।^{१६} राजा क उ किताबे क आपन संग रखइ चाही। ओका उ किताबे क जिन्नगी भइ पढ़इ चाही। काहेकि तब राजा यहोवा आपन परमेस्सर क सम्मान करब सीखी अउर उ नेम क हुकुमन क पूरा पालन करइ सीखी।^{१७} तब राजा इ न सोची कि उ आपन लोगन में कउनो स भी जियादा नीक बाटइ। उ नेम क खिलाफ न जाइ बल्कि ठीक तरह स मानी। तब उ राजा अउर ओकर संतानन इस्राएल क राज्ज पइ लम्बा समइ तलक हुकूमत करी।

याजकन अउ लेवी बंसियन क मदद

१८ “लेवी परिवार समूह क याजकन क इस्राएल में कउनो भुइँया क हीसा नाही

पाइ। उ पचे आपन जीवन यापन उ भेंट क खाइके करिहीं जउन आगी पइ पाकी अउ यहोवा क चढ़ाई जाइ। उ ओकरे मीरास क हीसा अहइ।^२ उ सबइ याजक लोग भुइँया क कउनो हीसा दूसर परिवार समूहन क तरह नाही पइहीं। लेवी बंसियन क हीसा में खुद यहोवा अहइ। यहोवा एँकरे बरे ओनका बचन दिहे अहइ।

३ “जब तू पचे कउनो बर्धा, या भेड़ी बलि बरे मारा तउ तू पचन्क इ सबइ हिस्सन दइ देइ चाही : कांधा, दुइनउ गाल अउर पेट।^४ तू पचन्क याजकन क आपन पहली फसल क अनाज, नई दाखरस अउर आपन नई फसल क तेल देइ चाही। तू पचन्क याजकन क अपनी भेड़ी क पहिला काटा ऊन देइ चाही।^५ काहेकि यहोवा तोहार परमेस्सर तोहरे सबहि परिवारे समूहन स ओनका सदा यहोवा बरे खड़ा होइ अउर सेवा करइ बरे चुनेस ह।

६ “लेवी बंसी जउन समूचइ इस्राएल में तोहरे सहरन में स कउनो में रहत ह, कउनो समइ में आपन घर तजि सकत ह अउर यहोवा क खास ठउर पइ जाइ सकत ह।^७ तब इ लेवी बंसी यहोवा आपन परमेस्सर क नाउँ पइ सेवा कइ सकत ह। ओका परमेस्सर क खास ठउर में वइसेन ही सेवा करइ चाही जइसे ओकर भाई दूसर लेवी बंसी करत हीं।^८ उ लेवी बंसी, आपन अधिकार क मिलइवाला हीसा क अलावा दूसर लेवी बंसियन क संग बराबर क हीसादार होइ।

इस्राएलियन क दूसर रास्टरन क नकल नाही करइ चाही

९ “जब तू पचे उ भुइँया में घुसव्या, जउन यहोवा तोहार पचन्क परमेस्सर तू पचन्क दइ देत अहइ, तब उ रास्ट्रे क लोग जउन खउफनाक काम हुआँ करत होइँ ओनका जिन सीखा।^{१०} आपन बेटवन अउ बिटियन क बलि आपन वेदी पइ आगी में जिन द्या। कउनो जोतिसी स बात कइके या कउनो जादूगर, डाइन या बाजीगर क लगे जाइके इ जिन सीखा कि भविस्स में का होइ ?^{११} कउनो भी मनई क जादू-टोना चलावइ क कोसिस न करइ द्या अउर तू पचन में स कउनो मनई ओझा या भूतसिद्धक नाही बनी। अउर कउनो मनई कउनो अइसे मनई स बात करइ क कोसिस न करी जउन मर चुका होइ।^{१२} यहोवा तोहार परमेस्सर ओन लोगन स घिना करत ह जउन अइसा करत हीं। इहइ कारण अहइ कि उ तोहरे समन्वा इ लोगन्क देस तजि

देइ क मजबूर करी।^{१३} तोहे सबन्क यहोवा तोहार परमेस्सर पइ पूरा निस्टावान जरूर होइ चाही।

यहोवा क खास नबी

१४ “तू पचन्क उ रास्ट्रन क लोगन्क बल क जरिये आपन देस स हटाइ देइ चाहीं। उ रास्ट्रन क लोग जोतिसियन अउर जादूगरन क बात मानत हीं। मुला यहोवा तोहार परमेस्सर तू पचन्क वइसा नाहीं करइ देइ।^{१४} यहोवा तोहार परमेस्सर तोहारे लगे आपन नबी पठई। इ नबी तोहारे आपन लोगन मँ स आइ। उ मोरी नाई होइ। तू पचन्क इ नबी क बात मानइ चाही।^{१५} यहोवा तोहारे लगे इ नबी क पठइ काहेकि तू पचे अइसा करइ क बरे ओहसे कहया ह। उ समइ जब तू पचे होरेब पहाड़े क चारिहुँ कइँती बटुरा रह्या, तू पचे यहोवा क अवाज अउ पहाड़े पइ खउफनाक आगी क लखिके डेरान रह्या। एह बरे तू पचे कहे रह्या, ‘हम पचे यहोवा आपन परमेस्सर क अवाज फुनि न सुनी। हम लोग उ खउफनाक आगी क फुनि न लखी। हम मरि जाव।’

१६ “यहोवा मोसे कहेस, ‘उ पचे जउन चाहत हीं, उ ठीक बाटइ।^{१६} मइँ तोहरी नाई क एक ठु नबी ओनके बरे पठइ देब। इ नबी ओन लोगन मँ स कउनो एक होइ। मइँ ओकर मुख मँ आपन बात डालब। उ लोगन स उहइ कही जउन मोर हुकुम मानी।^{१७} इ नबी मोरे नाउँ पइ बोली अउर जब उ कछू कही तब अगर कउनो मनई मोरे हुकुमन क सुनइ स इन्कार करी, तउ मइँ खुद उ मनई क जिम्मेदार होब।’

लबार नबियन क कइसे पहिचाना जाइ ?

२० “मुला कउनो नबी कछू अइसा कहि सकत ह जेका करइ क बरे मइँ ओसे नाहीं कहेउँ ह अउर उ लोगन स कहि सकत ह कि उ मोरे जगह पइ बोलत अहइ। अगर अइसा होत ह तउ उ नबी क मारि डावइ चाही या कउनो अइसा नबी होइ सकत ह जउन दूसर देवतन क नाउँ पइ बोलत ह। उ नबी क भी मारि डावइ चाही।^{२१} तू पचे सोच सकत ह, ‘हम कइसे पहिचान सकित ह कि नबी क कहब, यहोवा क नाहीं अहइ?’^{२२} अगर कउनो नबी कहत ह कि उ यहोवा कइँती स कछू कहत बाटइ, मुला ओकर कहब फुर साबित नाहीं होत, तउ तू पचन्क पहिचान लेइ चाही कि यहोवा

वइसा नाहीं कहेस। तू पचे समुझ जाब्या कि इ नबी अभिमान पूर्वक बात करत रहा। तू पचन्क ओसे डेराइ क जरूरत नाहीं।

सुरच्छा बरे तीन ठु सहर

१ “यहोवा तोहार परमेस्सर तू पचन्क उ देस देत अहइ जउन दूसर रास्ट्रन क अहइ। यहोवा ओन रास्ट्रन क बरबाद करी। तू पचे हुआँ रहब्या जहाँ उ सबइ लोग रहत हीं। तू पचे ओनकइ सहरन अउर धरन क लइ लेब्या। जब अइसा होइ,^{२-३} तब तू पचन्क भुइँया क तीन हींसा मँ बाँटइ चाही। तब तू पचन्क हर एक हींसा मँ सबहिँ लोगन्क निअरे परइवाला सहर उ छेत्तर मँ चुनइ चाही अउर तू पचन्क उ सहरन तलक सडकन बनावइ चाही तब कउनो भी मनई जउन कउनो दूसर मनई क मारत ह हुआँ पराइके जाइ सकत ह।

४ “जउन मनई कउनो क मारत ह उ सुरच्छा बरे इ तीन सहरन मँ स कउनो मँ भी पराइके पहुँच सकत ह। उ सुरच्छा पा सकत ह। जदि उ बिना इरादा क साथ कउनो मनई क मारि डावइ अउर उ ओसे पहिले स घिना नाहीं करत रहेन।^५ एक ठु उदाहरण बा : कउनो मनई कउनो मनई क संग जंगल मँ लकड़ी काटइ जात ह। ओनमाँ स एक मनई लकड़ी काटइ बरे कुल्हरी क एक ठु बृच्छ पइ चलावत ह, मुला कुल्हरी हाथे स छूट जात ह। कुल्हरी क धार दूसर मनई पइ लग जात ह अउर ओका मार डावत ह। उ मनई जउन कुल्हरी चलाएस, ओन नगरन मँ पराइ सकत ह अउर आपन क सुरच्छित कइ सकत ह।^६ मुला अगर सहर बहोत दूर होइ, तउ उ आवस्यकतानुसार तेज नाहीं पराइ सकी। मारा भवा मनई क कउनो नजदीक क रिस्तेदार^७ ओकर पाछा कइ सकत ह अउर सहर मँ ओकरे पहुँचइ स पहिले ही ओका धरि सकत ह। रिस्तेदार आपन कियोध मँ उ मनई क कतल कइ सकत ह। मुला उ मनई क मउत क सजा उचित नाहीं अहइ। उ उ मनई स पहिले घिना नाहीं करत रहा जेका उ मारेस ह।^८ एह बरे मइँ आदेस देत हउँ कि तीन खास सहरन क चुना।^९ “यहोवा तोहार परमेस्सर तोहरे पुरखन क इ बचन दिहस कि मइँ तू पचन्क चउहट्टी क विस्तार करब। उ तू लोगन क सारा देस देइ जेका देइ क बचन उ तोहरे पुरखन क दिहस।^{१०} उ इ करी, अगर

१११:६ मारा भवा ... रिस्तेदार सब्द क अरथ “खून क बदला लेइवाला”। जब कउनो मनई मारा जात रहा तब ओकरे निचके क रिस्तेदारन क इ कर्तव्य होत रहा कि उ मारइवाला मनई क उ पचे सजा देई।

तू ओन नेमन क पालन पूरी तरह करब्या जेनका मई तू पचन्क आजु दइ देत हउं यानी अगर तू पचे यहोवा आपन परमेस्सर स पिरेम करब्या अउर ओकरे राहे पइ चलत रहब्या। अगर यहोवा तोहरे देस क बड़ावत ह तउ तू पचन्क तीन दूसर नगर सुरच्छा बरे चुनइ चाही। उ सबइ सुरच्छा बरे पहिले तीन सहरन क इलावा होइ चाही।^{१०} तबहिं निर्दोष लोग उ देस मँ नाहीं मारा जइहीं जेका यहोवा तोहार परमेस्सर तू पचन्क आपन बनावइ बरे देत बाटइ अउर तू पचे कउनो भी मउत बरे अपराधी नाहीं होब्या।

^{११} “किन्तु एक मनई कउनो मनई स घिना कइ सकत ह। उ मनई क मारइ बरे इन्तजार मँ लुका रहि सकत ह जेहसे उ घिना करत ह। उ उ मनई प हमला कइ सकत ह अउ ओका पीटइ अउर मारि सकत ह। ओकर पाछे सुरच्छा बरे चुने इ सहरन मँ पहुँच सकत ह।^{१२} अगर अइसा होत ह, तउ उ मनई क सहर क मुखिया क, कउनो क ओका धरइ क अउर सुरच्छत क सहर स ओका बाहेर लिआवइ बरे पठइ चाहीं। सहर क मुखिया ओका मरे भए क नजिक क रिस्तेदारे क दइ चाहीं। हत्तियारा जरूर मारा जाइ चाही।^{१३} ओकरे बरे तू पचन्क दुःखी नाहीं होइ चाही। तू पचन्क निर्दोष मनई क मारइ क अपराध क इस्राएल स हटावइ चाही। तब इ तोहरे बरे नीक रही।

जायदाद क चीन्हा

^{१४} “तू पचन्क पड़ोसी क जायदाद क चीन्हा क नाहीं हटावइ चाही। उ चउहदी उ समइ मँ स्थापित कीन्ह जात रहा जउन तू उ भुइया मँ कब्जा कीन्ह रहा। यहोवा तोहार परमेस्सर तू पचन्क रहइ बरे देइ अउर जउन तोहार होई।

गवाह

^{१५} “अगर कउनो मनई कछु अन्याय या पाप क दोखी ठहरावइ जात ह जेका अपराध उ किहेस ह, तउ एक गवाह एक साबित करइ बरे काफी नाहीं होइ कि उ दोखी अहइ। उ सिद्ध करइ बरे दुइ या तीन गवाह जरूर होइ चाही।

^{१६} “कउनो झुठी गवाह कउनो मनई प झुठी मत क अपराध ठहरइ सकत ह।^{१७} अगर अइसा होत ह तउ तहतुक करइवाले दुइनउं मनई क यहोवा क मौजूदगी मँ खड़ा होइ चाही अउर ओनके मोकदमन क फइसला याजकन अउ उ समइ क मुख्य निआवाधीसन क जरिये होइ चाही।^{१८} निआवाधीसन क होसियारी स पूछ-ताछ करइ

चाही। उ पचे पता लगाइ सकत हीं कि गवाह दूसर मनई क खिलाफ झूठ बोलेस ह। अगर गवाह झूठ बोलेस ह तउ,^{१९} तू पचन्क ओका सजा देइ चाही। तू पचन्क ओका उहइ हानि पहुँचावइ चाही जउन उ दूसर मनई क पहुँचावइ चाहत रहा। इ तरह तू पचे आपन बीच स कउनो भी बुरी बात निकारिके बाहेर कइ सकत ह।^{२०} दूसर सबहिं लोग एका सुनिहीं अउर डेराइ जइहीं, अउर तोहमँ स कउनो भी फुन वइसी बुरी बात नाहीं करी।

^{२१} “तू पचे ओह पइ दया-दृस्टि जिन कर्या जेका बुराई बरे तू पचे ओका सजा देत अहा। जिन्नगी बरे जिन्नगी, आँखी बरे आँखी, दाँत बरे दाँत, हाथ बरे हाथ अउर गोड़वा बरे गोड़ लीन्ह जाइ चाही।

जुद्ध बरे नेम

^{२०} ^१ “जब तू पचे आपन दुस्मनन क खिलाफ जुद्ध मँ जा, अउर आपन फउज स जियादा घोड़न, रथ, मनइयन क लखा, तउ तू पचन्क डेराइ नाहीं चाही। काहेकि यहोवा तोहार परमेस्सर तोहरे संग अहइ अउर उहइ एक अहइ जउन तू पचन्क मिस्र स बाहेर निकारि लिआवा।

^२ “जब तू पचे जुद्ध क निचके आवा, तब याजक क लोगन क लगे जाइ चाही अउर ओनसे बात करइ चाही।^३ याजक कही, ‘इस्राएल क लोगो, मोरी बात सुना। आजु तू लोग आपन दुस्मनन क खिलाफ जुद्ध मँ जात अहा। आपन हिम्मत जिन तजा। जिन डरा। आतंकित जिन ह्वा। दुस्मनन स जिन डेराअ!’^४ काहेकि यहोवा तोहार परमेस्सर दुस्मनन क खिलाफ लड़इ बरे तोहरे संग जात अहइ। यहोवा तोहार परमेस्सर तोहार रच्छा करी।

^५ “उ पचे अफसरन फउजियन स इ कइहीं, ‘का हिआँ कउनो अइसा मनई अहइ जउन नवा घर बनाइ लिहे अहइ, मुला अब तलक ओका अर्पण नाहीं किहे अहइ? उ मनई क आपन घरे लउट जाइ चाही। उ जुद्ध मँ मारा जाइ सकत ह अउर तब दूसर मनई ओकरे घरे क अर्पित करी।^६ का कउनो मनई हिआँ अइसा अहइ जउन अंगूरे क बगिया लगाए अहइ, मुला अबहिं तलक ओसे कउनो अंगूर नाहीं पाएस ह? उ मनई क घर लउटि जाइ चाही। अगर उ मनई जुद्ध मँ मारा जात ह तउ दूसर मनई ओकरे बगिया क फले क भोग करी।^७ का हिआँ कउनो अइसा मनई अहइ जेकरे बियाहे क क बात पक्की होइ चुकी अहइ। मुला उ लड़की क नाहीं बियाहेस ह? उ मनई क घरे लउटि जाइ चाही। अगर उ जुद्ध मँ मारा जात ह तउ दूसर

मनई उ मेहरारु स बियाह करी जेकरे संग ओकरे बियाहे क बात पक्की होइ चुकी बाटइ ।

८ “अफसरन क लोगन स इ पूछइ चाही, ‘का हिआँ कउनो अइसा मनई अहइ जउन हिम्मत हरि चुका अहइ अउर डेरान अहइ। ओका घर लउटि जाइ चाही। तब उ दूसर फउजियन क हिम्मत हार जाइ मै सहायक न होइ।’ ९ जब अफसर फउजियन स बात करब खतम कइ लेइ तब उ पचे लोगन क अगवाइ बरे सैनिक क सेनापतियन चुनई।

१० “जब तू पचे सहर पइ हमला करइ जा तउ हुआँ क लोगन क समन्वा सान्ति क प्रस्ताव रखा। ११ अगर उ पचे तोहार प्रस्ताव अंगिकार कइ लेत हीं अउर आपन फाटक खोलि देत हीं तब उ सहर मै बसइयन सब लोग तोहार दास होइ जइहीं अउर तोहार काम करइ बरे मजबूर कीन्ह जइहीं। १२ मुला अगर सहर सान्ति प्रस्ताव अंगिकार करइ स इन्कार करत ह अउर तू सबन्स लइत ह तउ तू सबन्क सहर घेरि लेइ चाही। १३ अउर जब यहोवा तोहार परमेस्सर सहर पइ तोहार कब्जा करावत ह तब तू पचन्क सबहिं मनसेधुअन क मारि डावइ चाही। १४ तू पचे आपन बरे मेहररुअन, गदेलन, गोरुअन अउर सहर क कउनो भी चीज लइ सकत ह। तू पचे इ सबइ चीजनक बइपर सकत ह। यहोवा तोहार परमेस्सर इ सबइ चीजन तू पचन्क दिहे अहइ। १५ जउन सहर तोहरे प्रदेश मै नाहीं अहइ अउर बहोत दूर अहई, ओन सबन्क संग तू पचे अइस बेउहार करव्या।

१६ “मुला जब तू पचे उ सहर उ प्रदेश मै लेत ह जेका यहोवा तोहार परमेस्सर तू पचन्क दइ देत अहइ तब तू पचन्क हर एक क मारि डावइ चाही। १७ तू पचन्क हिती, एमोरी कनानी, परिज्जी, हिब्बी अउर यबूसी सबहिं लोगन्क पूरी तरह बरबाद कइ देइ चाही। यहोवा तोहार परमेस्सर, इ करइ क तू पचन्क आदेस दिहे अहइ। १८ एह बरे तब उ पचे तू सबन्क यहोवा तोहारे परमेस्सर क खिलाफ घृणित कार्य क सिच्छा तू पचन्क नाहीं दइ सकत जउन उ पचे आपन देवतन क पूजा क समइ करत हीं।

१९ “जब तू पचे कउनो सहर क खिलाफ जुद्ध करत रहव्या तउ तू पचे लम्बा समइ तलक ओकर घेरा डाए रहि सकत ह। तू पचन्क सहर क चारिहुँ कइती क फलदार वृच्छन क नाहीं काटइ चाही। तू पचन्क एनसे फल खाइ चाही मुला काटिके भहरावइ नाहीं चाही। इ सबइ वृच्छ दुस्मन नाहीं

अहई। एह बरे ओनके खिलाफ जुद्ध जिन लइ। २० मुला ओन वृच्छन क काटि सकत ह जेनका तू पचे जानत अहा कि इ सबइ फलदार नाहीं अहइ। तू पचे एनकइ उपयोग उ सहर क खिलाफ घेराबंदी मै कइ सकत ह, जब तलक ओकर पतन न होइ जाइ।”

अगर कउनो मनई मरा भवा पावा जाइ

२१ १ “उ देस मै जेका यहोवा तोहार परमेस्सर तू पचन्क रहइ बरे देत अहइ, कउनो मनई मइदान मै हत्तिया कीन्ह भवा लास पाइ जाइ सकत ह। मुला कउनो क इ पता नाहीं चल सकत कि ओका कउन मारेस। २ तब तोहार पचन्क मुखियन अउर निआवाधीसन मारे भए मनई क चारिहुँ कइती स सहरन क दूरी क नाप-जोख करइ चाही। ३ जब तू पचे इ जानि जाब कि मरे भए मनई क सबन त निचके क कउन सा सहर अहइ। तब उ सहर क मुखियन आपन झुण्डन मै स एक गइया लेइहीं। जेकर उपयोग कबहुँ भी कउनो कामे मै न कीन्ह गवा होइ। या उ प कबहुँ जुआ न रखा गवा ह। ४ उ सहर क मुखियन उ गइया क बहता भवा पानीवाली घाटी मै लइहीं। इ अइसी घाटी होइ चाही जेका कबहुँ जोता न गवा होइ अउर न ओहमाँ पेड़-पौधा रोपा गवा होई। तब मुखियन क उ घाटी मै हुअँइ उ गइया क गर्दन तोड़ देइ चाही। ५ लेवी बंसी याजकन क हुआँ जाइ चाही। (यहोवा तोहार परमेस्सर इ याजकन क आपन सेवा बरे अउर आपन नाउँ पइ आसीर्वाद देइ बरे चुनेस ह। याजक सबहिं वाद-विवाद अउ नोस्कान क मुकद्दमा क निहचय करिहीं।) ६ मारे भए मनई क सबन त निचके क सहर क सबई मुखियन आपन हाथन क उ गइया क ऊपर धरिहीं जेकर गर्दन घाटी मै तोड़ दीन्ह गवा रहा। ७ इ सबइ मुखिया स जरूर कइहीं, ‘हम इ मनई क नाहीं मारा अउर हम पचे एकर मारा जाब नाहीं देखा। ८ यहोवा, इस्राएल क लोगन क छिमा कर, जेनकइ तू उद्धार किहा ह। आपन लोगन मै स कउनो निर्दोख मनई क दोखी न ठहरावइ द्या।’ तब उ पचे कतल बरे दोखी नाहीं ठहरावा जइहीं। ९ इ सबइ मामलन मै उ करब ही तोहरे पचन्क बरे नीक अहइ। अइसा कइके तू पचे कउनो निर्दोख क हत्या करइके दोखी नाहीं रहव्या।

जुद्ध मै मिली मेहररुअन

१० “तू पचे आपन दुस्मनन स जुद्ध करउव्या अउर यहोवा तोहार पचन्क परमेस्सर ओनका तू

पचन्स हरवाइ देइ। तब तू पचे दुस्मनन क बन्दी क रूप में लिअउब्या।^{११} अउर तू पचे जुद्ध में बन्दी कउनो सुन्नर मेहरारु क लख सकत ह। तू पचे ओका पाउब चाह सकत ह अउर आपन मेहरारु क रूप में रखइ क इच्छा कइ सकत ह।^{१२} तू पचन्क ओका आपन परिवार में आपन घरे लिआवइ चाही। ओका आपन बार छोलवावइ चाही अउर आपन नह कटवावइ चाही।^{१३} ओका आपन बन्दी भए ओढ़नन क उतारइ चाही। ओका तोहरे घरे में रहइ चाही अउर एक महीना तलक आपन महतारी अउर बाप बरे रोवइ चाही। ओकरे बाद तू ओकरे संग यौन सम्बन्ध कायम कइ सकत ह अउर ओकर भतार होइ सकत ह्या। अउर उ तोहार पत्नी बन जाइ।^{१४} मुला अगर तू पचे ओसे खुस नाही होत्या तउ तू पचे ओका जहाँ उ जाइ चाही जाइ देइ। मुला तू ओका वास्तविक रूप में बेच नाही सकत्या। तू ओकरे बरे दासी क तरह बेउहार नाही कइ सकत्या। काहेकि तोहार ओकरे संग यौन सम्बन्ध रहा।

एक ठु मनई क दुइ पत्नियन क गदेलन

^{१५} “एक ठु मनई क दुइ पत्नियन होइ सकत हीं अउर उ एक पत्नी स दूसर पत्नी क अपेच्छा जियादा पिरम कइ सकत ह। दुइनउं पत्नियन स ओकरे गदेलन होइ सकत हीं अउर पहिला गदेलन उ पत्नी क होइ सकत ह जेहसे उ जियादा पिरम न करत होइ।^{१६} जब उ आपन सम्पत्ति आपन गदेलन में बाँटी तउ उ इ घोसणा नाही करइ सकत ह कि जे पत्नी क उ जियादा पिरम करत ह ओका गदेलन पहिलौटी अहइ अउर जेका उ पिरम नाही करत ही ओका गदेलन नाही।^{१७} उ मनई क दुतकारी पत्नी क गदेलन क ही पहिलौटी क गदेलन अंगीकार करइ चाही। उ मनई क आपन चीजन क दुइ हींसा पहिलौटी पूत क देइ चाही। काहेकि उ बड़का गदेलन अहइ। अउ पहिलौटी क अधिकार रखत अहइ।

आग्या न मानइवाला पूत

^{१८} “कउनो मनई क अइसा पूत होइ सकत ह जउन जिद्दी अउर आग्या क न मानइवाला होइ। इ पूत आपन महतारी अउर बाप क आग्या न मानी। महतारी अउर बाप ओका दण्ड देत हीं मुला पूत फुन भी ओनकइ कछु नाही सुनत।^{१९} ओकरे महतारी अउर बाप क ओका सहर क फाटक पइ सहर क मुखियन क लगे लइ जाइ चाही।^{२०} ओनका सहर क मुखियन स कहइ चाही :

‘हमार पूत जिद्दी अहइ अउर आग्या नाही मानत। उ कउनो काम नाही करत जेका हम करइ बरे कहित ह। उ जरूरत स जियादा खात अउ मद पिअत ह।’^{२१} तब सहर क लोगन क उ पूत क पाथरन स मारि डावइ चाही। अइसा कइके तू पचे आपन में स बुराई क हटाइ देइहीं। इस्राएल क सबहिं लोग एका सुनिहीं अउ डेराइ जइहीं।

अपराधियन मारा जात अउ लटकावा जात हीं

^{२२} “कउनो मनई अइसा पाप करइ क अपराधी होइ सकत ह जेका मउत क सजा दीन्ह जाइ। जब उ मारि डावा जाइ तब ओकर देह पेडे पइ लटकावा जाइ सकत ह।^{२३} जब अइसा होत ह तउ ओकरे देह क रात भइ पेडे पइ नाही रहइ चाही। तू पचन्क ओका उहइ दिन निहचय ही दफनाइ देइ चाही। काहेकि जउन मनई पेडे पइ लटकावा जात ह उ परमेस्सर स अभिसाप पावा होत ह। तू पचन्क उ देस क बे पवित्तर नाही करइ चाही जेका यहोवा तोहार परमेस्सर तू पचन्क रहइ बरे देत ह।

दूसर नेमन

२२ ^१ “अगर तू पचे लखा कि तोहरे पड़ोसी क गइया या भेड़ी खुली बाटइ, तउ तू पचन्क एहसे लापरवाह नाही होइ चाही। तू पचन्क निहचय ही एका मालिक क लगे पहाँचाइ देइ चाही।^२ अगर एकर मालिक तोहरे लगे न रहत होइ या तू ओका नाही जानत ह्या कि उ कउन अहइ तउ तू उ गइया या भेड़ी क आपन घरे लइ जाइ चाही अउर तू एका तब तलक रखा जब तलक मालिक एका हेरत भवा तोहार लगे न आवइ। तब तू पचन्क ओका ओकरे बरे लउटाइ देइ चाही।^३ तू पचन्क इहइ तब भी जरूर करइ चाही जब तू पचन्क पड़ोसी क गदहा मिलइ, ओकर ओढ़नन मिलइ या कउनो चीज पड़ोसी खोइ देत ह। अगर तू पावत ह, तउ तोहका नजरअन्दाज नाही रहइ चाही।

^४ “अगर तोहरे पड़ोसी क गदहा या ओकर गइया सडक पइ पड़ी होइ तउ ओहसे आँखी नाही फेरि लेइ चाही। तू पचन्क ओका फुनि उठावइ में ओकर मदद करइ चाही।

^५ “कउनो मेहरारु क कउनो मनई क ओढ़ना नाही पहिरइ चाही अउर कउनो मनसेधू क कउनो मेहरारु क ओढ़ना नाही पहिरइ चाही। यहोवा तोहार परमेस्सर ओहसे घिना करत ह जउन अइसा करत ह।

६ “कउनो राहे स टहरत समइ तु पचे वृच्छ पइ या भुइया पइ चिरइयन क घोंसला पाइ सकत ह । अगर मादा चिरई आपन वचन क संग बइठी होइ या आपन अण्डन पइ बइठी होइ तउ तू पचन्क मादा चिरई क वचन क संग नाही पकड़इ चाही ।^७ तू पचे वचन क आपन बरे लइ सकत ह । मुला तू पचन्क महतारी क तजि देइ चाही । अगर तू पचे इ नेमन क मानत ह तउ तोहरे बरे सब कछू नीक होइ अउर तू लम्बे समइ तलक जिअत रहव्या ।

५ “जब तू पचे कउनो नवा घर बनावा तउ तू पचन्क आपन छते क चारिहुँ कइती देवार खड़ी करइ चाही । तब तू पचे कउनो मनई क अपराधी नाही होव्या अगर उ छते पइ स भहरात ह ।

कछू चीजन जेनका एक संग नाही रखइ चाही

१ “तू पचन्क आपन अंगूरे क बगिया मँ अनाजे क बिअन क नाही बोवइ चाही । काहेकि अनाज या अंगूर जउन बोवइ भवा बिअन स उगिहीं ओनका अलग रखइ क होइ ।

१० “तू पचन्क बर्धा अउ गदहा क एक संगे हर जोतइ मँ नाही लगावइ चाही ।

११ “तू पचन्क उ ओढनन क नाही पहिरइ चाही जेका अन अउ सूते स एक संग बुना भवा होइ ।

१२ “तू पचन्क आपन पहिरा जाइवाला चोगा क चारिहुँ कोनन पइ फुंदनन जरूर लगावइ चाही ।

बियाह क नेमन

१३ “अगर एक मनई कउनो लइकी स बियाह करइ अउर ओसे तने स सम्बन्ध करइ । तब होइ सकत ह । उ फइसला करत ह कि उ ओका पसन्द नाही अहइ ।^{१४} उ झूठ बोलि सकत ह अउर कह सकत ह, ‘मई उ मेहरारू स बियाहेउँ, मुला जब हम पचे तने स सम्बन्ध किहेउँ तब मालूम भवा कि उ कुआँरी नाही अहइ ।’ ओकरे खिलाफ अइसा सरमनाक बात कहइ पइ लोग उ मेहरारू क सम्बन्ध मँ बुरा विचार रख सकत हीं ।^{१५} अगर अइसा होत ह तउ बिटिया क महतारी अउर बाप क इ बात क सबूत सहर क फाटक जगह पइ नगर-प्रमुखन क लगे लिआवइ चाही कि बिटिया कुआँरी रही ।^{१६} लइकी क बाप क नगर-प्रमुखन स कहइ चाही, ‘मई आपन बिटिया क उ मनई क पत्नी होइ बरे दिहेउँ, मुला अब उ ओका नाही चाहत ।’^{१७} इ मनई मोरी बिटिया क खिलाफ झूठ बोलेस ह । उ

कहेस, “मई तोहार बिटिया क कुआँरी नाही पावइ ह ।” मुला इ मोर बिटियन क कुआँरिपन क सबूत अहइ । तब उ पचे उ ओढना #क नगर-प्रमुखन क देखइहीं ।^{१८} तब नगर-प्रमुख उ मनई क लेइहीं अउर ओका सजा देइहीं ।^{१९} उ पचे ओह पइ सौ चाँदी क सकेल क जुमाना करिहीं । उ पचे उ रुपिया क लइकी क पिता क देइहीं काहेकि ओकर भतार एक इस्राएली बिटिया पइ कलक लगाएस ह अउर बिटिया उ मनई क पत्नी बनी रही । उ आपन पूरी जिन्नगी ओका तलाक नाही दइ सकत ।

२० “मुला जउन बातन भतार आपन पत्नी क बारे मँ कहेस उ सबइ फुर होइ सकत हीं । पत्नी क महतारी-बाप क लगे इ सबूत नाही होइ सकत कि बिटिया कुआँरी रही ।^{२१} अगर अइसा होत ह तउ नगर-प्रमुख उ बिटिया क ओकरे बाप क दुआरे पइ लइ अइहीं तब नगर क मनई ओका पाथर स मार डइहीं । काहेकि उ इस्राएल मँ लज्जावाली बात किहस । उ आपन बाप क घरे मँ रंडी जइस बेउहार किहस ह । तू पचन्क आप लोगन मँ स हर बुराई क दूर करइ चाही ।

जिनाखोरी क पाप

२२ “अगर कउनो मनई कउने दूसरे क पत्नी क संग तने क सम्बन्ध करत भवा पावा जात ह तउ दुइनउँ मारा जाव्या, उ मेहरारू अउ उ मनसेधु जउन ओकर संग तने क सम्बन्ध किहेस ह । तू पचन्क इस्राएल स इ बुराई दूर करइ चाही ।

२३ “कउनो मनई कउनो उ कुआँरी बिटिया स मिल सकत ह जेकर दूसरे स पक्का होइ चुका अहइ । उ ओकरे संग तने क सम्बन्ध भी कइ सकत ह । अगर सहर मँ अइसा होत ह तउ^{२४} तू पचन्क ओन दुइनउँ क उ सहर क बाहेर फाटक पइ लावइ चाही अउर तू पचन्क ओन दुइनउँ क पाथरन स मारि डावइ चाही । तू पचन्क मनई क एह बरे मारि डावइ चाही कि उ दूसर क पत्नी क संग तने क सम्बन्ध किहस अउर तू पचन्क बिटिया क एह बरे मारि डावइ चाही कि उ सहर मँ रही अउर उ मदद बरे पुकार नाही किहस । तू पचन्क आपन लोगन मँ स इ बुराई भी दूर करइ चाही ।

२५ “मुला कउनो मनई मैदानन मँ, बियाह क सगाई पक्की भइ बिटिया क पकड़ लेत ह अउर ओसे बल लगाइके तने क सम्बन्ध करत ह तउ अकेला उ जरूर मनई क मारि डावइ चाही ।^{२६} तू

#२२:१७ ओढना अकासर मेहरारू क संग पहिले तने क सम्बन्ध क समइ मँ भितरे क झिल्ली फटि जाइस तनिक रकत आवत ह । दुलहिन अपने बियाहे क रात क बिछुना क ओढना क इ सिद्ध करइ बरे राखत रही कि उ बियाह क समइ कुआँरी रही ।

पचन्क बिटिया क संग कछू भी नाही करइ चाही काहेकि उ अइसा कछू भी अपराध नाही किहस जउन ओका मउत क सजा क काबिल बनावत ह । इ मामला वइसा ही अहइ जइसा कउनो मनई क निर्दोख मनई पइ आकामण अउ ओकर कतल करतह ।^{२७} उ मनई बियाह क सगाई पक्की कीन्ह भइ बिटिया क मैदान मँ धरेस । बिटिया मदद बरे गोहार लगाएस, मुला कउनो ओकर मदद करइवाला नाही रहा ।

^{२८} “कउनो मनई कउनो कुआँरी बिटिया जेकर बरिच्छा नाही भइ अहइ, क धइ लेत ह अउर ओका आपन संग बल स तने क सम्बन्ध करइ क मजबूर कइ सकत ह । अगर उ परगट होइ जात ह,^{२९} तउ ओका बिटिया क बाप क पचास सेकेल चाँदी देइ चाही अउर बिटिया ओकर पत्नी होइ जाइ । काहेकि उ ओकरे संग तने क सम्बन्ध किहस । उ ओका पूरी जिन्नगी तलाक नाही दइ सकत ।

^{३०} “कउनो मनई क आपन सौतेली महतारी क संग सादी कइके आपन बाप पइ कलंक नाही लगावइ चाही ।”

उ सबइ लोग उपासना मँ सामिल होइ सकत हीं

२३ ^१ “इ सबइ लोग इस्राएल क लोगन क संग यहोवा क उपासना करइ बरे नाही आइ सकतेन: उ मनई जउन आपन क बधिया कराइ लिहस ह, उ मनई जउन आपन जनन अंग कटवाइ लिहस ह^२ या उ मनई जउन बिना बियाहे भए महतारी-बाप क सन्तान होइ । इ मनई क परिवार क कउनो मनई दसई पीढ़ी तलक भी यहोवा क लोगन मँ यहोवा क उपासना करइ बरे नाही गना जाइ सकत ।

^३ “कउनो अम्मोनी या मोआबी यहोवा क लोगन स सम्बंध रखत भवा नाही होइ सकत अउर दस पीढ़ियन तलक ओनकर कउनो सन्तान भी यहोवा क लोगन क हींसा यहोवा क उपासना करइ बरे नाही बन सकत ।^४ काहेकि अम्मोनी अउर मोआबी लोग मिसर स बाहेर आवइ क जातरा क समइ तू लोगन क रोटी अउ पानी देइ स इन्कार किहे रहैन । उ सबइ यहोवा क लोगन क हींसा एह बरे भी नाही होइ सकतेन काहेकि उ पचे बिलाम क तू पचन्क अभिसाप देइ बरे मुकरर किहे रहैन । (बिलाम अरमनहरैम मँ पतोर सहर क बोर क पूत रह ।)^५ मुला यहोवा परमेस्सर बिलाम क एक नाही सुनेस । यहोवा अभिसाप क तोहरे बरे बरदान मँ बदल दिहस । काहेकि यहोवा तोहार

परमेस्सर तू पचन्स पिरम करत ह ।^६ तू पचन्क अम्मोनी अउ मोआबी लोगन संग सान्ति रखइ क कोसिस कबहुँ नाही रखइ चाही । जब तलक तू लोग रहा, ओनसे मिताई जिन राखा ।

इ सबइ जेनाक इस्राएलियन क अपने मँ मिलावइ चाही

^७ “तू पचन्क एदोमी स घिना नाही करइ चाही । काहेकि उ तोहार सम्बंधी अहइ । तू पचन्क कउनो मिस्री स घिना नाही करइ चाही । काहेकि ओनके देस मँ तू पचे अजनबी रह्या ।^८ एदोमी अउर मिस्री लोगन स पइदा तीसरी पीढ़ी क गदेलन यहोवा क लोगन क हींसा बन सकत हीं ।

फउज क छाउनी क स्वच्छ रखव

^९ “जब तोहार फउज दुस्मन क खिलाफ जाइ, तब तू पचे ओन सबहि चीजन स दूर रहा जउन तू पचन्क वे पवित्तर बनावत हीं ।^{१०} अगर कउनो अइसा मनई अहइ जउन इ कारण पवित्तर नाही अहइ कि रात मँ सपनदोस होइ गवा बाटइ तउ ओका छाउनी क बाहेर चला जाइ चाही । ओका छाउनी स दूर रहइ चाही ।^{११} मुला जब साँझ होइ तब उ मनई क पानी स नहाइ चाही अउर जब सूरज बूडइ तब ओका छाउनी मँ आवइ चाही ।

^{१२} “तू पचन्क छाउनी क बाहेर दिसा फरागत बरे जगह बनवइ चाही ।^{१३} अउर तू पचन्क आपन हथियार क संग खनइ बरे एक टु खन्ती रखइ चाही । एह बरे जब तू पचे फरागत करब्या तब तू एक टु गडहा खना अउर ओका ढाँकि द्या चाही ।^{१४} काहेकि यहोवा तोहार परमेस्सर तोहरे डेरन मँ दुस्मनन क हरावइ मँ तोहार मदद करइ बरे तोहरे संग अहइ । एह बरे डेरा पवित्तर रहइ चाही । तब यहोवा तू पचन मँ कछू भी अनुचित न लखी अउर तोहे सबन्स आँखी न फेरी ।

दूसर नेमन

^{१५} “अगर कउनो दास आपन मालिक क हिआँ स पराइके तोहरे लगे आवत ह तउ तू पचन्क उ दास क ओकरे मालिक क नाही लउटावइ चाही ।^{१६} इ दास तोहरे संग जहाँ चाहे हुआँ रहि सकत ह । उ जउने भी सहर क चुन लेइ ओहमाँ रहि सकत ह । तू पचन्क ओका परेसान नाही करइ चाही ।

^{१७} “कउनो इस्राएली मेहरारू या मनसेधू क कबहुँ देवदासी या देवदास नाही बनइ चाही ।^{१८} देवदास या देवदासी क कमावा भवा धन तोहरे परमेस्सर क मन्दिर मँ नाही लिआवा जाइ चाही ।

कउनो मनई दीन्ह भए बचन क कारण यहोवा क दीन्ह जाइवाली चीज क बरे इ धने क उपयोग नाही कइ सकत। यहोवा तोहार परमेस्सर सबहिं मन्दिरन क देवदास-देवदासियन स घिना करत ह।

१९ “अउर तू पचे कउनो इस्राएली क उधार द्या तउ तू पचे ओह पइ बियाज जिन ल्या। तू पचे उधार मँ लीन्ह गवा सिक्कन, भोजन या कउनो अइसी चीज पइ बियाज मँ न ल्या। २० तू पचे बिदेसियन स बियाज लइ सकत ह। मुला तू पचन्क दूसर इस्राएली स बियाज नाही लेइ चाही। अगर तू पचे इ नेमन क मनब्या तउ यहोवा तोहार परमेस्सर उ देस मँ, जहाँ तू पचे रहइ जात अहा, जउन कछू तू पचे करब्या ओहमाँ आसीस देइ।

२१ “जब तू पचे यहोवा आपन परमेस्सर क बचन द्या, तउ जउन तू पचे देइ क कहा ओन सब क देइ मँ ढीला जिन ह्हा। अगर तू बचन दीन्ह गइ चीजन क नाही देब्या तउ पाप क अपराध करब्या। यहोवा तोहार परमेस्सर चाहत ह कि तू निहचय ही आपन वचन क जरूर पूरा करा। २२ अगर तू बचन नाही देब्या तउ तू पचे पाप नाही करत अहा। २३ मुला तू पचन्क उ चीजन क करइ चाही जेका करइ बरे तू पचे कहया ह कि तू करब्या। जब तू पचे अजादी स यहोवा आपन परमेस्सर क बचन द्या तउ, तू पचन्क बचन दीन्ह गइ बात क पूरी करइ चाही।

२४ “अगर तू दूसर मनई स अंगूर क बगिया स होइके जात अहा, तउ तू जेतना चाहा ओतना अंगूर खाइ सकत ह। मुला तू कउनो अंगूर आपन टोकरी मँ नाही रख सकब्या। २५ जब तू दूसर क पका भवा अनाज क फसल क खेत स होइके जात अहा तउ तू आपन हाथे स जेतना उजारा, खाइ सकत ह। मुला तू हँसिया क उपयोग दूसर क अनाज क काटइ अउर लेइ बरे नाही कइ सकत्या।

२४ “जदि कउनो मनई कउनो मेहरारू स बियाह करत ह, अउर उ मेहरारू ओका खुस नाही करत ह, काहेकि उ मनई उ मेहरारू मँ कछू असलीलता पावत ह, तउ उ ओक तलाक पत्र दइ सकत ह अउर ओका आपन घरे स पठइ देइ सकत ह। २ जब उ ओकर घर तज दिहेस ह तउ उ दूसर मनई क लगे जाइके ओकर पत्नी होइ सकत ह। ३-४ मुला मान ल्या कि नवा भतार भी ओका पसन्द नाही करत अउर ओका बिदा कइ देत ह। अगर उ मनई ओका तलाक देत ह तउ भी पहला भतार ओका फुन स पत्नी क रूप मँ नाही राखि सकत या अगर नवा भतार मरि जात ह तउ भी पहिला भतार ओका फुन पत्नी क रूप मँ नाही रख सकत ह। उ दूसित होइ चुकी बाटइ।

अगर उ ओसे बियाह करत ह तउ उ अइसा काम करी जेहसे यहोवा घिना करत ह। तू पचन्क उ देस मँ अइसा पाप नाही लावइ चाही जेका यहोवा तोहार परमेस्सर तू पचन्क रहइ बरे दइ देत अहइ।

५ “नवा बियाहा क फउज मँ नाही पठवइ चाही अउर ओका कउनो दूसर खास काम भी नाही देइ चाही। काहेकि एक बरिस तलक ओका घरे पइ रहइ क अजाद होइ चाही अउर आपन नई पत्नी क सुखी बनावइ चाही।

६ “अगर कउनो मनई क तू कर्ज द्या तउ गिरवी क रूप मँ ओकर आटा पीसइ क जाँत क कउनो पाट न रखा। काहेकि अइसा करब ओका खडया करइ के तू ओकर जिन्नगी क जरिया लइ लेब्या।

७ “अगर कउनो इस्राएली मनई दूसर इस्राएली मनई क अपहरण करत ह जउन ओकरे देस क अहइ अउर ओकरे संग दूरव्यवहार करत ह या ओका बेच लेत ह तउ अपहरण करइवाला जरूर मारा जाइ चाही। इ तरह तू आपन बीच स इ बुराई क दूर करब्या।

८ “अगर तू पचन्क कोढ़ होइ जाइ तउ तू पचन्क लेवी बंसी याजकन क दीन्ह गइ सारी सिच्छा अंगीकार करइ मँ होसियार रहइ चाही। तू पचन्क होसियारी स ओन सबइ आदेसन क मानइ चाही जेनका देइ बरे मई याजकन स कहेउँ ह। ९ इ याद राखा कि यहोवा तोहार परमेस्सर मिरियम क संग का किहेस जब तू पचे मिस्र स बाहेर निकरइ क जात्रा पइ रह्या।

१० “जब तू पचे कउनो मनई क कउनो तरह क कर्ज द्या तउ ओकरे घरे मँ ओकर धरेलू सामान क, गिरवी रखी चीज लेइ बरे जिन जा। ११ तू पचन्क बाहेर ही खड़ा रहइ चाही। तब उ मनई, जेका तू पचे कर्ज दिहा ह, तोहारे लगे गिरवी रखी गइ चीज लिआइ। १२ अगर उ गरीब अहइ तउ उ आपन वस्त्रन क दइ देइ, जेहसे उ आपन क गरम रख सकत ह। तू पचन्क ओकर गिरवी रखी चीज रात क नाही रखइ चाही। १३ तू पचन्क हर एक साँझ क ओकर गिरवी धरी चीज क लउटाइ देइ चाही। तब उ आपन ओढनन मँ स सोइ सकी। उ तोहार एहसानमंद रही अउर यहोवा तोहार परमेस्सर इ लखी कि तू इ अच्छा काम किह्या ह।

१४ “तू पचन्क कउनो गरीब अउ जरूरतवाला मजूर पइ अत्याचार नाही करइ चाही। एकर कउनो महत्व नाही कि उ तोहार साथी इस्राएली बाटइ या उ कउनो बिदेसी अहइ जउन तोहारे सहरन मँ स कउनो एक मँ उ रहत बाटइ। १५ सूरज बूडइ स पहिले हर रोज ओकर मजूरी दइ द्या।

काहेकि उ गरीब अहइ अउर उहइ धने पइ ओका सहारा अहइ। अगर तू ओकर भुगतान नाहीं करत्या तउ उ यहोवा स तोहरे खिलाफ सिकाइत करी अउर तू पचे पाप करइ क अपराधी होब्या।

१६ “गदेलन क जरिये कीन्ह गए कउनो अपराध बरे बाप क मउत क सजा नाहीं दीन्ह जाइ सकत। अउर गदेलन क बाप क जरिये कीन्ह गए अपराध बरे मउत क सजा नाहीं दीन्ह जाइ सकत। कउनो मनई क ओकरे खुद क अपराध बरे ही मउत क सजा दीन्ह जाइ सकत ह।

१७ “तू पचन्क प्रवासी अउ अनाथन क संग गलत फइसला नाहीं करइ चाही। तू पचन्क राँड मेहररु स ओकर ओढ़ना कबहुँ भी गिरवी रखइ क बरे नाहीं लेइ चाही। १८ तू पचन्क सदा सुमिरइ चाही कि तू पचे मिस्र मँ दास रह्या। इ जिन बिसस कि यहोवा तोहार परमेस्सर तू पचन्क हुआँ स बाहेर लिआवा। इहइ कारण अहइ कि मई तू पचन्क इहइ करइ क आदेस देत अहउँ।

१९ “तू पचे आपन खेत क फसल बटोरत रहि सकत ह अउर तू पचे तनिक भूलचूक स हुआँ छोड़ि सकत ह। तू पचन्क ओका लेइ नाहीं चाही। इ प्रवासियन, अनाथन अउर राँड मेहररुअन बरे होइ। अगर तू पचे ओनके बरे कछू अन्न छोड़त ह तउ यहोवा तोहार परमेस्सर तू पचन्क ओन सबहिं कामन मँ असीसी जउन तू पचे करब्या। २० जब तू पचे आपन जइतून क वृच्छन स फली झरब्या तउ तू पचन्क डारन क फुन जाँच करइ नाहीं जाइ चाही। जउन जइतून तू पचे ओहमाँ तज देब्या उ बिदेसियन, अनाथन अउर राँड मेहररुअन बरे होइ। २१ जब तू पचे आपन अंगूरे क बगियन स अंगूर बटोरब्या तब तू पचन्क ओन अंगूर क लेइ नाहीं जाइ चाही जेनका तू पचे तजि दिहे अहा। उ सबइ अंगूर बिदेसियन, अनाथन अउर राँड मेहररुअन बरे होइहीं। २२ याद राखा कि तू पचे मिस्र मँ दास रह्या। इहइ कारण अहइ कि तू पचन्क इ करइ क आदेस देत अहउँ।

२५ “अगर दुइ मनइयन मँ झगड़ा होइ तउ ओनका अदालत मँ जाइ चाही। निआवाधीस ओनके मोकदमा क फइसला करिही। ओनका निर्दोख क रिहा अउ दोसी क सजा देइ चाही। २ अगर अपराधी मनई पीटा जाइ जोगग अहइ तउ निआवाधीस ओका मुँहे क बल ओलारी। ओका निआवाधीस क समन्वा ओकरे अपराध क अनुसार ओतनी दाई पीटा जाई चाही जेतना दाई उचित होइ। ३ कउनो मनई क चालीस दाई तलक पीटा जाइ सकत ह, मुला ओसे जियादा नाहीं।

अगर उ ओहसे जियादा बार पीटा जात ह तउ एहसे पता चली कि उ मनई क जिन्नगी तोहरे बरे महत्वपूर्ण नाहीं।

४ “जब तू पचे अन्न क अलगावइ बरे गोरुअन क उपयोग करा तब ओनका खाइ स रोकइ बरे ओनके धूथुन क जिन बाँधा।

५ “अगर दुइ भाई एक संग रहत होइँ अउर ओनमाँ स एक टुलाओलाद मरि जाइ तउ मरे भए भाई क पत्नी क बियाह परिवार क बाहेर कउनो अजनबी स नाहीं होइ चाही। ओकरे भतारे क भाई क ओका पत्नी क रूप मँ लइ चाही अउर ओकर लगे जाइ चाही अउर ओकरे बरे भतार क भाई क कर्तव्य पूरा करइ चाही। ६ तब जउन पहिलौटी पूत ओसे पइदा होइ उ मनई क मरे भाई क जगह लेइ। तब मरे भाई क नाउँ इस्राएल स बाहेर नाहीं कीन्ह जाइ। ७ अगर उ मनई आपन भाई क पत्नी क अंगीकार करइ नाहीं चाहत, तब भाई क पत्नी क बइठकवाली जगह पइ नगर-प्रमुखन क लगे जाइ चाही। ओकरे भाई क पत्नी क नगर प्रमुखन स कहइ चाही, ‘मोरे भतार क भाई इस्राएल मँ आपन भाई क नाउँ बनाए रखइ स इन्कार करत ह। उ मोरे बरे आपन भाई क कर्तव्य क पूरा नाहीं करी।’ ८ तब नगर-प्रमुखन क उ मनई क बोलावइ चाही अउ ओसे बात करइ चाही। अगर उ मनई जिदी अहइ अउर कहत बाटइ, ‘मई ओका अंगीकार करइ नाहीं चाहत हउँ।’ ९ तब ओकरे भाई क पत्नी नगर प्रमुखन क समन्वा ओकरे लगे आवइ। उ ओकरे गोड़ स पनही उतारि लेइ अउर ओकरे मुँहे पइ थूकइ। ओका कहइ चाही, ‘इ उ मनई क कीन्ह जात इ कारज अहइ कि उ आपन भाई क परिवार न बसाइ।’ १० तब उ भाई क परिवार, बुलावा जाब्या, ‘उ मनई क परिवार जउन आपन जूता पनही, उतार दिहस।’

११ “दुइ मनई आपुस मँ झगड़ सकत हीं। ओनमाँ एक क पत्नी आपन भतारे क मदद करइ आइ सकत ह। मुला ओका दूसर मनई क गुप्त अंगन क नाहीं धरइ चाही। १२ अगर उ अइसा करत ह तउ ओकर हाथ काट डावा, ओकरे बरे दुःखी जिन ह्हा।

१३ “लोगन क धोखा देइ बरे जाली बटखरा जिन रखा। ओन बटखरन क उपयोग जिन करा जउन असली वजन स कमती या जियादा होइँ। १४ आपन घरे मँ ओन नाप जोख क न रखा जउन सही नाप जोख स बहोत बड़ा या बहोत नान्ह न होइँ। १५ तू पचन्क ओन बटखरन अउ नाप-जोख क बइपरइ चाही जउन सही अउर ईमानदारी

क परिचायक अहइ। तू पचे उ देस मँ लम्बी उमिरवाला होब्या जेका यहोवा, तोहार परमेस्सर तू पचन्क देत अहइ। ^{१६} यहोवा तोहार परमेस्सर ओनसे घिना करत ह जउन जाली बटखरा अउर नाप जोख बइपरिके धोखा देत बाटेन। हाँ, उ सबइ ओन सबहिं लोगन स घिना करत ह जउन बेईमानी करत हीं।

अमालेक क लोगन्क नस्ट कइ देइ चाही

^{१७} “तू पचन क याद करइ चाही कि जब तू पचे मिस्र छोड़ैस तब अमालेक क लोग तोहरे संग का किहेन। ^{१८} अमालेक क लोग परमेस्सर क सम्मान नाहीं किहेन। उ पचे तू पचन्क पइ पाछे, स तब हमला किहेन जब तू पचे थका भवा अउर कमजोर रह्या। उ पचे तोहरे ओन सब लोगन्क मार डाएन जउन सुस्त होइके पीछे चलत रहेन। ^{१९} एह बरे तू लोगन्क अमालेक क लोगन्क याद क संसारे स मेट देइ चाही। इ तू लोग तब करब्या जब उ देस मँ जाब्या जेका यहोवा तोहार परमेस्सर तू पचन्क देत अहइ। हुआँ उ पचे तू सबन्क चारिहुँ कइँती क दुस्मनन स छुटकारा दिअइहीं। मुला अमालेकियन क नास करब जिन बिसरा।

पहिली फसिल क बारे मँ नेम

२६ ^१ “तू पचे हाली ही उ देस मँ घुसब्या जेका यहोवा तोहार परमेस्सर तू पचन्क रहइ बरे देत अहइ। जब तू पचे हुआँ क भुइँया पइ कब्जा कइ ल्या अउ ओह पइ रहइ लाग्या, ^२ तब तू पचन्क आपन क तनिक फसिल लेइ चाही अउर ओका एक टोकरी मँ धरइ चाही। उ पहिली फसिल होइ जेका तू पचे उ देस स पउब्या जेका यहोवा तोहार परमेस्सर तू पचन्क दइ देत अहइ। तनिक पहिली फसिल वाला टोकरी क ल्या अउर उ ठउर पइ जा जेका यहोवा तोहार परमेस्सर चुनी। ^३ उ समइ सेवा करइवाला याजक क लगे तू पचन्क जाई चाही अउर ओहसे कहइ चाही, ‘आजु मइँ यहोवा आपन परमेस्सर क लगे इ एलान करत हउँ कि हम पचे उ देस मँ आवा अही जेका यहोवा हम लोगन क देइ बरे हमरे पुरखन क बचन दिहे रहा।’

^४ “तब याजक टोकरी क तोहरे हाथे स लेइ। उ एका यहोवा तोहरे परमेस्सर क वेदी क समन्वा रखी। ^५ तब तू पचे यहोवा आपन परमेस्सर क समन्वा इ कहब्या: ‘भोर पुरखा घुमक्कइ अरामी रहा। ^६ उ मिस्र पहाँचा अउर हुआँ रहा। जब

उ हुआँ गवा तब ओकरे परिवार मँ बहोत कम लोग रहेन। मुला मिस्र मँ उ एक सक्तीवाला बहोत स मनइयन वाला महान रास्टर बन गवा। ^६ मिस्रियन हम लोगन क संग बहोतइ बुरा बेउहार किहेन। उ हम लोगन क मुसीबत मँ डाइ दिहेन अउ कठिन कारज करइ बरे निश्चित किहेन। ^७ तब हम पचे यहोवा आपन पुरखन क परमेस्सर स पराथना कीन्ह अउर ओनका गोहार लगाएन यहोवा हमरउ सुनेस अउर उ हम लोगन्क परेसानियन, हमरे कठोर काम अउ अत्याचार क लखेस। ^८ तब यहोवा हम लोगन्क आपन प्रबल सक्ती अउ मजबूती स मिस्र स बाहेर लइ गवा। उ डरावना बातन, महान चमत्कारन अउ अचरजन कर्म किहस। ^९ इ तरह हम लोगन्क इ ठउरे पइ लिआवा। उ दूध अउर सहद बहुत भवा देस हम पचन्क दिहस। ^{१०} यहोवा, अब मइँ उ देस क पहिली फसिल तोहरे लगे लिआएँ ह जेका तू मोका दिह्या ह।’

“तब तू पचन्क यहोवा आपन परमेस्सर क समन्वा रखइ चाही अउर तू पचन्क ओका निहुर करइ चाही। ^{११} तब तू पचे ओन सब नीक चीजन्क क आनन्द स भोग कइ सकत ह जेका यहोवा तोहार परमेस्सर तू पचन्क अउर तोहरे परिवार क दिहस ह। लेवी बंसी अउर उ सबइ प्रवासी जउन तोहरे बीच रहत हीं तोहरे संग इ चीजन्क आनन्द लइ सकत हीं।

^{१२} “जब तू पचे दसवाँ हीसा जउन तीसरे बरिस (दसवाँ हीसा क बरिस) तोहरी फसिल क दीन्ह जाइ क अहइ, दइ चुका तब तू पचन्क लेवी बंसियन, बिदेसियन, अनाथन अउर राँइ मेहररुअन क एका दइ देइ चाही। तब हर एक सहर मँ उ पचे खाइ सकत हीं अउर सन्तुट्ट कीन्ह जाइ सकत हीं। ^{१३} तू पचे यहोवा आपन परमेस्सर स कहब्या, ‘मइँ आपन घरे स आपन फसिल क पवित्तर हीसा दसवाँ हीसा बाहेर निकारि दिहेउँ ह। मइँ एका ओन सबहिं लेवी बंसियन, बिदेसियन, अनाथन अउर राँइ मेहररुअन क दइ दिहेउँ ह। जइसा तू मोका आदेस दिहेस रहा मइँ एका ओन सबहिं अदेसन क मानइ स इन्कार नाहीं किहेउँ ह। मइँ ओनका बिसरेउँ नाहीं। ^{१४} मइँ इ भोजन तब नाहीं किहेउँ जब मइँ सोक मनावत रहेउँ। मइँ इ अनाज क तब अलग नाहीं किहेउँ जब मइँ असुद्ध रहेउँ। मइँ इ अनाजे मँ स कउनो हीसा मरे मनई बरे नाहीं दिहेउँ ह। मइँ यहोवा हमार परमेस्सर

^{११}२६:५ मोर ... अरामी रहा हिआँ इ सबइ इब्राहीम, इसहाक या साइद याकूब होइ सकत ह।

क आग्या क मानेउँ ह । मई उ सब कछू किहेउँ ह जेकरे बरे तू आग्या दिह्या ह ।^{१५} तू आपन पवित्तर आवास सरग स खाले निगाह डावा अउर आपन लोगन, इस्राएलियन क आसीबाँद द्या जेका तू हम लोगन्क वइसा ही दिह्या ह जइसा तू हमरे पुरखन क बढ़िया चीजन्स भरा-पूरा देस देइ क बचन दिह्या रह्या ।

यहोवा क हुकुमन पइ चला

^{१६} “आजु यहोवा तोहार परमेस्सर तू पचन्क आदेस देत अहइ कि तू पचे इ सबइ विधियन अउ नेमन क माना । आपन पूरा हिरदय अउर आपन पूरी आतिमा स एनका मानइ बरे होसियार रहा ।^{१७} आजु तू पचे इ कहया ह कि यहोवा तोहार परमेस्सर अहइ । तू लोग बचन दिहा ह कि तू पचे ओकरे राहे पइ चलब्या, ओकरे हुकुमन, आदेसन अउर नेमन क मनब्या । तू पचे कहया ह कि तू पचे उ सब कछू करब्या जेका करइ बरे उ कहत ह ।^{१८} आजु यहोवा तू पचन्क आपन लोग क रूप स्वीकार किहेस । अउर तोहका आपन मूल्यवान सम्पत्ति बनाइ बरे बचन दिहस ह । अउर तू पचन्क ओकरे सब आदेसन क मानइ चाही ।^{१९} यहोवा तू पचन्क ओन सबहिं रास्टरन स महान बनाई जेनका उ बनाएस ह । उ तू पचन्क तारीफ, जस अउर गौरव देइ अउर तू पचे ओकर खास लोग होब्या, जइसा उ बचन दिहेस ह ।”

नेमन पाथरन पइ लिखा जाइ चाही

२७ ^१मूसा अउर इस्राएल क प्रमुखन मनइयन क आदेस दिहस । उ कहस, “ओन सबहिं आदेसन क माना जेनका मई आजु देत हउँ ।^२ जउने दिन तू यरदन नदी पार कइके उ देस मँ घुसा जेका यहोवा तोहार परमेस्सर तू पचन्क देत अहइ उ दिन, आपन बरे बहोत बड़की सिलन क तइयार करा । इ सबइ सिला क पलसतर स ढाँकि द्या ।^३ तब इ उपदेस क सब बातन इ पाथरन पइ लिखी द्या । तू पचन्क इ तब करइ चाही जब तू पचे यरदन नदी क पार पहुँच जा । तब उ देस मँ जाइ सकब्या जउन मँ दूध अउर सहद बहत अहइ जेका यहोवा तोहार परमेस्सर तू पचन्क देत अहइ । यहोवा तोहरे पुरखन क परमेस्सर एँका दइके आपन बचन क पूरा किहस ह ।

^४ “यरदन नदी क पार जाइके पाछे तू पचन्क इ सिलन क एवाल पहाड़े पइ आजु क मोरे आदेस क मुताबिक स्थापना करइ चाही । तू पचन्क इ पाथरन क चूना क लेप स ढाँकि देइ चाही ।

^५ हुआँ पइ यहोवा आपन परमेस्सर क वेदी बनावइ बरे भी कछू सिला क उपयोग करा । पाथरन क काटइ बरे लोहा क अउजारन क उपयोग जिन करा ।^६ तू पचन्क यहोवा आपन परमेस्सर क वेदी पूरा पाथरन स बनावा अउर तब यहोवा आपन परमेस्सर बरे एह पइ होमबलि चढ़ावा ।^७ तोहका मेलबलि चढ़ावइ चाही अउर ओनका खाइ चाही । खा अउर यहोवा आपन परमेस्सर क मौजूदगी मँ खुसी क समइ बितावा ।^८ तू पचन्क इ सबइ उपदेसन क पाथर क सिलन पइ साफ साफ लिखि देइ चाही ।”

नेम क अभिसाप

^९मूसा अउर लेवी बंसी याजकन इस्राएल क सबहिं लोगन स बात किहस । उ कहस, “इस्राएलियो, सान्त रहा अउ सुना ! आजु तू लोग, यहोवा आपन परमेस्सर क लोग होइ गवा ।^{१०} एह बरे तू पचन्क उ सब कछू जरूर करइ चाही जउन यहोवा तोहार परमेस्सर कहत ह । तू पचन्क ओकरे ओन आदेसन अउ नेमन क जरूर मानइ चाही जेनका मई आजु तू पचन्क दइ देत हउँ ।”

^{११} उहइ दिन, मूसा लोगन क आदेस दिहेस,^{१२} “जब तू पचे यरदन नदी क पार जाब्या ओकरे पाछे इ सबइ परिवार समूह गिरिज्जीम पहाड़े पइ खड़ा होइ के लोगन्क आसीबाँद देइहीं : सिमोन, लेवी, यहूदा, इस्साकार, यूसुफ अउ बिन्यामीन ।^{१३} अउर इ सबइ परिवार समूह एवाल पहाड़े पइ अभिसाप बाँचिहीं : रूबेन, गाद, आसेर, जबूलून, दान अउर नफ्ताली ।

^{१४} “अउर लेवी बंसी इस्राएल क सबहिं लोगन स ऊँची अवाजे मँ कइहीं :

^{१५} “उ मनई अभिसाप स दबा बा जउन लवार देवता बनावत ह अउर ओका गुप्त ठउरे मँ धरत ह । लवार देवतन सिर्फि उ सबइ मूरतियन अहइ जेका कउनो कारीगर काठ, पाथर या धातु क बनावत ह । यहोवा ओन चीजन स घिना करत ह !

“तब सबहिं लोग जवाब देइहीं, ‘आमीन !’

^{१६} “लेवी बंसी कइहीं, ‘उ व्यक्ति अभिसापित अहइ जउन आपन महतारी अउर बाप क बेज्जत करत ह ।’

“सबहिं लोग जवाब देइहीं, ‘आमीन !’

^{१७} “लेवी बंसी कइहीं : ‘उ व्यक्ति अभिसापित अहइ जउन आपन पड़ोसी क चउहदी-चीन्हा क खिसकावत ह ।’

“तब सबहिं लोग कइहीं, ‘आमीन !’

१८ “लेवी बंसी कइहीं: ‘उ व्यक्ति अभिसापित अहइ जउन आँधर क कुमार्ग पर चलावत ह।’

“तब सबहि लोग कइहीं, ‘आमीन!’

१९ “लेवी बंसी कइहीं: ‘उ व्यक्ति अभिसापित अहइ जउन बिदेसियन, अनाथन अउर राँड मेहररुअन क संग निआव नाही करत।’

“तब सब लोग कइहीं, ‘आमीन!’

२० “लेवी बंसी कइहीं: ‘उ व्यक्ति अभिसापित अहइ जउन आपन बाप क पत्नी क संग तने क सम्बंध रखत ह काहेकि उ आपन बाप क नंगा क तरह करत ह।’

“तब सबहि लोग कइहीं, ‘आमीन!’

२१ “लेवी बंसी कइहीं: ‘उ व्यक्ति अभिसापित अहइ जउन कउनो तरह क जनावर क संग तने क सम्बंध रखत ह।’

“तब सबहि लोग कइहीं, ‘आमीन!’

२२ “लेवी बंसी कइहीं: ‘उ व्यक्ति अभिसापित अहइ जउन आपन महतारी क बिटिया या आपन बाप क बिटिया, आपन बहिन क संग तने क सम्बंध रखत ह।’

“तब सबहि लोग कइहीं, ‘आमीन!’

२३ “लेवी बंसी कइहीं: ‘उ व्यक्ति अभिसापित बाटइ जउन आपन सास क संग तने क सम्बंध रखत ह।’

“तब सबहि लोग कइहीं, ‘आमीन।’

२४ “लेवी बंसी कइहीं: ‘उ व्यक्ति अभिसापित अहइ जउन दूसर मनई क लुकाई क कतल करत ह।’

“तब सबहि लोग कइहीं, ‘आमीन।’

२५ “लेवी बंसी कइहीं: ‘उ व्यक्ति अभिसापित अहइ जउन निदोख क कतल बरे धन वसूलत ह।’

“तब सबहि लोग कइहीं, ‘आमीन।’

२६ “लेवी बंसी कइहीं: ‘उ व्यक्ति अभिसापित अहइ जउन इ उपदेसन क समर्थन नाही करत अउर ओका पालन नाही करत।’

“तब सबहि लोग कइहीं, ‘आमीन।’

आसीबांद

२८ १ “अगर तू पचे यहोवा आपन परमेस्सर क इ सबइ कानून क मानइ मैं होसियार रहब्या अउर ओका सावधानी स पालन करब्या जेनका मई आजु बतावत हउँ तउ यहोवा तोहार

परमेस्सर तू पचन्क धरती क सब रास्ट्रन क ऊपर सुरेस्ट करी। २ अगर तू यहोवा आपन परमेस्सर क आदेसन क मनब्या तउ इ सबइ वरदान तोहरे लगे अइहीं अउर तोहार होइहीं :

३ “तोहरे सहरन अउ खेतन क

असीसी कीन्ह जाब्या।

४ तोहरे गदेलन क आसीबांद दीन्ह जाई।

उ तोहरी भुइँया क

बढ़िया फसिल क वरदान देइ

अउर तोहरे गोरुअन क

बच्चन देइ क वरदान देइ।

तोहरे लगे बहोत स मवेसी अउर भेइ होइहीं।

५ यहोवा तू पचन्क बढ़िया अनाज क फसिल अउर बहोत जियादा भोजन पावइ क असीसी।

६ तू पचन्क आसीबांद दीन्ह जाई जब तू पचन्क आवई अउर जावई।

७ “यहोवा तू पचन्क ओन दुस्मनन पइ विजयी बनाई जउन तोहरे खिलाफ होइहीं। तोहार दुस्मन तोहरे खिलाफ एक रस्ता स अइहीं मुला उ पचे तोहरे समन्वा सात टु राहे मैं पराइ जइहीं।

८ “यहोवा तू पचन्क खरिहान क आसीबांद देइ। तू पचे जउन कछू तू करब्या उ ओकरे बरे आसीबांद देइ। उ पचे तोहका उ भुइँया पइ आसीबांद देइ जेका यहोवा तोहार परमेस्सर तोहाका दिहेस ह।

९ यहोवा तू पचन्क आपन खास लोग बनाई। यहोवा तू पचन्क इ वचन दिहे अहइ मुला सतँ इ बाटइ कि तू पचे यहोवा आपन परमेस्सर क हुकुमन क माना अउ ओनकइ राहे पइ चला।

१० तब धरती क सबहि लोग इ लखिहीं कि तू पचे यहोवा क नाउँ स जाना जात अहा अउर उ पचे तोहसे सबन्स डेराइ जइहीं।

११ “अउर यहोवा तू पचन्क बहोत स बढ़िया चीज देइ। उ तू पचन्क बहोत स गदेलन देइ। उ तू पचन्क बहोत स गोरु अउ बछुवन क देइ। उ उ देस मैं बहोत-स बढ़िया फसिल देइ जेका उ पचे तोहरे पुरखन क देइ क वचन दिहे रहने। १२ यहोवा सरग मैं आपन भण्डार खोलि देइ। उ आपन वरदान स तोहरी भुइँया बरे ठीक समइ पइ बर्खा देइ। यहोवा जउन कछू तू पचे करब्या ओकरे बरे आसीबांद देइ अउर बहोत स रास्ट्रन क कर्ज देइ बरे तोहरे पचन्क लगे धन होइ। मुला तू पचन्क ओन से कछू उधार लेइ क जरूरत नाही होइ। १३ यहोवा तू पचन्क मूँइ बनाई, पूँछ नाही। तू पचे चोटी पइ होब्या, तलहटी पइ नाही। इ तब होइ जब तू पचे यहोवा आपन परमेस्सर क ओन आदेसन

पड़ धियान देब्या जेनका मई आजु तू पचन्क देत अहउँ।^{१४} तू पचन्क ओन सिच्छन मँ स कउनो क उपेच्छा नाही करइ चाही जेनका मई आजु तू पचन्क देत हउँ। तू पचन्क एँसे दाई या बाई कईती नाही जाइ चाही। तू पचन्क उपासना बरे दूसर देवतन क पाछे नाही चलइ चाही।

अभिसाप

^{१५} “अगर तू यहोवा आपन परमेस्सर क जरिये कही गइ बातन पड़ धियान नाही देत्या अउर आजु मई जउने आदेसन अउ नेमन क बतावत अहउँ, होसियारी स पालन नाही करत्या तउ इ सबइ अभिसाप तू पचन्प अइहीं।

^{१६} “तोहका तोहरे सहरन अउर मइदानन मँ अभिसापित कीन्ह जाइ।

^{१७} यहोवा तोहरी टोकरियन अउ बर्तनन क अभिसापित करी।

अउ तू पचन्क काफी भोजन नाही मिली।

^{१८} तू पचन्क गदेलन

अभिसाप पइहीं।

तोहरी धरती क फसलन

तोहरे गोरुअन क बछवन

अउ तोहरे झुण्डे क बचन

अभिसाप पइहीं।

^{१९} तू आपन आवइ

अउर जावइ पइ अभिसापित कीन्ह जाब्या।

^{२०} “अगर तू पचे बुरा काम करब्या अउर आपन यहोवा स मुँह फेर लेब्या, तउ तू पचे अभिसाप पउब्या। तू पचे जउन कछू करब्या ओहमाँ तू पचन्क क अव्यवस्था अउ फटकार क सामना करइ क होइ। उ इ तब तलक करी जब तलक तू पचे हाली स अउ पूरी तरह स बरबाद नाही होइ जात्या।^{२१} अगर तू पचे यहोवा क हुकुम नाही मनत्या तउ उ तू पचन्क तब तलक महामारी स दुखी करत रही जब तलक तू उ देस मँ पूरी तरह बरबाद नाही होइ जात्या जेहमाँ तू पचे रहइ बरे प्रवेस करत अहा।^{२२} यहोवा तू पचन्क रोग स दुखी अउ दुर्बल होइ क दण्ड देइ। तू पचन्क बोखार अउ सूजन होइ। यहोवा तोहरे लगे भयंकर गर्मी पठइ अउर तोहरे हिआँ बर्खा नाही होइ। तोहार फसलन गर्मी अउ रोग §§स बरबाद होइ जइहीं। तू पचक इ सबइ मुसीबतन तब तलक अइहीं जब तलक तू पचे मर नाही जात्या।^{२३} अकासे

मँ कउनो बादल नाही रही अउर आकास काँसा सरीखा होइ जाइ। अउर तोहरे पचन्क खाले धरती लोहा क सरीखा होइ।^{२४} बर्खा क बदले यहोवा तोहरे पास अकासे स रेत अउ धूरि पठइ। इ तोहे सबन पइ तब तलक आइ जब तलक तू पचे बरबाद नाही होइ जात्या। दुस्मनन स हार जाइ क अभिसाप

^{२५} “यहोवा तोहरे पचन्क दुस्मनन क जरिये तू पचन्क हराइ। तू पचे आपन दुस्मनन क खिलाफ एक राहे स जाब्या अउर ओनके समन्वा स सात टु राहे स पराइ जाब्या। तोहरे सबन क ऊपर जउन मुसीबतन अइहीं उ सबइ सारी धरती क लोगन क डेरवाइ देइहीं।^{२६} तोहार पचन्क क ल्हासियन क सबइ जंगली जनावर अउ पंछियन क चारा बनिहीं। कउनो मनई ओनका डेराइके तोहरी ल्हासियन स पराइवाला न होइ। दूसर रोगन क अभिसाप

^{२७} “अगर तू यहोवा क हुकुम क नाही मनत्या तउ उ तू पचन्क वइसेन फोड़ा होइ क सजा देइ जइसे फोड़न क उ मिसरी लोगन पइ पटए रहा। उ तू पचन्क ला-इलाज सूजन, पीड़ा युक्त फोड़न अउ खजुरी स दुःखी करी।^{२८} यहोवा तू पचन्क पागल बनाइके सजा देइ। उ तू पचन्क आँधर बनाइ अउ उलझन मँ डाइ देइ।^{२९} तू पचन्क दिन क प्रकास मँ आँधर क नाई आपन राह टटोलइ क होइ। तू पचे जउन कछू करब्या ओहमाँ तू पचे असफल रहब्या। लोग तू पचन्क बार बार प्रहार करिहीं अउर तोहार चिजियन क चोरइहीं। तू पचन्क बचावइवाला हुआँ कउनो भी न होइ। चीज हेराइ क अभिसाप

^{३०} “तोहार बियाह कउनो मेहरारू क संग पक्का होइ सकत ह, मुला कउनो दूसर मनई ओकरे संग बलत्कार करी। तू पचे कउनो घर बनाइ सकत ह, मुला तू पचे ओहमाँ रहब्या नाही। तू पचे अंगूर क बगिया लगाइ सकत ह, मुला एहसे कछू भी बटोर नाही सकत्या।^{३१} तोहार बर्धा तोहरी आँखिन क समन्वा मारा जाइ मुला ओकर कछू भी गोस नाही खाइ सकत्या। तोहार पचन्क गदहाँ तू पचन्स जवरदस्ती हरिके लइ जावा जाइ इ तू पचन्क लउटा नाही जाइ। तोहार पचन्क भेड़ तोहरे दुस्मनन क दइ दीन्ह जइहीं। तोहार पचन्क क रच्छक कउनो भी मनई न होइ।

§§२८ :२२ रोग इ हरदा रोग होइ सकत ह जेहमे फसलन क बाल पिअर पड़ जात ही अउर ओनमाँ दाना आउब रुकि जात ह।

३२ “तोहार पचन्क पतन अउ बिटियन दूसर जाति क मनइयन क दइ दीन्ह जइहीं। तोहार अखियन गदेलन क निहारइ बरे सारे दिन टकटकी लगाए रइहीं काहेकि तू पचे गदेलन क लखइ चहब्या। मुला तू पचे जोहत जोहत कमजोर होइ जाब्या, तू पचे असहाय होइ जाब्या। दूसर अभिसाप

३३ “उ रास्टर जेका तू पचे नाहीं जनत्या, तोहरे पसीना क कमाई क फसिल खाब्या अउ आनन्दित होब्या। तोहार संग सदा दुरव्यवहार अउ दुरुपयोग कीन्ह जाब्या। ३४ जउन चिजियन क तू लखब तोहका दीवाना बनाइ देब। ३५ यहोवा तू पचन्क दर्दवाला फोड़न क सजा देइ। इ सबइ फोड़न तोहरे घुटनन अउ गोड़न पइ होइहीं। उ सबइ तोहरे पचन्क क तलवा स लइके मूडे क ऊपर तलक फइल जइहीं अउ तोहार पचन्क इ फोड़न भरिहीं जाहीं।

३६ “यहोवा तू पचन्क अउ तोहरे राजा जेका तू आपन बरे चुनेस ह, क उ रास्टर म पठइ जेका तू पचे नाहीं जानत होब्या। तू पचे अउ तोहार पुरखन उ रास्टर क कबहुं नाहीं लखे होइहीं। हुआँ तू पचे काठ अउ पाथर क बने भए दूसर देवतन क पूजब्या। ३७ जउने देसन मैं यहोवा तू पचन्क पठइ ओन देसन क लोग तू लोगन पइ आइ भइ मुसीबतन क सुनिके हक्का बक्का रहि जइहीं। उ पचे तोहार हंसी उड़इहीं अउ तोहार निन्दा करिहीं।

विफल होइ क अभिसाप

३८ “तू पचे आपन खेतन मैं बोवइ बरे जरूरत स जियादा बहोत जियादा बिआ लइ जाब्या। मुला तोहार उपज कमती होइ। काहेकि टिड्डियन तोहार फसिल चाट जइहीं। ३९ तू पचे अंगूरे क बगिआ लगउब्या अउ ओहमाँ कठिन मेहनत करब्या। मुला तू पचे ओहमाँ स अंगूर बटोरब्या नाहीं अउ न ही ओनसे दाखरस पीब्या। काहेकि ओनका किरवन खाइ लेइहीं। ४० तोहरी सारी भुइँआ मैं जइतून क बृच्छ होइहीं। मुला तू पचे ओकरे कछु भी तेले क उपयोग नाहीं कइ सकब्या। काहेकि तोहरे जइतून क बृच्छ आपन फलन क बरबाद होइ बरे गिराइ देइहीं। ४१ तोहरे पचन्क पतन अउ बिटियन होइहीं, मुला तू पचे ओनका आपन लगे नाहीं रख सकब्या। काहेकि उ पचे धरिके दूर लइ जावा जइहीं। ४२ टिड्डियन तोहरे सबहिं खेतन अउ फलन क नास कइ देइहीं। ४३ तोहरे बीच रहइवाले विदेसी जियादा

स जियादा सक्ती बढ़ावत जइहीं अउर तू पचन मैं जउन भी सक्ती बाटइ ओका खोवत जाब्या। ४४ उ पचे तोहका उधार देइ, मुला तू पचन्क ओका उधार देइ क जोगग धन नाहीं होइ। उ पचे मूडे क नाई होइ। तू पचे पूँछे, क नाई बन जाब्या। अभिसाप इस्त्राएलियन क बरबाद करिहीं

४५ “इ सबइ अभिसाप तू पचन्प पड़िहीं। उ पचे तोहार पाछा तब तलक करत रइहीं अउर तू पचन्क गहियाइके धरे रइहीं जब तलक तू पचे बरबाद नाहीं होइ जात्या। काहेकि तू पचे यहोवा आपन परमेस्सर क कही भइ बातन क परवाह नाहीं किह्या। तू पचे ओकरे ओन आदेसन अउ नेमन क नाहीं मान्या जेका उ तू पचन्क दिहस। ४६ इ सबइ अभिसाप मनइयन क बतइहीं कि परमेस्सर तू अउर तोहरे पचन्क संतानन क संग सदा ही निआव किहस ह।

४७ “यहोवा तोहार परमेस्सर तू पचन्क बहोत स बरदान दिहस मुला तू पचे ओकर सेवा खुसी स अउ उल्लास स भरे भए हिरदय स नाहीं किह्या। ४८ एह बरे तू पचे आपन ओन दुस्मनन क सेवा करब्या जेनका यहोवा, तोहरे पचन्क खिलाफ पठइ। तू पचे भूखा, पिआसा अउर नंगा रहब्या। तोहरे लगे कछु भी न होइ। यहोवा तोहरी गर्दन पइ एक ठु लोहे क जुवा तब तलक धरी जब तलक तू पचन्क बरबाद नाहीं होइ जाइ।

दुस्मन रास्टर क अभिसाप

४९ “यहोवा तोहरे खिलाफ बहोत दूर स एक रास्टर क लिआइ। इ रास्टर पृथ्वी क दूसर कइती स आइ। इ रास्टर तोहरे ऊपर अकासे स उतरत उकाब पंछी क नाई हाली स हमला करी। तू पचे इ रास्टर क भाखा नाहीं समुझ पउब्या। ५० इ रास्टर क मनइयन क चेहरा कठोर होइहीं। उ पचे बुढ़वा लोगन क परवाह न करिहीं। उ पचे नान्ह नान्ह गदेलन पइ भी दयालु नाहीं होइहीं। ५१ उ पचे तोहरे गोरुअन क बछवन अउ तोहरी धरती क फसिल तू पचे बरबाद होइ तलक खाइ। उ पचे तोहरे बरे अनाज, नई दाखरस, तेल, तोहरे गोरुअन क बछवन या तोहरे झुण्ड क भेड़ी क बच्चन क नाहीं छोड़िहीं। उ पचे इ तब तलक करत रइहीं जब तलक तू पचे नस्ट नाहीं होइ जात्या।

५२ “इ रास्टर तोहरे सबहिं सहरन क घेरि लेइ। तू पचे आपन सहरन क चारिहुँ कइती ऊँची अउ मजबूत देवारे पइ भरोसा रखत अहा। मुला तोहरे देस मैं इ सबइ देवारन हर जगह भहराइ जइहीं। हाँ, उ रास्टर तोहरे उ देस क सबहिं सहरन

पड़ हमला करी जेका यहोवा तोहार परमेस्सर तू पचन्क देत अहइ।^{५३} जब तलक तोहार दुस्मन तोहरे सहर क घेरा डाए रही तब तलक तोहार बड़का नोस्कान होत रही। तू पचे एतना भूखा रहब्या कि आपन गदेलन क भी खाइ जाब्या। तू पचे आपन पूतन अउ बिटियन क गोस खाब्या जेनका यहोवा तोहार परमेस्सर तू पचन्क दिहे बाटइ।

^{५४} “तोहार बहोत विनमर सज्जन मनई भी आपन गदेलन, भाइयन, आपन पियारि पत्नी अउ बचे भए गदेलन क संग निरदयी होइके बेउहार करी।^{५५} ओकरे लगे आपन सहरन पड़ दुस्मन क हमला अउ घेराबन्दी क कारण कछू भी खाइ क नाही होइ। एह बरे उ आपन गदेलन क खाइ। मुला उ आपन परिवार क बचे भए सदस्सन क कछू नाही देइ।

^{५६} “तोहरे पचन्क बीच सब त जियादा विनमर अउ सुकुमार मेहरारू भी उहइ करी। अइसी धन्नासेठ अउ सुकुमार मेहरारू भी जउन कहूँ जाइ बरे भुइया पड़ गोड़ भी न रखे होइ। उ आपन पियारा भतार या गदेलन क संग हीसा बँटावइ क विरोध करी।^{५७} उ जनम क बाद आपन ही गरभ क खेड़ी क खाइ अउ उ गदेलन क भी जेका उ जन्मी। उ ओका छिपा रुप स खाइ। काहेकि हुआँ कछू भी खइया क नाही बचा बाटइ। इ तब होइ जब तोहार दुस्मन तोहरे सहरन क खिलाफ घेरा डाली अउर बहोत जियादा कस्ट पहोंचाइ।

^{५८} “इ किताबे में जेतना सब्दन अउ नेम लिखा बाटेन ओन सबन्क तू पचन्क मानइ चाही। तू पचन्क यहोवा आपन परमेस्सर क सम्मानित अउर महिमामय नाउँ क सम्मान करइ चाही। अगर तू पचे ऐनका नाही मनत्या^{५९} तउ यहोवा तू पचन्क खउफनाक मुसीबत में डाइ देइ अउर तोहार सन्तानन खउफनाक मुसीबत उठइहीं अउर ओनका भयंकर रोग होइ जइहीं जउन लम्बे समइ तलक रइहीं^{६०} यहोवा मिस्र स सबहिं बेरमियन क लिआइ जेनसे तू पचे डैरात अहा। इ सबइ बेरमियन तू लोगन में रइहीं।^{६१} यहोवा ओन बेरमियन अउ परेसानियन क तोहरे बीच लिआइ जउन इ व्यवस्था क किताब में नाही लिखी गइ अहइ। उ इ तब तलक करत रही जब तलक तू पचे नस्ट नाही होइ जात्या।^{६२} तू पचे एतना जियादा होइ सकत ह जेतना अकासे में तारा अहइ। मुला तू पचन में कछू ही बचा रइहीं। तू पचन्क संग इ काहे होइ? काहेकि तू पचे यहोवा आपन परमेस्सर क बात नाही मान्या।

^{६३} “पहिले यहोवा तोहार भलाइ करइ अउ तोहरे रास्टर क बढ़ावइ में खुस रहा। उहइ तरह यहोवा तू पचन्क नस्ट अउ बरबाद करइ में खुस होइ। तू पचे उ देस स बाहेर लइ जावा जाब्या जेका तू पचे आपन बनावइ बरे ओहमाँ प्रवेस करत अहा।^{६४} यहोवा तू पचन्क पृथ्वी क एक छोरि स दूसर छोरि तलक संसार क सबहिं लोगन में बिखेर देइ। हुआँ तू पचे दूसर काठ अउ पाथर क देवतन क पूजब्या जेनका तू पचे अउ तोहार पुरखन कबहुँ नाही पूजेन।

^{६५} “तू पचन्क एन रास्टरन क बीच तनिकउ भी सान्ति नाही मिली। तू पचन्क आराम क कउनो जगह नाही मिली। यहोवा तू पचन्क दिमागन्क सबइ चिन्ता स भरि देइ। तोहार सबन्क आँखिन पथराइ जइहीं। तू पचे आपन क उखड़ा भवा महसूस करब्या।^{६६} तू पचे संकट में रहब्या। तू पचे दिन-रात डेरान रहब्या। सदा ह सन्देह में घिरा रहब्या। तू पचे आपन जिन्नगी में कबहुँ सुरच्छित नाही रहब्या।^{६७} भिन्सारे तू पचे कहब्या, ‘अच्छा होत, इ साँझ होत।’ साँझ क तू पचे कहब्या, ‘अच्छा होत, इ भिन्सारे होत!’ काहेकि उ भय क कारण अउर ओकरे कारण जउन तू पचे लखब्या।^{६८} यहोवा तू पचन्क जहाजन में मिस्र वापस पठइ। मई इ कहेउँ कि तू पचे उ जगह पड़ दुबारा कबहुँ नाही जाब्या। मुला यहोवा तू पचन्क हुआँ पठइ। अउर हुआँ तू पचे आपन क आपन दुस्मनन क हाथे मनसेधु अउ मेहरारू दास क रुप में बेचइ क कोसिस करब्या, मुला कउनो मनई तू पचन्क बेसही नाही।”

मोआब में वाचा

२९ ^१इ सबइ बातन उ वाचा क अंग अहइ जउन वाचा क यहोवा मोआब प्रदेश में इस्राएल क लोगन क संग मूसा स करइ क कहेस। यहोवा इ वाचा क उ वचन स अलवा किहस जेका उ इस्राएल क लोगन क संग होरेब पहाड़े पड़ किहे रहा।

^२मूसा सबहिं इस्राएली मनइयन क बटोरिके बोलाएस। उ ओनसे कहेस, “तू पचे उ सब कछू लख्या ह जउन यहोवा मिस्र देस में किहस। तू पचे उ सब भी लख्या जउन फिरौन, फिरौन क प्रमुखन अउ ओकरे पूरे देस क संग किहस।^३ तू पचे ओन बड़की मुसीबतन क लख्या ह जउन उ ओनका दिहस। तू पचे ओकरे ओन चमत्कारन अउ बड़के अचरजन क लख्या ह जउन उ किहस।^४ मुला आजु भी तू पचे नाही समझत्या कि का

भवा। यहोवा सचमुच तू पचन्क नाहीं समझाएस जउन तू पचे लख्या अउ सुन्या ह।^५ मइँ तू पचन्क चालीस बरिस तलक रेगिस्ताने स होइके लइ जात रहा अउर उ लम्बे समइ क बीच तोहार पचन्क ओढ़ना अउ पनही फाटिके खतम नाहीं भएन।^६ तोहरे लगे कछू भी भोजन नाहीं रहा। तोहरे पचन्क लगे कछू भी दाखरस या कउनो उतेजित करइवाला पिअइ क चीज नाहीं रही। किन्तु यहोवा तोहारा देख-रेख किहस। उ इ एह बरे किहस कि तू पचे समुझ पउब्या कि उ यहोवा तोहार सबन्क परमेस्सर अहइ।

^७ “जब तू पचे इ ठउरे पइ आया तबहिँ हेसबोन क राजा सीहोन अउ बासान क राजा ओग हम लोगन क खिलाफ लइइ आएन। मुला हम पचे ओनका हरावा।^८ तब हम लोग इ सबइ पढँटा रूबेनियन, गादियन अउ मनस्से क आधे लोगन क ओनकइ कब्जा मँ दइ दीन्ह।^९ एह बरे, इ वाचा क आदेसन क पूरी तरह माना। तब जउन कछू तू पचे करब्या ओहमाँ सफल होब्या।

^{१०} “आजु तू पचे सबहिँ यहोवा आपन परमेस्सर क समन्वा ठाइ अहा। तोहरे पचन्क प्रमुखन, तोहार परिवार समूहन, तोहार पचन्क अफसरन, तोहार पचन्क बुजुर्गन (प्रमुखन) अउर सबहिँ दूसर लोग हिआँ अहइँ।^{११} तोहार पचन्क पत्नियन अउ गदेलन हिआँ अहइँ अउर उ सबइ विदेसी भी हिआँ अहइँ जउन तोहरे बीच रहत हीं अउ तोहार लकड़िन क काटत अउर पानी भरत हीं।^{१२} तू पचे सबहिँ हिआँ यहोवा आपन परमेससर क संग एक ठु वाचा करइवाला अहा। यहोवा तू लोगन क संग इ वाचा आजु करत अहइ।^{१३} इ वाचा क जरिये यहोवा तू पचन्क आपन खास लोग बनावत अहइ अउर उ खुद तोहार परमेस्सर होइ। उ तोहरे पुरखन इब्राहीम, इसहाक अउ याकूब क इ वचन दिहे रहा।^{१४} यहोवा आपन वचन दइके सिरिफ तू लोगन क संग ही वाचा नाहीं करत अहइ।^{१५} उ इ वाचा हम सबहिँ क संग करत अहइ जउन हिआँ यहोवा आपन परमेस्सर क समन्वा ठाइ अहइँ। मुला इ वाचा हमरे ओन संतानन क बरे भी अहइ जउन हिआँ आजु हम लोगन क संग नाहीं अहइँ।^{१६} तू पचन्क याद अहइ कि हम मिस्र मँ कइसे रहत रहेन अउ कइसे सारा रास्टरन क जात्रा कीन्ह ह जउन हिआँ तलक हमरे राहे पइ रहेन।^{१७} तू पचे ओनकइ घिनौनी चिजियन यानी

काठ, पाथर, चाँदी अउ सोना क बनी देवमूरतियन लखेन।^{१८} टान ल्या कि आजु हिआँ हम लोगन मँ कउनो अइसा मनसेधू, मेहरारू, परिवार या परिवार समूह नाहीं अहइ जउन यहोवा, आपन परमेससर क खिलाफ जात होइ। कउनो भी मनई ओन रास्टरन क देवतन क सेवा करइ नाहीं जाइ चाही। जउन लोग अइसा करत हीं उ पचे उ पौधन क नाई अहइँ जउन करूआ, जहरीला फल पइदा करत होइ।

^{१९} “कउनो मनई इ अभिसापन क सुन सकत ह अउर आपन क संतोख देत भवा कहि सकत ह, मइँ जउन चाहत हउँ करत रहब। मोर कछू भी बुरा भी नाहीं होइ।’ उ मनई आपन ऊपर ही मुसीबत नाहीं बोलाइ मुला उ सबन क ऊपर, अच्छे लोगन प भी बोलाइ।^{२०-२१} यहोवा उ मनई क छिमा नाहीं करी। नाहीं, यहोवा उ मनई पइ कोहाइ जाइ अउर ओका सजा देइ। इ किताबे मँ लिखे भए सबहिँ अभिसापन ओह पइ पड़िहीं। यहोवा ओका इस्राएल क सबहिँ परिवार समूहन स निकारिके बाहरे करी। यहोवा ओका पूरी तरह बरबाद करी। सबहिँ आपत्तियन जउन इ किताबे मँ लिखी गइ अहइँ, ओह पइ अइहीं। उ सबइ सबहिँ बातन उ वाचा क हीसा अहइँ जउन व्यवस्था क किताब मँ लिखी गइ अहइँ।

^{२२} “भविस्स मँ, तोहार सन्तानन अउ बहोत दूर क देसन स आवइवाले विदेसी लोग लखिहीं कि देस कइसे बरबाद होइ गवा अहइ। उ पचे ओन बेमारियन क लखिहीं जेनका यहोवा ओन लोगन मँ लिआइ।^{२३} सारा देस बरत भए गन्धक अउ जोन स ढका भवा बेकार होइ जाइ। भुईया मँ कछू भी बोवा भवा नाहीं रही। कछू भी, हिआँ तलक खर-पतवार भी हिआँ नाहीं उगिहीं। इ देस ओन नगरन-सदोम, अमोरा, अदमा अउर सबोयीम क तरह बरबाद कइ दीन्ह जाइ। जेनका यहोवा, तब बरबाद किहे रहा, जब उ बहोत कोहान रहा।

^{२४} “सबहिँ दूसर रास्टर पूछिहीं, यहोवा इ देस क संग अइसा काहे किहस ? उ एतना कोहान काहे रहा ?”^{२५} उ इ जबाब देइ, ‘इस्राएली लोग उ करार क सम्मान नाहीं किहसे जेका यहोवा ओकर बापन स किहसे अहइ। उ पचे उ वाचा क मानब बन्द कइ दिहेन जेका यहोवा ओनके संग तब किहे रहा जब उ ओनका मिस्र देस स बाहरे लिआए रहा।^{२६} इस्राएल क लोग अइसे दूसर देवतन

*२९:१९ उ मनई ... बोलाइ सब्द क अरथ “ओकरे जरिये तू अउर पिआसा दुइनउँ बरबाद कीन्ह जइहीं।

क पूजा, सेवा अउ मानवइ सुरु किहेन जेनकर पूजा क गियान ओनका पहिले कबहुँ नाहीं रहा। यहोवा आपन लोगन स ओन देवतन क पूजा करव मना किहे रहा।^{२७} इहइ कारण अहइ कि यहोवा इ लोगन क खिलाफ बहोत कोहाइ ग रहा। एह बरे उ इ किताब मँ लिखे भए सबहिँ अभिसापन क एँन पइ लागू किहस।^{२८} यहोवा ओन पइ बहोत कोहाइ गवा अउर ओन पइ बउखलाइ उठा। एह बरे ओनके देस स ओनका बाहेर किहस। उ ओनका दूसर देस मँ पठएस जहाँ उ पचे आजु अहइ।^१

^{२९} “कछू अइसी बातन अहइ जेनका यहोवा हमार परमेस्सर छुपाए रखेस ह। ओन बातन क सिरिफ उ ही जानत ह। मुला यहोवा हमका आपन नेमन क जानकारी दइ दिहस ह। इ व्यवस्था हमरे बरे अउ हमरे संताने बरे अहइ। हम पचन्क एँका सदा मानइ चाही।

इस्राएलियन क वापसी क बचन

३० ^१ “जउन मइँ कहेउँ ह तू पचन पइ होइके रही। तू पचे आसीबाँद स बढ़िया चीजन पउब्या अउ अभिसाप स बुरी चीजन पउब्या। यहोवा तोहार परमेस्सर तू पचन्क दूसर रास्ट्रन मँ पठई। तब तू पचे एकरे बारे मँ सोचब्या।^२ उ समइ तू पचे अउर तोहार संतानन यहोवा, आपन परमेस्सर क लगे लौटिहीं। तू पचे पूरा तन-मन स ओन आदेसन क मनब्या जउन आजु हम पचे दीन्ह ह।^३ तबहिँ यहोवा तोहार पचन्क परमेस्सर तू पचन्पइ दयालु होइ। यहोवा तू पचन्क फुन अजाद करी। उ ओन रास्ट्रन स तू पचन्क लउटाई जहाँ उ तू पचन्क पठए रहा।^४ चाहे तू पचे पृथ्वी क सब त दूर जगह पइ पठइ दीन्ह गवा होइ, यहोवा तोहार परमेस्सर तू पचन्क बटोरी अउर तू पचन्क हुआँ स वापस लिआइ।^५ यहोवा तू पचन्क उ देस मँ लिआइ जउन तोहरे पुरखन क रहा अउर उ देस तोहार होइ। यहोवा तोहार भला करी अउर तोहरे लगे ओसे जियादा होइ, जेतना तोहरे पुरखन क लगे रहा अउर तोहरे रास्ट्र मँ ओसे जियादा लोग जेतना ओनके लगे कबहुँ रहेन।^६ यहोवा तोहार परमेस्सर, तू पचन्क अउ तोहरे संतानन क हिरदय क खतना करी कि उ सबइ ओकरी अग्या मानइ चइहीं। तब तू पचे यहोवा क आपन सम्पूर्ण हिरदय अउ आतिमा स पिरम करब्या अउर तू पचे जिअत रहब्या।

^७ “अउर यहोवा तोहार परमेस्सर इ सबइ अभिसापन क तोहरे ओन दुस्मनन पइ उतारी जउन तोहसे घिना करत हीँ अउर तू पचन्क परेसान करत हीँ^८ अउर तू फुन यहोवा क आग्या क मनब्या। तू पचे ओन सबहिँ आदेसन क मनब्या जेनका मइँ आजु तू पचन्क दिहेउँ ह।^९ यहोवा तोहार परमेस्सर तू पचन्क ओन सब मँ सफल बनाई जउन तू पचे करब्या। उ तू पचन्क बहोत स गदेलन बरे, तोहरे गोरुअन क बहोत बछुवन अउर तोहरे खेतन क नीक फसल होइ क वरदान देइ। यहोवा तोहरे बरे भला होइ। यहोवा तोहार भला करइ मँ वइसेन ही खुस होइ जइसेन खुस उ तोहरे पुरखन क भला करइ मँ होत रहा।^{१०} मुला तू पचन्क उ सब कछू जरूर करइ चाही जउन यहोवा तोहार परमेस्सर तू पचन्स करइ बरे कहत ह। तू पचन्क ओकरे अउ हुकुमन जउन व्यवस्था क किताबे मँ लिखे भए क जरूर मानइ चाही। तू पचन्क यहोवा आपन परमेस्सर कइँती आपन पूरा हिरदय अउर आतिमा स अर्पित होइ जाइ चाही।

जिअब या मरव

^{११} “आजु जउन आदेसन क मइँ तू पचन्क देत हउँ, उ तोहरे बरे बहोत कठिन नाहीं बा। इ तोहरी पहाँच क बाहेर नाहीं अहइ।^{१२} इ आदेस सरग मँ नाहीं अहइ जेहसे तू पचन्क कहइ क पइइ ‘हम लोगन बरे सरगे मँ कउन जाइ अउ ओका हम लोगन क लगे लिआइ जेहसे हम पचे ओका सुनि सकी अउर ओकर पालन करइ सकी?’^{१३} इ आदेस समुदर क दूसरे पार नाहीं अहइ जेहसे तू पचे इ कहा कि ‘हमरे बरे समुदर कउन पार करी अउर एँका लिआइ जेहसे हम पचे एँका सुनि सकी अउर कइ सकी?’^{१४} नाहीं, यहोवा क बचन तोहरे लगे अहइ। इ तोहरे मुँह अउर तोहरे हिरदय मँ अहइ जेहसे तू पचे एँका कइ सका।

^{१५} “मइँ आजु तोहरे पचन्क समन्वा जिन्नगी अउ मउत, समृद्धि अउ विनास धइ दिहेउँ ह।^{१६} मइँ आजु तू पचन्क आदेस देत अहउँ कि यहोवा आपन परमेसर स पिरम करा, ओकरे राहे पइ चला अउ ओकरे आदेसन, नेमन अउ हुकुमन क माना। तब तू पचे जिअत रहब्या अउ तोहार रास्ट्र जियादा तादाद मँ होइ। अउर यहोवा तोहार परमेस्सर तू पचन्क उ देस मँ आसीबाँद देइ जेका आपन बनावइ बरे तू पचे हुआँ जात अहा।^{१७} मुला अगर तू पचे यहोवा स मुँह फेरत अहा अउ ओकर

नाफरमानी करत अहा अउर दूसर देवतन क सेवा अउ पूजा मँ बहकावा जात अहा।^{१८} तब तू पचे पूरी तरह बरबाद कइ दीन्ह जाब्या। मई चिताउनी देत अहउँ, तू पचे यरदन नदी क पार क उ देस मँ लम्बे समइ तलक नाही रहब्या जेहमाँ आवइ बरे तू पचे तइयार अहा अउर जेका तू पचे आपन बनउब्या।

१९. “आजु मई तू पचन्क दुइ राहन क चुनइ क छूट देत हउँ। मई धरती अउ अकास क तोहरे साच्छी बरे बुलाए हउँ। तू पचे जिन्नगी क चुन सकत ह, या तू पचे मउत क चुन सकत ह। जिन्नगी क चुनब वरदान लिआइ अउर मउत क चुनब अभिशाप। एह बरे जिन्नगी क चुना। तबहि सिरिफ तू पचे अउर तोहार गदेलन जिअत रइहीं।^{२०} तू पचन्क यहोवा आपन परमेस्सर स पिरम करइ चाही अउ ओकर आग्या मानइ चाही। ओसे अउर ओसे चिपक जा। काहेकि यहोवा तोहार जिन्नगी अहइ, अउर यहोवा तू पचन्क उ देस मँ लम्बा जीवन देइ जेका उ तोहरे पुरखन इब्राहीम, इसहाक अउ याकूब क देइ क बचन दिहे रहा।”

यहोसू नवा नेता होइ

३१ १ तब मूसा अगवा बढा अउ इस्राएलियन स इ सबइ बातन कहेस।^२ मूसा ओनसे कहेस, “अब मई एक सौ बीस बरिस क अहउँ। मई अब आगे तोहार नेता क अगुवाइ नाही कइ सकत हउँ। यहोवा मोसे कहेस ह: तू पचे यरदन नदी क पार नाही जाब्या।^३ यहोवा तोहार परमेस्सर तोहरे आगे चली। उ इ सबइ रास्ट्रन क तोहरे पचन्क बरे बरबाद करी। तू पचे ओनकर देस ओसे हर लेब्या। यहोसू ओह पार तू लोगन क अगवा चली। यहोवा इ कहेस ह।

४ “यहोवा इ रास्ट्रन क लोगन क संग उहइ करी जउन उ एमोरियन क राजा लोगन सीहोन अउ ओग क संग किहस। ओन राजा लोगन क देस क संग उ जउन किहस उहइ हिआँ करी। यहोवा ओनकर परदेसन क बरबाद किहस।^५ अउर यहोवा तू पचन्क ओन रास्ट्रन क हरावइ देइ अउर तू पचे ओनके संग उ सब करब्या जेका करइ बरे मई कहेउँ ह।^६ मजबूत अउ हिम्मती बना। इ सबइ रास्ट्रन स डेराअ जिन। काहेकि यहोवा तोहार परमेस्सर तोहरे संग जात अहइ। उ तू पचन्क न छोड़ी अउ तजी।”

७ तब मूसा यहोसू क बोलाएस। जउने समइ मूसा यहोसू स बातन करत रहा ओह समइ इस्राएल क सबहि लोग लखत रहेन। जब मूसा

यहोसू स कहेस, “मजबूत अउ हिम्मती बना। तू इ सबइ लोगन क उ देस मँ लइ जाब्या जेका यहोवा एँनकइ पुरखन क देइ क बचन दिहे रहा। तू इस्राएल क लोगन क मदद उ देस क लेइ अउ आपन बनावइ मँ करब्या।^८ यहोवा आगे चली। उ खुद तोहरे संग अहइ। उ तू पचन्क न मदद देव बन्द करी, न ही तू पचन्क छोड़ी। तू न ही डेरान अउ फिकर मँ रहब्या।”

मूसा व्यवस्था लिखत ह

९ तब मूसा इ कानून क लिखेस अउ लेवी क सन्तान याजक क अउर इस्राएल क सबइ बुजुर्गन क दइ दिहस। ओनकर काम यहोवा क करार क सन्दखे क लइ चलब रहा।^{१०} मूसा ओनका आदेस दिहस, “हर सात बरिस पाछे, कुटीर क त्यौहार मँ इ सबइ नेमन क बाँचा।^{११} उ समइ इस्राएल क सबहि लोग यहोवा, आपन परमेस्सर स मिलइ बरे उ खास ठउरे पइ अइहीं जेका उ पचे चुनिहीं। तब तू लोगन मँ इ सबइ कानून क अइसे बाँचब जेहसे उ पचे सुनि सकइ।^{१२} सबहि लोगन, मनसेधुअन, मेहररुअन, नान्ह गदेलन अउ आपन नगरन मँ रहइवाले सबहि प्रवासियन क बटोरा। उ पचे नेमन क सुनिहीं, अउर उ पचे यहोवा तोहरे परमेस्सर क आदर करब सिखिहीं अउर उ पचे इ नेमन क सब्दन क मानइ मँ होसियार रइहीं^{१३} अउर तब ओनकी संतानन जउन नेमन नाही जानत ह, एँका सुनिहीं अउर उ पचे यहोवा तोहरे परमेस्सर क सम्मान करब सिखिहीं। उ पचे तब तलक सम्मान करिहीं जब तलक तू पचे उ देस मँ रहब्या जेका तू पचे यरदन नदी क ओह पार लेइ बरे तइयार अहा।”

यहोवा मूसा अउ यहोसू क बोलावत ह

१४ यहोवा मूसा स कहेस, “अब तोहरे मरइ क समइ निचके आइ ग अहइ। यहोसू क ल्या अउ मिलापवाला तम्बू मँ जा। मई यहोसू क बताउब कि उ का करइ।” एह बरे मूसा अउ यहोसू मिलापवाला तम्बू मँ गएन अउर आपन क उपस्थित किहसे।

१५ यहोवा बदरन क एक ठु खम्भा क रूप मँ परगट भवा। बदरे क खम्भा तम्बू क दुआरे पइ टाइ रहा।^{१६} यहोवा मूसा स कहेस, “तू हाली ही मरब्या अउर जब तू आपन पुरखन क संग चला जाब्या तउ इ सबइ लोग मोह पइ बिस्सास नाही करब्या। उ पचे उ वाचा क तोड़ देइहीं जउन मई एँनकइ संग किहे अहउँ। उ पचे मोका छोड़ देइहीं।

अउर दूसर देवतन क पूजा करब सुरू करिहीं, ओन प्रदेशन क बनावटी देवतन क जेनमाँ उ पचे जइहीं। १७ उ समइ, मई एँन पइ बहोत कोहाइ जाब अउर एँनका छोड़ देब। मई ओनकी मदद करब बन्द करब अउर उ पचे बरबाद होइ जइहीं। ओनके संग भयंकर सबइ घटना होइहीं अउर उ पचे विपत्ति मँ पड़िहीं। तब उ पचे कइहीं, 'इ सबइ बुरी सबइ घटना हम पचन्क संग एह बरे होति अहई कि हमार परमेस्सर हमरे संग नाही अहइ।' १८ तब मई आपन चेहरा ओन लोगन स छुपाइहीं काहेकि उ पचे बुरा कार्य करिहीं अउर दूसर देवतन क पूजा करिहीं।

१९ "एह बरे इ गीत क लिखा अउर इस्राएली लोगन क सिखावा। ओनका इ गाइ द्या। इ इस्राएल क लोगन क खिलाफ मोरे बरे साच्छी रही। २० मई ओनका उ देस मँ जउन मँ दूध अउर सहद बहत ह अउ जेका देइ क वचन मई ओनके पुरखन क दिहेउँ ह लइ जाब अउर उ पचे संतुट्ट होइ तलक खाब्या। उ पचे अमीरी स भरी जिन्नगी बितइहीं। मुला एँकर बाद उ पचे दूसर देवतन क पूजा अउर ओनकर सेवा करिहीं। उ पचे मोसे मुँहना फेरि लेइहीं अउर मोर वाचा क तोड़िहीं, २१ तब ओन पइ भयंकर आपदा अइहीं अउर उ पचे बड़ी मुसीबत मँ होइहीं। उ समइ ओनके लोग इ गीत क तब भी जनिहीं अउर इ ओनका बताइ कि उ पचे केतनी भूल पइ अहई। मई अभी तलक ओनका उ देस मँ नाही पहाँचाएउ हउँ जेका ओनका देइ क वचन मई दिहेउँ ह। मुला मई पहिले स ही जानत हउँ कि उ पचे हुआँ का कइवाला अहई, काहेकि मई ओनकी आदत स परिचित अहउँ।"

२२ एह बरे मूसा उहइ दिन गीत लिखेस अउ उ गीत क इस्राएल क लोगन क सिखाएउँ।

२३ तब यहोवा नून क पूत यहोसू स बातन किहस। यहोवा कहस, "मजबूत अउ हिम्मती बना। तू इस्राएल क लोगन क उ देस मँ लइ चलब्या जेका ओनका देइ क वचन मई दिहेउँ ह अउर मई तोहरे संग रहब।"

मूसा इस्राएल क लोगन क चिताउनी देत ह

२४ मूसा इ सारे नेमन क सब्दन क एक ठु किताबे मँ लिखेस। जब उ एँका पूरा कइ लिहस तब २५ उ लेवीबंसियन क आदेस दिहस (सबइ लोग यहोवा क करार क सन्दूखे क देख-रेख करत रहेन।) मूसा कहस, २६ "इ व्यवस्था क किताबे क ल्या अउर यहोवा, आपन परमेस्सर क करार क सन्दूखे क

बगल मँ धरा। तब इ हुआँ तोहरे खिलाफ साच्छी होइ। २७ मई जानत हउँ कि तू बहोतइ अड़ियल अहा। मई जानत हउँ तू मनमानी करइ चाहत अहा। धियान द्या, आजु जब मई तोहरे संग हउँ तब भी तू यहोवा क आग्या मानइ स मना किह्या ह। मोरे मरइ क पाछे तू यहोवा क आग्या मानइ स अउर जियादा इन्कार करब्या। २८ आपन सबहि परिवार समूहन क प्रमुखन अउ अफसरन क एक संग बोलावा। मई ओनका इ सब कछू बताउब अउर मई पृथ्वी अउ अकास क ओनके खिलाफ साच्छी होइ बरे बोलाउब। २९ मई जानत हउँ कि मोर मउत क पाछे तू सबइ लोग पूरी तरह भ्रस्ट होइ जाब्या। तू पचे उ राहे स बगद जाब्या जेह पइ चलइ क आदेस मई दिहेउँ ह। तब भविस्स मँ तोहे सबन पइ आपदा अइहीं। काहेकि तू पचे उ करइ चाहत अहा जेका यहोवा बुरा बतावत ह। तोहार बुरा काम करइ क कारण उ पचे तोहस कोहाइ जाब्या।"

मूसा क गीत

३० तब मूसा इस्राएल क सबहि लोगन क गीत सुनाएस। उ तब तलक नाही रुका जब तलक उ एँका पूरा नाही कइ लिहस।

३१ "हे गगन, सुन ल्या मई बोलिहउँ,
३२ पृथ्वी मोरे मुँहना स बात सुनी।

३ मोरे उपदेस बरसिहई बर्खा क नाई,
ओस समान बही पृथ्वी पइ मोरी वाणी,
नरम घासन पइ बर्खा क मन्द झरी सी,
हरिअर पौधन पइ बर्खा सी।

४ मोर वाणी परमेस्सर क नाउँ सुनाई मई कहब,
स्तुति कर, परमेस्सर महान अहइ।

५ "उ (यहोवा) हमार चट्टान अहइ
ओकर सबहि काम पूर्ण अहइ!

काहेकी ओकर सबहि राह उचित अहइ!
उ विस्सास अउ निस्पाप परमेस्सर अहइ
करत जउन उचित अउ सही अहइ।

६ तू लोगन ओकर संग दुर्वउहार किह्या तू ओकर
संग भ्रस्ट तौर पइ बरताव किहस।

तोहार दोस एह बरे नाही कि तू पचे ओकर गदेलन
अहइ।

तू एक दुट्ट अउ पतित पीढ़ी अहा।

७ का इही बेउहार अहइ जेका तू यहोवा स करइ
चाही? नाही!

तू मुख अउ जड़बुद्धि जन अहा।

यहोवा परम पिता तोहार अहइ,

उ तू पचन्क बनाएस, उ आपन जन क मजबूत बनाएस तू पचन्क।

७ “याद करा बीता भवा दिन क सोचा बीती भइ पीढियन क बरिसन क, बुढ़वा पिता स पूछा, उहइ कइहीं आपन प्रमुखन स पूछा;

उहइ कइहीं।

८ सवोच्च परमेस्सर आपन रास्टरन क आपन देसन क दिहस, उ मानव जाति उ विभाजित किहेस उ रास्टरन मँ इस्राएली क सम्बन्ध क बीच सरहद बनाएस।

९ यहोवा क विरासत अहइ ओकर लोग; याकूब यहोवा क आपन अहइ।

१० “यहोवा याकूब क रेगिस्तान मँ पाएस, सुनसान अउ साँय-साँय करइवाली मरुभुइया मँ। यहोवा याकूब क रच्छा बरे ओका चारिहुँ कइती घेर लिहस

उ ओका आँखिन क पुतरी क नाई रच्छा किहेस।
११ यहोवा उकाब क नाई इस्राएल क रच्छा किहस,

जइसे उकाब घोंसला स उठावत ह बच्चन क ओनका उड़इ बरे सिखावत ह।

उ बच्चन क लइके रच्छा करत उड़ति ह उ आपन पखना फइलावत ह जब उ पचे ओका पकड़त हीं।

उ ओनका पखना पइ लइके उड़ति ह अउ सुरच्छित जहग पइ।

परमेस्सर वइसेन अहइ।

१२ अकेल्ले यहोवा याकूब क मारग दरसन किहस, कउनो देवता विदेसी ओकरे लगे न रहेन।

१३ यहोवा याकूब क पृथ्वी क ऊँच जगहन पइ चढ़ाएस,

याकूब खेतन क फसल खाएस,

यहोवा याकूब क पुट्ट चट्टानन क सहद स किहस;

जइतून-तेल ओका वजर-चट्टाने स दिहस,

१४ माखन खरका स दिहस, दूध झुण्ड स दिहस,

गोस भेड़ी अउ बोकन क,

भेड़ा अउ बासान जाति क बोकन स दिहस-बढ़िया स बढ़िया गोहूँ;

लाल अंगूरे क दाखरस दिहस।

१५ “मुला यसूरुन मोटा भवा, साँड़े क नाई लात मारत,

उ बाढ़ा अउ उ भारी भी रहा।

उ ऊँच जाति अउ खूब पाला पोसा गवा उ आपन कर्ता क नकारेस अउर चट्टान बरे ओका अपमान किहेस, जउन उद्धारकर्ता रहा।

१६ जलोटा यहोवा क, दूसर देवन क पूजिके बनाएस! ओकर जन;

कोहाइ दिहन परमेस्सर क आपन मुरतियन स जउन घिनौनी परमेस्सर क रहिन,

१७ उ पचे दानवन क बलि दिहन जउन फुरइ देवतन नाही रहेन ओन देवतन क बलि दिहन जेकर ओनका गियान नाही रहा।

देवतन उ सबइ जेनका न पूजेन कबहुँ तोहार पुरखन नए रहेन।

१८ तू पचे चट्टान क तजि दिहा, तू पचे आपन परमेस्सर क बिसराया जउन जिन्नगी दिहस।

१९ “यहोवा लखेस इ जन क आपन कहइ स इन्कार किहस,

ओका ओकर बेटवन अउ बिटियन कोहाइ दिहन।

२० तब यहोवा कहेस, ‘मई एँसे मुँह मोड़बउं!

मई लखि सकउं—ओनका अन्त होइ।

काहेकि भ्रस्ट सबहिं ओनकी पीढियन अहइ।

उ सबइ अहइ अइसा सन्तान जेनका विस्सास नाही अहइ!

२१ उ पचे मोका मूरतियन स ईस्र्यालु बनएन जउन परमेस्सर नाही अहइ।

उ पचे मोका आपन निरर्थक मूरतियन स नाराज किहेन।

एह बरे मई ओन लोगन स जउन इस्राएलियन नाही अहइ ईस्र्यालु बनाइ देब।

मई ओन लोगन क मूरख रास्टर स नाराज करइ देब।

२२ मोर किरोध आगी क नाई सुलगत अहइ।

मोर किरोध मोत क ठउर क नाई गहिर तलक,

मोरे किरोध भुइया नस्ट करत ह।

अउ फसल क, अउ पहाड़े क नेंव मँ आगी लगावत ह।

२३ “मई इस्राएलियन प विपत्ति ढाउब,

मई आपन बाण ओन पइ चलाउब।

२४ उ पचे भूखन क मोरे दूबर स दूबर होइहीं।

भयंकर महारोग ओनकर विनास करिहीं।

मई जंगली जनावर क ओनके खिलाफ पठउब जहरीला साँपन

अउ रेगंड वाला जहरीला जंतुअन क ओनका डसइ पठउब।

२५ बाहेर सड़कन पइ तरवारे स मारा जइहीं,

अउ घरे क भीतर भय अउ डर स।

सिपाही मारि डइहीं जवान मनसेधू अउ मेहररुअन।

उ पचे मारि डइहीं नान्ह गदेलन अउ बुद्वन क।
२६ “मई कहत हउँ, मई ओका तितर-बितर कइ देव।

इस्राएलियन क लोगन स बिसरि जाइ द्या।

२७ मुला मई दुस्मन क कोहाइ क आसंका दूर करव, जउन होइ सकत ह दुस्मन गलत समुझत हीं।

उ पचे सेखी बघरिही अउर कइहीं,
“हम पचे जीत लीन्ह ह आपन ताकत स,
यहोवा नाहीं किहस इ काम क।”

२८ “उ मूरख रास्टर अहइँ उ पचे कछू भी समुझ नाहीं पातन अहइँ।

२९ अगर उ समझदार होतेन

तउ एँका समुझ पउतेन

अउर लख लेतेन आपन भविस्स।

३० कइसे एक टु हजारन क पीछा करत ?

कइसे दस हजार क दुइ टु भगाइ देतेन ?

इ तबइ होत जब सैल

यहोवा देत ओनका,

अउर ओनका गुलाम बनाइ देत।

३१ तोहार ‘चट्टान’ हमार चट्टान क नाइँ नाहीं।

हमार दुस्मन इ सच्चाई क खुद लखि सकत हीं।

३२ ओनकर अंगूर क लता सदोम क लता स अउ अमोर क खेत स अहइ।

ओनकर अंगूर बिखेला होत हीं ओनकर अंगूरन क गुच्छन करुआन।

३३ ओनकर दाखरस साँपन क बिख जइसी अहइँ अउ नागिन क जहर क नाइँ।

३४ “पभूँ कहत बा ‘मई उ सजा क सुरच्छित रखेउँ ह।

मई एँका आपन बस्तू-भण्डारे मँ बन्द किहेउँ ह।

३५ सिरिफ मई ही देइवाला दण्ड अहउँ मई ही लोगन क अपराधन क बदला देत हउँ,

जब अपराधन मँ ओनकइ गोड़वा फिसल जाइ,
काहेकि विपत्तिकाल ओनके निअरे अहइ
अउर दण्ड समइ ओनका दौड़ि आइ।’

३६ “यहोवा आपन जन क निआव करि।

उ पचे ओकर सेवक अहइँ, उ दयालु होइ।

उ ओकरे बल क मिटाइ लखिहीं

तउ उ ओन सबहिं अजाद

अउ दासन क होत लखी असहाय।

३७ उ तब पूछी, ‘लोगन क लबार देवतन कहाँ अहइँ ?

उ ‘चट्टान’ कहाँ अहइ, उ पचे जेकर सरण गएन ?

३८ मनइयन क इ सबइ देव, बलि क चर्बी खात रहेन,

अउर दारु, दारु क भेंट की पिअत रहेन।

एह बरे उठइँ इ सबइ देव, मदद तोहार करइँ तोहरी इ सबइ रच्छा करइँ !

३९ “लखा अब मई तोहार परमेस्सर अहउँ !

नाहीं दूसर कउनो भी परमेस्सर

मई ही निहचय करव लोगन क

जिअत राखउँ या मारउँ।

मई लोगन क दइ सकत हउ चोट

अउर ठीक भी रख सकत हउँ।

अउर न बचाइ सकत केउ कउनो क मोरी सक्ति क बाहेर।

४० आकास कइँती हाथ उठाइके मई वचन देत हउँ। अगर इ फुरइ अहइ कि मई सास्वत हउँ।

४१ मई आपन बिजरी क तरवार क उपयोग करव।

मई निआव पइ रहव।

मई एँका आपन दुस्मन पइ पूरयोग करव।

मइ ओका जवाब देव जउन मोहस घिना करत ह।

४२ मोर दुस्मनन मारा जइहीं अउर बन्दी होइहीं।

हमार बाण ओनके रकत स रंग जइहीं।

मोर तरवार दुस्मन क मूँड़ क काटि देइ।’

४३ “सब संसार परमेस्सर क मनइयन स खुस होइ।

काहेकि उ ओनकी मदद करत ह आपन सेवकन क हत्तियारन क उ सजा देत रहत ह।

उ आपन दुस्मनन स बदला लेत ह

अउर आपन देस अउर आपन लोगन बरे प्रायश्चित्त करत ह।”

मूसा लोगन क आपन गीत सिखावत ह

४४ मूसा आवा अउ इस्राएल क सबहि लोगन क सुनइ बरे उ गीत पूरा सुनाएस। नून क पूत

यहोसू मूसा क संग रहा। ४५ जब मूसा लोगन क इ उपदेस देव खतम किहस ४६ तब उ ओनसे कहेस,

“तू पचन्क निहचय करइ चाही कि तू ओन सबहिं आदेसन क सुमिरिव्या जेका मई आजु तू पचन्क

बतावत जरूर हउँ अउर तू पचन्क आपन गदेलन क इ जरूर बतावइ चाही कि एँन व्यवस्था क सबइ

नेमन क होसियारी स उ पचे पूरी तरह मानइँ।

४७ इ जिन समुझा कि इ सबइ उपदेस महत्व क नाहीं अहइँ। इ सबइ तोहार जिन्नगी अहइँ। एँन उपदेसन क जरिया तू पचे उ यरदन नदी क पार क

देस मँ लम्बे समइ तक रहव्या जेका लेइ बरे तू पचे तइयार अहा।”

मूसा नबो पहाड़े पड़

५८ यहोवा उहइ दिन मूसा स बतियान। यहोवा कहेस, ५९ “अबारीम पहाड़े पड़ जा। यरीहो सहर स पार होइके मोआब पहुँटा मँ नबो पहाड़े पड़ जा। तब तू उ कनान प्रदेश क लखि सकत ह जेका मई इस्राएल क लोगन क रहइ बरे दइ देत हउँ। ५० तू उ पर्वते पड़ मरब्या। तू वइसेन ही ओन लोगन स मिलब्या जउन मरि गए अहई जइसे तोहार भाई हारुन होर पहाड़े पड़ मरा अउ आपन लोगन स मिला। ५१ काहेकि जब तू सीन क रेगिस्तान मँ कादेस क निअरे मरीबा क जलासयन क लगे रह्या तब मोरे खिलाफ पाप किहे रह्या अउ इस्राएल क लोग ओका हुआँ लखे रहेन। तू मोर सम्मान नाहीं किह्या अउर तू इ लोगन क नाहीं देखाया कि मई पवित्तर अहउँ। ५२ एह बरे अब तू आपन समन्वा उ देस क लखि सकत ह किन्तु तू उ देस मँ जाइ नाहीं सकत्या जेका मई इस्राएल क लोगन क देत अहउँ।”

मूसा इस्राएल क लोगन क आसीबाँद देत ह

३३ १ मरइ क पहिले परमेस्वर क मनई मूसा इस्राएल क लोगन क इ वरदान दिहसः २ मूसा कहेस, “यहोवा सिनाइ स आवा। यहोवा सेईर क भिन्सारे क रोसनी क नाई चमका। उ पारान पहाड़े स फूटइ वाला प्रकास क नाई रहा। यहोवा दस हजार पवित्तर लोगन क संग आवा। ओकरी दाहिन कइँती बलवान सिपाही रहेन। ३ हाँ, यहोवा पिरम करत ह मनइयन स सबहिँ पवित्तर मनइयन ओकरे हथवन मँ अहई अउर चलत हीँ उ ओकरे पद चीन्हन पड़ हर एक मनई अंगीकार करता ओकर उपदेस। ४ मूसा दिहस नेमन हम पचन्क उ सबइ-जउन अहई याकूब क सबहिँ लोगन क। ५ उहइ समइया, इस्राएल क लोग अउ नेता लोग मिलेन अउ यहोवा भवा यूसून क राजा।

रूबेन क आसीबाँद

६ “रूबेन जिअत रहइ, उ न मरइ होइ सकत ह रूबेन जिअत रहा उ न मरइ, मुला ओकर बंस मँ मनइयन अधिक न होब।”

यहूदा क आसीबाँद

७ मूसा यहूदा क परिवार समूह बरे इ सबइ बातन कहेसः “यहोवा, सुन लेइ यहूदा क प्रमुख क जब उ माँगइ मदद लिआवइ ओका आपन लोगन मँ सक्तीसाली बनावइ ओका, करइ मदद ओकर दुस्मन क हरावइ मँ!”

लेवी क आसीबाँद

८ मूसा लेवी क बारे मँ कहेसः “तोहार मनवइयन सच्चा लेवी धारण करत ऊरीम-तुम्मीम, मस्सा पड़ तू लेवी क परीच्छा लिहा, तोहार विसेख मनई राखत रहा ओनका। लड़ा तू रह्या ओकरे बरे मरीबा क जलासयन पड़। ९ लेवी बताएँ आपन महतारी-बाप क बारे मँ : मई न करब ओनकइ परवाइ, मानेस नाहीं उ आपन भाई क, या जानेस आपन गदेलन क; लेवीबंसियन पालेन आदेस तोहार, अउर निभाएन वाचा तोहसे जउन। १० उ पचे सिखइहीँ याकूब क नेम तोहार अउर इस्राएल क व्यवस्था जउन तोहार। उ पचे सुलगइहीं सुगन्धि तोहार आगे अउ तोहार सारी होमबलि वेदी क जगह पड़। ११ “यहोवा, ओकर धन क आसीबाँद द्या अउर ओकर काम क अंगीकार किहेस। उ ओका नास कइ द्या जउन उ पड़ हमला किहेस अउ ओका हराइ द्या जउन ओहस घृना किहेस इस प्रकार उ फुन हमला नाहीं कइ सकत।”

बिन्यामीन क आसीबाँद

१२ बिन्यामीन क बारे मँ मूसा कहेसः “यहोवा क पिआरा ओकरे संग सुरच्छत होइ। यहोवा आपन पिआरा क रच्छा करत सारा दिन, अउर बिन्यामीन क भुइँया पड़ रहत यहोवा।”

यूसुफ क आसीबाँद

१३ मूसा यूसुफ क बारे मँ कहेसः “यहोवा द्या आसीबाँद ओकरे देस क सरग क उन्तिम बर्खा जहाँ होई; अउ धरती क तले स पानी अउ ओस मिलइ।

१४ सूरज क दीन्ह उत्तिम फल होई ओकर
अउर हर महीना मँ सब स बढ़िया फल होई ।
१५ पहाड़ियन अउ पुरान पहाड़िन
सब स बढ़िया फल उपजावई ।
१६ धरती देइ सब स बढ़िया फल यूसुफ बरे
उ जउन भाइयन स अलगाइ दीन्ह ग रहा ।
तउ परमेस्सर जउन बरत भइ झाड़ी मँ रहत ह
स सब स बढ़िया बरदान देइ यूसुफ क ।
१७ यूसुफ आपन गोरु क पहिला पइदा भवा क
गोरव पाइ ।
ओकर दुइनउँ बेटवन बर्धा क सीगे क तरह अहई ।
उ पचे रास्ट्रन क धरती क आखिरी छोर तलक
छेद देब ।
ओन मँ स हजारन क हजार मनस्सप स अहइ
अउर ओन मँ स दसन हजार एप्रैम स ह ।”

जबूलून क आसीबांद

१८ जबूलून क बारे मँ मूसा कहेस:
“जबूलून, खुस रहा जा जब बाहेर
अउर इस्साकार, खुस रहइ आपन सिबिर पइ ।
१९ उ पचे लोगन क न्यौतिहीं आपन पहाड़े पइ
हुआँ करिहीं भेंट सबहिँ सच्ची बलि
काहेकि उ पचे लोग सागर स निकारत हीँ धन
अउर पइहीं बालू मँ छिपा भवा जउन धन अहइ ।”

गाद क आसीबांद

२० मूसा गाद क बारे मँ कहेस:
“स्तुति करा परमेस्सर क जउन गाद क बढ़ावत ह ।
गाद ओलरा रहत अउ जोहत सिंह क नाई,
उ फडि देत ह बाजु अउ मूँडे क टूकन मँ ।
२१ आपन खातिर चुनत ह उ,
सब स खास हीँसा राजा बरे सुरच्छित रहब ।
मनइयन क नेतन आवत हीँ ओकरे लगे ।
उ करत ह उहइ जउन परमेस्सर क इच्छा बा ।
अउर यहोवा बरे इस्राएलियन क संग निआव
करत ह ।”

दान क आसीबांद

२२ दान क बारे मँ मूसा कहेस:
“दान सेरे क बच्चा अहइ
जउन वासान स उछरा करत ह ।”

नप्ताली क आसीबांद

२३ नप्ताली क बारे मँ मूसा कहेस:
“नप्ताली, तू बहोतइ बढ़िया चीजन क रखब्या ।
यहोवा क आसीबांद तोहरे बारे भरपूर अहइ,

लइ ल्या पच्छिम अउ दक्खिन क प्रदेस ।”

आसेर क आसीबांद

२४ मूसा आसेर क बारे मँ कहेस:
“आसेर क पूतन मँ सब स जियादा अहइ
आसीबांद,
ओका आपन भाई लोगन मँ सब स पियारा होइ
द्या
अउ ओका आपन गोइ तेल स धोवइ द्या ।
२५ तोहरे फाटकन क ताला होइहीँ लोहा अउ
काँसा क
तू जिन्नगी भइ सकती स भरपूर रहब्या ।”

मूसा परमेस्सर क स्तुति करत ह

२६ “यसूरून, परमेस्सर क नाई नाहीँ अहइ
अउर कउनो परमेस्सर आपन महिमा मँ चलत ह
चढिके बदरा पइ,
अकासे स होइके आवत ह मदद करइ तू पचन्क ।
२७ परमेस्सर सास्वत अहइ तोहार सरण सुरच्छित
अहइ ।
परमेस्सर क सकती सास्वत अहइ उ तोहार
सुरच्छा करत ह
अउर बल स हटावत ह दुस्मनन क,
कहत ह उ ‘नास करा दुस्मनन क ।’
२८ तउ इस्राएल सुरच्छित रही सदा
याकूब क जलस्रोत सुरच्छित अहइ धरती मँ ।
अन्न अउ नइ दाखरस क पइहीं सुन्नर धरती मँ
अउ उ भुईया सूबइ पाइ ।
२९ इस्राएलियो, तू पचे आसीस पाए अहा तोहार
जइसा कउनो रास्ट्र नाहीँ ।
तू यहोवा क दुआरा सुरच्छा पाउब्या ।
उ तोहार सुरच्छा ढाल अहइ ।
यहोवा अहइ विजय तरवार तोहार करइ वाली ।
तोहार दुस्मनन तोहसे डेरइहीँ,
अउर तू रउँद देब्या ओनकइ लबार देवतन क
ठउरन क ।”

मूसा क मउत

३४ १ मूसा मोआब क समतल पहुँटा स नबो
पहाड़े पइ गवा जउन यरीहो क पार
पिसगा क चोटी पइ रहा । यहोवा ओका गिलाद
स दान तलक सारा प्रदेस देखाएस । २ यहोवा
ओका सारा नप्ताली, जउन एप्रैम अउ मनस्से
क रहा, देखाएस । उ पस्चिमी सागर तलक यहूदा
क प्रदेस देखाएस । ३ यहोवा मूसा क खजूरे क
वृच्छन क सहर सोअर स यरीहो तलक फइली

घाटी अउर नेगेव देखाएस। ४ यहोवा मूसा स कहेस, “इ उ देस अहइ जेका मई इब्राहीम, इसहाक, अउर याकूब क बचन दिहे रहेउँ कि, ‘मई इ देस क तोहरे सन्तानन क देव। मई तू पचन्क इ देस देखाउब। मुला तू पचे हुआँ जाइ नाही सकत्या।”

५ तब यहोवा क सेवक मूसा मोआब देस मँ उहई मरा। यहोवा मूसा स कहे रहा कि अइसा होइ। ६ यहोवा बेतपोर क पार मोआब प्रदेस क घाटी मँ मूसा क दफनाएस। मुला आजु भी कउनो नाही जानत कि मूसा क कबर कहाँ बाटइ। ७ मूसा जब मरा उ एक सौ बीस बरिस क रहा। ओकर आँखिन कमजोर नाही रहिन। उ तब भी बलवान रहा। ८ इस्राएल क लोग मूसा बरे मोआब क खाले प्रदेस मँ तीस दिना तलक रोवत पीटत रहेन। इ सोक मनावइ क पूरा समइ रहा।

यहोसू मूसा क जगह लेत ह

९ तब नून क पूत यहोसू बुध्दिमत्ता क आतिमा स भरपूर रहा काहेकि मूसा ओह पइ आपन हाथ

धइ दिहे रहा। इस्राएल क मनइयन यहोसू क बातन मानेन। उ पचे वइसा ही किहन जइसा यहोवा मूसा आदेस दिहे रहा।

१० मुला उ समइ क पाछे, मूसा क नाई कउनो नबी नाही भवा। यहोवा परमेस्सर मूसा क प्रत्यक्ष जानत रहा। ११ कउनो दूसर नबी उ सारे चमत्कार अउ अचरज भरा काम नाही देखाएन जेनका करइ बरे यहोवा मूसा क मिस्र क भुईया मँ पठए रहा। उ पचे चमत्कार अउ अचरज, फिरौन, ओकर सबइ सेवकन अउ मिस्र क सबहि वस्तुअन बरे करइ ग रहेन। १२ कउनो दूसर नबी कबहुँ ओतना सक्तीसाली अउ अचरज भरा चमत्कार नाही किहस जउन मूसा किहस अउर जेनका इस्राएल क सबहि लोग लखेन।